

Ullut ataatsimiiffiusut aqqaneq arfersaneq pingajuat, tallimanngorneq 6. november 2009.

Immikkoortoq 40

Piniartut aalisartullu piffissaq ilaanni inuuniarnikkut ajornatorsiulernerminni pisortanit ikiorneqarsinnaanerisa pitsaanerulernissaat siunertaralugu sulisoqarnissaannik Naalakkersuisut peqqunissaat inatsisartut aalajangiiffigisassaattut siunnersuut.

(Inatsisartunut ilaasortaq Hans Aronen)

(Siullermeerner)

Ataatsimiinnermik aqutsisut:

Josef Motzfeldt, Inatsisartut Siulittaasuat, Inuit Ataqatigiit

Per Berthelsen, Siulittaasup tullia siulleq, Siumut

Olga Poulsen Berthelsen, Siulittaasuup tullia aappaat, Inuit Ataqatigiit.

Josef Motzfeldt, Inatsisartut Siulittaasuat (IA)

Tassalu Siunnersuuteqartoq Inatsisartunut ilaasortaq Hans Aronen, Inuit Ataqatigiit, siunnersumminik saqqummeeriarli.

Hans Aronen (IA)

Aap Qujanaq.

Ilaqtariit meeqqanik pilersugaqartut piffissap ilaanni inuuniarnikkut ajornartorsiuteqalersartut eqqarsaatigalugit oqallinnermi ilangullugit taaneqartarpuit ilaqtariit piniarnermik aalisarnermillu inuussutissarsiorrumik pilersuisoqartut. Pisortanit ikorsiissutit pillugit inatsisartut peqqussutaat nr. 15 20. november 2006-imeersoq kingusinnerusukkut allangortinneqartoq malillugu piniartut aalisartullu ikiorserneqarsinnaanerat ajornannginnerulersimagaluartoq suli ajornartorsiutitaqarpoq.

Pisortanik ikorsiissutit pillugit inatsit nunami sulinermik inuussutissarsiutililit atugaat najoqutarinerullugit ilusilersugaammat, piniarnermik aalisarnermillu inuussutissarsiutilinnut inuuniarnermi ajornartoernermi pisortanit ikiorneqarnissamik saaffiginninnermi ajornartorsiortsitsisarpoq. Ikorsiinermi annertussusiliineq SIK-p pisortallu akornanni nunami sulisut isumaqtigiissutaat malillugit annertussusiligaapput, akiligassat aalajangersimasut suusanersut nunami aalajangersimasumik suliffeqartut akilsortagaat malillugit annertussusiligaallutik, aammalu nunami suliffeqalernissamut piareersimanissaannik piumasaqaatitaqarlutik.

Inuussutissarsiutigivillugu piniartut aalisartullumi ikiorserneqarnissamut piumasaqaatinik amerlasuitigut naammassinnissinnaasangillat. Ukiariartornerani aammalu sikuusartumi sikuilernerani sila ullorpassuarni angallavissaajunnaaraangat piniarnermik aalisarnermillu inuussutissarsiuteqartut inuuniarnerminni meeqqaminnullu pilersuiniarnerminni ajornartoorsinnaasarput. Pisortaniillu ikorsiissutinik qinnuteqaraangamik nunami suliffeqalernissamut piareersimanissamut piumasaqaat naammassisinnaasangilaat silagissippat aallaqqeriannaasaramik. Piniartummi aalisartullu silamik peqquteqartumik angalasinnaannginnerminni piniutigissartarput aammalu piniutitik nakkutigiuannartarlugit.

Taamaammallu nunami suliffinnut suliartoriaannartut inisisimaneq ajorput, tamakkulu pissutigalugit pisariaqartitsivinnermi aammalu meeqqaminnullu inuussutissamik pilersuiniarnerminni ikorsiissutinik qinnuteqarnerminni ajornartorsiortinneqartarlutik.

Ikorsiinermi amma piniartut aalisartullu nunami suliffilinnut sanilliullugit allaanerusunik aningaasartuuteqartarnerat eqqarsaatigineqarneq ajorpoq, angalaqqilerneremi orsussamut patroninut allanullu piniarnermi aalisarnermilu pisariaqartinneqartunut aningaasartuuteqartariaqarnerat eqqarsaatigineqaratilluunniit apeqqutaatinneqarneq ajorput.

Siunissami Nunatta pissarititaannik pilersorneqarnissarput pisariaqartittuassagatsigu piniussisoqarnissarput aalisartoqarnissarpullu pisariaqartittuartussaavarput, taamaammatt amma ajornartuuinnermi pisortaniit ikiorserneqarsinnaanermut taakkununnga nunami suliffilittuulli naleqqussakkanik periarfissinneqartariaqarput.

Tamanna pisariaqartoq ersetseqqinnejarpooq meeqqat kaattut pillugit Qaasuitsup kommuniani innuttaasunik oqallitsitsinermi.

Taamatut oqaaseqarlunga neriuutigaara siunnersuut pingaarutilittut isigisarput Inatsisartuni ilaasortanit ilassilluarneqassasoq.

Per Berthelsen, Siulittaasup tullia siulleq (S)

Qujanaq. Taavalu massakkut Isumaginnermut Naalakkersuisoq Maliina Abelsen, Inuit Ataqatigiit.

Maliina Abelsen, Isumaginninnermut Naalakkersuisoq (IA)

Apeqquummut qujanaq.

Piniarnermik inuussutissarsiuteqartut ajornartorsiulersarnerat meerartaannullu atugassarititaasunut tunngasut Naalakkersuisut pingaaartitaraat. Ilaatigut tamakku tunngavigalugit atugarissaarnissaq pillugu isumalioqatigiissitamik aamma suliniutit pillugit suleqatigiissitamik nunap immikkoortuini aalajangersakkanik pineqartumi iliuusissanik suliniuteqartussanik, uanilu apeqqummi pineqartumut misissuisussanik Naalakkersuisut pilersitsiniarput.

Piniartut aalisartullu pisortanit ikorsiisarnermut inatsisip qasuteriffingineqarsinnaaneranut apeqqummut tunngatillugu aallaaviusariaqarpoq, aalisartut piniartullu aningaasartuutigisartakkaminnut aalajangersimasunut pilersuinissaminullu atugassanik inuussutissarsiuteqartut allat assigalugit pisortanit ikiorserneqarnissaminut piginaatitaammata. Qinnuteqaatit ataasiakkaarlugit naliliiffingineqareerneratigut ikorsiissutit pilersuinermut aningaasartuutinullu aalajangersimasunut atugassatut tunniunneqartarput, takujuk peqqusummi § 4 imaluunniit ataasiaannartumik aningaasartuutinut ikorsiissutit tunniunneqartarput, takujuk peqqusummi § 20.

Pisortanit ikorsiissutit annertussusissaat ataasiakkaarlugit nalilersorneqartarput, qinnuteqartullu aalajangersimasumik aningaasartuutigisartagai pilersuisussaatitaanera il.il. aallaavigalugit annertussusilerneqartarlutik. Aningaasat ikorsiissutigineqartut tamatigut annertussusilerneqartassapput ilaqtariit naammattumik nerisaqarsinnaanngorlugit,

inuunniarnerminnilu pisariaqartitaannut allanut naammattussanngorlugin. Pisortanit ikorsiissuteqarnissat nalilersorneqarnerini tamatigut meeqqat pisariaqartitaat immikkut isiginiarneqartassapput.

Tassunga tunngatillugu immikkoortinneqarneq ajorput qinnuteqartup aalisartuunera, piniartuunera, sulinermik inuussutissarsiueteqartuunera suliffissaaleqisuuneraluunniit. Piffissap ingerlanerani imminut ilaqtuttaminullu pilersuisinnaanngikkaanni, ikiorserneqarnissamik qinnuteqartoqarsinnaavoq.

Pisortanit ikorsiissutinik pisartagaqalernerimi piumasaqaataavoq ikiorserneqartoq sulilernissamut piareersimassasoq. Taassuma nalilersornerani pingaaruteqarpoq eqqaamassallugu qinnuteqartut ataasiakkaarlugit apeqqutillu tamaasa ilangullugit nalilersorneqartartussaammata.

Naalakkersuisut uppermarsarsinnaavaat pisortanit ikorsiissutit pillugit peqqussummi aalisartut piniartullu sulilernissamut piareersimasussaatitaaneranut tunngatillugu ajornartorsiutit peqqussut aqqutigalugu tamakkiisumik aaqqiiffiqineqarsinnaanngimmata, tassungali tunngatillugu inatsisit allanngortinnejassappata annertuumik piareersaasiortoqaqqaartariaqarpoq. Aqqutissaq siulleq tassaavoq akileraartarneq atugarissaarnissarlu pillugit isumalioqatigiissitamik pilersitsinissaq, tassani pisortanit ikorsiissutit ilangullugit isumalioqatigiissitami misissuiffiqeqaqqissaartussaammata.

Isumalioqatigiissitap akileraartarnermut tunngasut, ineqarnermut tapiissuteqartarnerit isumaginninnikkullu aaqqissuussinerit imminnut ataqtigiiusuunerinut tunngasut misissussavai, taamaalliluni pisortanit ikorsiissutit pisariaqartitsisunut tunniunneqartalissammata, peqatigitillugulu anguniagaavoq sulilernissaq kajuminnarnerulissasoq.

Malitsigitillugu Naalakkersuisut kissaatigaat nunap immikkoortuini aalajangersakkanik iliuusissanik suliniuteqarnissaq, tamatuma siunertarivaa nunap immikkoortuini ineriartornerup piffinni periarfissaasut piffiillu immikkoorutaat isiginiarlugit piorsaavigineqarnissaat. Tamatuma nassatarissavaa inuit ikinnerusut pisortanit ikorsiissutinik

pisariaqartitsilernerat – apeqquteqartup sammisai aamma ilanngullutik ikinnerulerlutik.

Tamatuma saniatigut Isumaginninnermut Naalakkersuisoqarfimmi piitsuussutsip Kalaallit Nunaanni pissutsit malillugit qanorpiaq paasisariaqarnera misissuiffigissallugu aallartitsisimavoq.

Pilersaarusiami tassani piitsuussuseq siammasissumik eqqarsarluni aallaveqartinneqarpoq. Aningasaatikinnejissitap pissutigalugu piitsuussuseq kisimi pineqanngilaq, kisianni aamma inuttaasut peqqinnissakkut tapiissutinut periarfissaat, ilinniarnissamut, aningasarliornermi ajalusooqqajaanermut, inoqatinit avissaarsimaneq il.il.

Tamanna tunngavigalugu Naalakkersuisut kaammattuutigaat inassuteqartinnani isumalioqatigiissitap suliniutillu pillugit suleqatigiissitap sulinermini innersuussutaat saqqumernissaat utaqqineqarallassasut. Tamatuma kingorna aalisartut-piniartut suliffeqalernissamut piareersimasussaatitaanerannut, namminnerlu pilersulersinnaanerinut tunngasut Naalakkersuisunit nalilersoqqinnejassapput inatsisitigut allanngortitsisinnaanissaq siunertaralugu.

Taamaattumik Naalakkersuisut kaammattuutigaat, siunnersuut taamatut isikkoqartillugu akuerineqassanngitsoq.

Per Berthelsen, Siulittaasup tullia siulleq (S)

Qujanaq.

Taamalillatalu partit oqaaseqartui tikippagut, siulliulluni oqaaseqartuussaaq Inuit Ataqatigiit sinnerlugit Jane Petersen.

Jane Petersen (IA)

Qujanaq.

Inuit Ataqatigiit isumaqarpugut inuiaqatigiit pingaartitaminnik naleqartitaminnillu ajornartorsiuteqarpata, pisussaaffigigipput akornatsinni pineqartut ajunnginnerpaamik

aaqqiissuteqarfigissallugit. Qangaaniit piniarnikkut inuussutissarsiuuteqarneq tassaavoq Nunatsinni nappatigisimasatta pingaarnersaat. Tamannalumi ullumikkut suli qujanartumik attanneqarlunilu ingerlanneqarpoq, naak inatsisitigut pisortanik inuussutissarsiorntunut atugassiissutigineqartut pitsaanerpaajusutut oqaatigineqarsinnaanngikkaluartut.

Siunnersuuteqartup Hans Aronenip, Inuit Ataqatigiinneersup tamanna arajutsisimanngilaa. Tunngavilersuuteqarnermilu takutippa, piniarnermik aalisarnermillu inuussutissarsiornerup sutigut kipungaffeqarnera. Ilumoorpoq piniartoq sulinermi inuussutissarsiuuteqartutullu pilersugaqarmat. Aamma ilumoorpoq sila unerisimanngitsillugu inuussutissarsiumminik ingerlatsinera pilersuisinnaaneralu unittariaqartarmat.

Tamanna maannamut inuiqatigiinnut tamatsinnut immitsinnut pilersornerunissamik suaaruteqarnitsinnut sunniuteqarpoq. Piniartut piniakkani angerlamut apuuppagit, tunillugillu Nunatta pissarititaaneersunik inuiaqatgiit inuussutissanik pilersortarpai. Allaallumi utoqqartagut pisinnaanngitsut aammalu ilaqtariit piniartukkormiuunngitsut Nunatta pissarititaanik nerinissaminnut periarfissinneqartarlutik.

Inuit Ataqatigiit isumaqarpugut inuiaqatigiittut pingaartitagut naleqartitaguullu ullumikkornit pitsaanerusumik pilersaarusiukkamik ilusilersonneqartariaqartoq. Tassanilu ilaavoq aamma piniarnermik aalisarnermillu inuussutissarsiuuteqarneq. Piniartutut aalisartutullu inuussutissarsiuuteqarneq inuiaqatigiinni pingartinneqarlunilu naleqartinneqassappat, tamatsinnullu tangilimmik sunniuteqassappat, inuussutissanik immitsinnut pilersornerunissarput annertusarsinnaajumallugu aamma nalilersuiffigineqartariaqartoq Inuit Ataqatigiinnit isumaqarpugut. Immitsinnummi pilersornerunita qulakkiissavaa avataaniit tunissassianik eqqussinerujussuup millisarneqarnera.

Aamma piniartut aalisartullu inuiaqatigiit tamarmiusut iluaqtissarsiffigisaannik. Piniartut aalisartullu sila unerisimanngitsillugu inuuniarnikkut ajornartoorluinnarunik, ikorsiissutinik ataasiaannartunik kommunalbestyrelsemut qinnuteqarsinnaatitaapput. Naak piniartut aalisartullu assigiimmik sulisartutut pilersugaqaraluartut, sulinermik inuussutissarsiorntut illuatungaani napparsimatillutik aningaasarsiaminnik annertuumik annaasaqaataanngitsumik pisortanit ikiorserneqarsinnaapput.

Tassani aperisariaqarpugut, sooq inuiqatigiit pingaartitaat naleqartitaallu, tassalu piniartuuneq aalisartuunerlu allatulli inuussutissarsiortartutut akuerineqanngillat allatulli inatsisitigut aamma pisinnaatitaaffeqarlutik. Inuit Ataqatigiit tassunartaatigut kipungasoqarnera aaqqitassaasutut isumaqarpugut.

Taamaattorli Nunarput issorartoorsuummat periarfissarititaasullu taamaallutik assigiinngisitaarmata, tupinnanngitsumik piniartut aalisartullu atugaat assigiinngissitaarput, apeqqutaalluinnarluni nunap immikoortortaani sorlermi aggerfeqarnersut.

Assersuutigiinnarlugu Avandersuarmiut, Tunumiut, Kangaatsiaap eqqaani aammalu Nunatta isuani piniarnermik inuussutissarsiuteqartut atugarisaat Nunatta immikkoortuinit allanit allaanerulluinnartuupput. Taamaattumillu pissutsit taamaannerat aaqqiiniarnermi aamma isiginiarneqassasoq Inuit Ataqatigiinniit isumaqarpugut.

Inassutigissavarput Naalakkersuisut pilersaarutigivaat Akileraartarnikkut Atugarissaarnermullu Isumalioqatigiissitap pilersinneratigut apeqqutit matumani siunnersuuteqartumik ilaatigut kalluarneqartut ilanngullugit ajornartorsiutillu qulaajagassat allat soorlu akileraartarnikkut, ineqarnikkut, tapiissuteqartitsisarnermi aaqqissuussinerit, isumaginninnikkut ikiorsiissutit ilaalu ilanngullugit nalilersuiffigineqassasut.

Naalakkersuisullu akissuteqaammini oqaatigivaa nunap immikkoortortaani ilusiligassamik suliniuteqartoqartoq. Tassa nunat immikkoortuni piffinni periarfissarititaasut piorsaavigineqarnissaat siunertaalluni. Tamanna Inuit Ataqatigiit assorsussuaq isumalluarfigivarput. Tassami Nunatta iluani inuussutissamik pilersuineq aalajangersimasumik anguniagaqarluni sanaffigineqartuuppat qularinngilluinnarparput piniartut aalisartullu inuussutissamik pilersuinermi maannamik aaqqissuussaalluagaanerusumik atorluarneqarsinnaangornissaat.

Inuit Ataqatigiit ismaqavippugut tamanna pimoorunneqarluinnartariaqartoq. Upperivarpuunni piniartortagut taakkuusut Nunatsinni inuussutissamik pilersuisussatta pingaarnersaat. Inuit Ataqatigiinniit isumaqarpugut ajornartorsiutit inatsisigullu kipungasoorutit siunnersuuteqartumit matumani iluarsiivigineqaqquneqartut Naalakkersuisut Akileraartarnermut Atugarissaarinermut

Isumalioqatigiissitamik pilersitsiniarnerannut ilaatisallugit tulluartuusut. Taamaattumillu isumalioqatigiissitap inerniliussaat inassuteqaatissaalu utaqqimaarneqarallassasut isumaqarpugut.

Taamatullu oqaaseqarluta siunnersuuteqartup anguniagai aamma Naalakkersuisunit suliniutigineqareersut ilaatinneqassasut pingaartinneqarmat, naggataatigut oqaatigisinnaavara, tamanna Inuit Ataqatigiit assorsussuaq iluarisimaaratsigu. Qujanaq.

Per Berthelsen, Siulittaasup tullia siulleq (S)

Qujanaq.

Tassalu pisarnitsitut maanna tassa periarfissanngorpoq inatsisartut ataatsimiittarfianiittuinngaanniit ilaasortanik oqaaseqarsinnaaneq. Taavalu qinnuigissavakka oqaaseqartussat nalunaarlutik toorseqqullugit.

Oqaaseqarumasoqanngilaq, taamaattumik Inuit Ataqatigiit saqqummiussisuanut qujavugut.

Massakkullu uani torsineq isumaqaraluarama partiit oqaaseqartuartut torsinerusoq, kisianni tassa oqaaseqartumut aamma oqaaseqaateqarnissamut qinnuteqartoqarpoq, tassalu Inatsisartunut ilaasortaq Karl Lyberth, Siumut – takanna.

Karl Lyberth (S)

Qujanaq.

Jane Petersen, Inuit Ataqatigiit sinnerlugit saqqummiininni ukua saqqummiussatit assortornianngilakka aamma siunnersuuteqartoq paasilluarlugu oqaaseqaravit. Unaana apeqqutiginiaannariga Inuit Ataqatigiit qanoq isumaqarfigeneraat una apeqqut ataatsimiittitaliamut sussassaqartumut ingerlateqqinnissaa. Taanna ilissi qanoq isumaqarfigivisiuk, uani Inatsisartut ataatsimiittitaliaanut ingerlatitseqqinnissami taasaqannginnassi.

Per Berthelsen, Siulittaasup tullia siulleq (S)

Qujanaq. Taava oqaaseqartoq.

Jane Petersen (IA)

Apeqquutinnut qujanaq. Tassuuna tunngavilersuutigaagut pisariaqartorpassuit Nunatsinni aalisarnermut piniarnermullu tunngassuteqartut ataatsimoorussamik ataqatigiissaarisumik

aaqqissorneqartariaqartut. Aammalu isumaqarpugut atugarissaarnermut akileraartarnermullu isumalioqatigiissutip taanna suliassarissagaa aamma tassunga inassutigaarput.

Per Berthelsen, Siulittaasup tullia siulleq (S)

Qujanaq.

Maannalu oqaaseqarniarluni allanik nalunaartoqanngimmat, oqaaseqartoq qutsavigaarput. Tulleriaartarnerpullu malillugu maanna Siumumit oqaaseqartussaq sassaqqarput, tassalu Inatsisartunut ilaasortaq Hr. Karl Lyberth, Siumut. Takanna.

Karl Lyberth (S)

Qujanaq.

Piniartut aalisartullu piffissap ilaanni inuuniarnermikkut ajornartorsiuteqalerne minni pisortanik ikiorserneqarsinnaanerisa pitsaanerulernissaat siunertalarugu sulisoqarnissamik Naalakkersuisut peqquneqarnissaannik inatsisartut aalajangiiffigisassatut siunersuut Inatsisartunut ilaasortamit Hans Aronsenimiit, Inuit Ataqatigiit saqqummiunneqarpoq.

Piniarnermik inuussutissarsiuteqartut ajornartorsiulersarnerat meerartaannullu atugassarititaasunut tunngasut pitsanngorsartuarnissaat Siumumiit pingaartitaraarput. Aamma maluginiarparput siunnersuuteqartoq tamanna pingaartillugu saqqummiussaqartoq. Kisiannili siunnersuuteqartumut eqqaasitsissutigissavarput maannakkut Naalakkersuisuusut 2010-mut aningaasassanut inatsisissatut siunnersuutimikkut piniarnermik aalisarnermillu inuutissarsiuteqartut aningaasaqarniarnermikkut periarfissaasa atugarisaasalu ullumikkornit ajoernerusumik inissisimalernissaat annertuumik aqqutissiuummassuk. Nioqqutissanik tunisassanillu assartuinerit akisulernerulerninnerisigut, pisiniarfinni pisiassat akisunerulernnerisigut, ineqarnermut akiliutit qaffaaffiginerisigut.

Kommuninut tapiissutaasartut ikilersinnerisigut, aalisarsinnaanermut akiliuteqartitsisalernerup eqqunneratigut. Saarulliit akiinik minnerpaaffiliinissap akerlerineratigut. Kiisalu aamma minnerunngitsumik ilaqtariinnut meeqlanullu ikorsiissutaasartut aaqqissuussinerit piiarneqarput, soorlu meeqlanut ileqqaartitsisarneq, meeqlat atuarfianni atuartunut angajullernut tapiissutaasartut piiarneqarlutik. Tamakkunatigut inuaqatigiinni aaqqissuussinerit piiarneqarnerat piniarnermik aalisarnermillu inuussutissarsiuteqartunit sakkortoorujussuarmik malugineqartussaassapput,

minnerunngitsumik isorliunerusuni nunaqarfinnilu najugalinnut. Tamakku ulluni aggersuni tamatta misigilissavagut maannakkut Naalakkersuisuusut pinngitsoortinniarunikkit aningaasanik inatsisisstatut siunnersuut allanngorluinnartariaqarpoq Siumumiit siunnersuutaasunut annertuumik qanillattuiffiusumik.

Neriuppugullu partiit naalakkersuisuutaqartut kingusinaartigatik aaqqiissutissanik Inatsisartunut saqqummiussiumaartut, tassa Inatsisartut 2010-mut Aningaasanut inatsisisstatut siunnersuummik suliaqarnerisa naammassinnginnerani. Aalajangiiffisassatut siunnersuut saqqummiunneqartoq nassuiarneqaraluarluni inatsisitigut qanoq aaqqiisoqarsinnaaneranik imaqanngimmat Siumumiit aalajangeeqataafffigisinnaanngilarput.

Taamaakkaluartoq ajornartorsiut atuuttoq nalunnginnatsigu aamma ajornartorsiutaat qulaani taasatsitut minnerulernavianngimmata Siumumiit inassutigissavarput siunnersuutip ataatsiimiititaliamut ingerlatinneqarnissa.

Per Berthelsen, Siulittaasup tullia siulleq (S)

Qujanaq. Taava apeqquqteqarumasoqarnersoq matumani oqaaseqarumasoqarnersoq.

Siulliulluni oqaaseqarumavoq Inatsisartunut ilaasortaq Hans Aronen, Inuit Ataqatigiit, takanna.

Hans Aronen (IA)

Uani oqaluuserisassami saqqummiussaqartuullunga ukua apeqquqtingeqartut akisussanngorakkit, akiumaarakkit. Unalu eqqumiigilaagara apeqquqtilaarniarpara Karl Lyberthimut, Siumut oqaaseqartuanut.

Tassa aalajangiiffisassatut siunnersuummut tunngatillugu Siuminngaannit aalajangeeqataajumanngeriarlutik allassimanngitsumi uani ataatsiimiititaliamut ingerlanneqarnissaanut innersuussinersi, taanna imminut assortuutinnginnersoq, imaluunniit isumarpiaisi sumerpiaimiinnersoq paaserusuppara, uani allaqqagami aalajangeeqataasinnaangitsusi. Taavalu aappaatigut illuatungaatigut oqarlusi ataatsiimiititaliamut ingerlatitseqqillusi, taanna aalajangiinerunnginnersoq.

Per Berthelsen, Siulittaasup tullia siulleq (S)

Qujanaq. Oqaaseqartoq.

Karl Lyberth (S)

Aap, siullermik utoqqatissutigissavara paasiuminaalaartunik oqalussimaguma.

Uani taamatut aalajangeeqataaffigisinnaannginneranut oqarnitsinnut patsisaaginnarpoq una ajornartorsiu saqqummiussat aaqqiiniarneq saqqummiussat periarfissarpassuugamik tassani aaqqiiniarnerup iluani assigiingitsunik iliuuseqarfingineqarsinnaasut. Tassa ajornartorsiu atuuttoq nalunngilarput aamma piviususoq nalunngilarput. Aamma minnerunngitsumik maani, naluara kukkunerlunga oqassaguma, maani Inatsisartuni immaqa tamanna ilisimanerpaavara ukiuni 17-nini piniartuunikuuvunga aalisartuunikuullungalu piffissami sivisunerpaami umiatsiaararsorlunga. Taamaattumik taakkua ajornartorsiuutit nalunngeqaakka.

Unaana pigipput qanorpiaq aaqqiiniarnermik siunersuuteqartoqanngimmat taamatut massakkut aalajangiisinnaanngitsugut, kisianni ajornartorsiu piviusummat atuummat Inatsisartut ataatsimiitaliaanut oqaluuserineqartariaqartoq inassutigigipput.

Per Berthelsen, Siulittaasup tullia siulleq (S)

Qujanaq. Takusinnaavara akissut erseqqissutut akuersarneqartoq.

Tulliulluni oqaaseqarniarluni qinnuteqarnikuuvvoq Inuit Ataqatigiinniit Jane Petersen. Takanna.

Jane Petersen (IA)

Qujanaq.

Ilisimavarput ukiuni kingullerni taanna ajornartorsiu qaqinnejartuaannarsimasoq aamma Inatsisartuni siullermeirluni qaqinnejanngitsoq. Uangaana uku tikikkusullugit piniartut aalisartullu sila unerisimanngikkaangat inuussutissarsiornarerat unittarpoq. Tassani ikorsiissutaasinnaasut killeqartinneqarput, tassa kommunalbestyrelsimit qinnuteqarsinnaapput ukiumut ataasiaannarlutik ikorsiissummik pineqarnissamut. Taanna patsisaavoq piniartoq namminersortutut inissisimanera pillugu. Taanna Siumup qanoq isumaqarfigaat, namminersortutut inissisimanera ilissi qanoq aaqqiivigerusuppsiuk imaluunniit taamaattuaannarniarpanukua.

Per Berthelsen, Siulittaasup tullia siulleq (S)

Qujanaq. Oqaaseqartoq.

Karl Lyberth (S)

Tassa oqareernittut taanna ajornatorsiut atuuppoq, taamaattumik pimoorullugu Inatsisartut ataatsimiititaliaani sammineqartariaqarpoq. Una nalunngilara piniartut aalisartullu namminersortutut isigineqartut, aammami namminersoramik, namminersortutut ingerlatsigamik, taanna assortoruminaatsorujussuuvoq. Taamaammanuna una piniartut aalisartullu immaqa silap ajornera patsisigalugu imaluunniit arlaannik patsiseqarlutik isertiqarsinnaanngikkallarnerminni kommunimut saaffiginnikkaangamik qinnuigineqartartut naqitseqqullugu, tassa suliffissarsiortutut naqitsinissaat taanna piumarineqartarpoq.

Taamaattumiuna una ajornatorsiut ukiorpassuarni atuussimasoq eqqumaffigineqaraluarluni qanorpiaq aaqqissallugu taanna maannakkut suli nassaariuminaatsutut imaluunniit aaqqikkuminaatsutut isigineqarnikuusoq. Taamaammanuna siunnersuuteqartup siunnersuutaa imaluunniit saqqummiussaa aatsaat saqqummiunneqalinngikkaluartoq iluatigalugu piviusummat Siumuminngaanniit oqalliseqataarusuttugut, taakkua piniartut aalisartullu arlaatigut taamatut ajornartorsiuteqaraangata ikiortariaqarmata.

Taamaammanuna inassutigaluaripput aap Inatsisartut Ataatsimiititaliaani oqallisiginartigu, imaassinjaavoq aaqqiissutaasinnaasumik tassani taanna aqqutigalugu nassaarsinnaasugut.

Per Berthelsen, Siulittaasup tullia siulleq (S)

Qujanaq. Oqaaseqarniarlutik allanik nalunaartoqanngilaq.

Aana Inuit Ataqatigiinniit Jane Petersen, takanna.

Jane Petersen (IA)

Qujanaq.

Ukiuni kingullerni piniarnikkut aalisarnikkullu inuussutissasiuuteqarniarneq qanoq ingerlanera nalunngilarput. Massakkut pisariaqavisoq tassaavoq aalisartut piniartullu siunissami neriuuteqalernissaminnt inuussutissarsiutimik napaannarnissamut, namminerlu pilorsorneqarnissamik periarfissamik tunineqarnissaat. Piviusoq unaagami, naammanngilaq

piniagassanik tunigaanni piniartullu neriuutissaannik tuninagit siunissamik qanoq inuuneqalerumaarnissaat. Taamaattumik apeqqutigerusuppara una tunngassuteqarmat ikiorssiarsnermut tunngasoq piniarsinnaajunnaarnermut tunngassuteqaraangat ajornartoortarneq pillugu tunngasummat, Siumut qanoq eqqarsarpa, qanoq aalisartortagut piniartortagullu neriummik tunineqarnissaannut qanoq eqqarsaateqarpat.

Imaassannginnami piniagassatigut tunisinikkut taamaallaat neriummik tunisisoqarsinnaasoq. Kisiannili ungasinnerusumut isigaluni qanoq siumut isigaluni qanoq Siumut pilersaaruteqarpa aalisarnerup piniarnerullu tungaasigut isummersuuteqarnermigut.

Per Berthelsen, Siulittaasup tullia siulleq (S)

Oqaaseqartoq.

Karl Lyberth (S)

Aap qujanaq.

Tassa apeqqut pissanganarpoq, uggornarpoq 2 minutiinnaat uani periarfissaqarama uani massakkut. Kisianni ukua Hans Aronsenip saqqummiussaanut tunngatillugu piniartut aalisartullu uani sinerissap qanittuani imaluunniit umiatsiaararsortut taakkua pineqarnerummata ilaatigut. Tassunga tunngatillugu oqaatigisinhaavara apeqqut killormut saatilaarlugu aamma oqaatigineqarsinnaavoq, iluaqutaanaviangilaq taakkununnga piniassatillutik imaluunniit aalisassatillutik akileeqqaartassappata. Tassa taakkua ajornartorsiut, inuit taakkorpiaapput aalisalerunik, arnalunnialerunik 1.500 koruuneeqqaartassasut, saarullinnialerunik 1.500 koruuneeqqaartassasut, qaleralinnialerunik 1.500 koruuneeqqaartassasut, saattuarniarnialerunillu saattuarniartuanik 1.500 koruuneeqqaartassasut. Tassa taakkua ajornartorsiut tamakkununnga iluaqutaanaviangillat akornutaaginnassaaq.

Aammalu taakkua siunissaat eqqarsaatigalugit pitsaanerulertinnissaanut tunngatillugu eqqarsaatigalugit uanga nammineerlunga assorujussuaq neriuutigivara Nunatsinni nammineq uumassusillit pisuussutitta atorluarnerulernissaat, aamma tassani pineqarput puisit neqaat assersuutigiinnarlugit, aamma taakkua atorluarnerulernissaat uanga nammineerlunga neriuutigisorujussuuara nalunnginnakku Nunatta sineriaani puiserpassuaqartoq, aammalu pisat amerlasartut, taakkualu atorluanngippallaqaagut.

Taamaattumik atorluaanerunikkut nutaaliornikkut assigiinngitsutigut nutaaliornikkut Nunatta pisarititaasa atorluarnerunikkut nutaaliornikkut taamatut politikkeratutta siunertaqarutta, taava piniartunut aalisartunullu aamma iluaquataanissa qularinngilluinnarpala isertitaannullu iluaquataangaatsiassallutik.

Per Berthelsen, Siulittaasup tullia siulleq (S)

Qujanaq. Jane Petersen, Inuit Ataqatigiit, oqaaseqaqqinniarpoq.

Jane Petersen (IA)

Qujanaq.

Qujanaqaaq Siumukkut aamma aalisarnermut piniarnermut tunngasumik neriuuteqarmata. Aamma paaserusuppara aalisarnermut piniarnermut tunngassuteqartumi eqqartuitilluta Siumukkut suaarutigivaat assigiinngitsut piniagassanut killilersuisarnerit ilaalu ilanngullugit, uani assersutigiinnarlugu puisinniartarneq pillugu qisuarialeqarujussuarput. Tunisineq, puisip amia tunineranut aki naammanngitsut ilaalu ilanngullugit. Kisianni piniartut ilisimavaat Nunatsinni pilersueqataanissartik, piniartut ilisimavaat inuiaqatigiit tamarmik tangilimmik attuumassuteqartumik tunisinissartik. Nalunngilaa piniartup amernik tunisigaangami Qaqortumi tunitsivimmi uninngaliinnartartut, inuiqatigiinnullu siamarneqarani. Taanna eqqarsartariaaseq tunisiarlunilu, tapersorsorniarlugillu tunisaalu iluamik atorniarnagit, suna ilissi Siumimi qanoq isummertariaaseqarpisi tassunga tunngasumik.

Per Berthelsen, Siulittaasup tullia siulleq (S)

Siumup oqaaseqartua.

Karl Lyberth (S)

Taakkua puisit amiinut tunngatillugu soorunami assortorneqarsinnaanngilaq atorluartariaqarpagut taakkua tamatta, aamma neriuunartorujussuuvoq siunissami nunarsuarmioqatitta nunani allaniittut puisit amiinik aamma atorluaqqilernissaat, taamaattumik suliniuteqartuartariaqarpugut taakkua piniartut eqqarsaatigalugit puisit amiisa atorluarnissaat eqqarsaatigalugit. Uani siusinnerusukkut oqalukkama oqarpunga ukiuni 17-ini piniartuuniikuullunga taamaattumik piniartut atugaat nalunngilluinnarpala.

Aamma nalunngilluinnarpara inuiaqatigiinni taamatut piniartuuninni tunisisarnini aamma iluaquataallunga. Aamma piniartut aalisartullu tamarmik iluaquataapput, taamaattumik taakkua iluatiginissaat ingerlaannarnissaat tamatta inatsisartuniittugut sulissutigisariaqarparput, pitsaanerpaamik atugaqarnissaat siunertaralugu.

Taamaammanuna siunnersuuteqartup taanna tunngaviata tungaatigut taasaa, piniartut aalisartullu ajornartorsiortarmata taanna miserratissaannginnami ukiut ingerlanerini. Taava pingitsoornata arlaannik iliuuseqarfisariaqaratsigit una siunnersuut oqaannarnata taassunga ataatsimiititaliarsuarmut nassiullugu, kisiannili isumaqarpunga inatsisartuni oqartariaqartugut, aap, ajornatorsiut nalunngilarput atuuttoq, taamaattumik ataatsimiititaliani susassaqartumi oqaluuserinissaas pisariaqarpoq, sukkanerusumik aalajangiisariaqaratta.

Per Berthelsen, Siulittaasup tullia siulleq (S)

Tulliulluni oqaaseqarumavoq Inuit Ataqatigiinniit Peter Lyberth, takanna.

Peter Lyberth (IA)

Soorlu oqaaseqartutta Inuit Ataqatigiinniit oqaatigigaa taanna ajornartorsiut ukiorpassuarni Inatsisartuni saqqummiunneqartarsimavoq aamma oqaluuserineqartarsimavoq maannamullu suli aaqqiisoqarneq ajorluni. Taanna uanga eqqumiigisarakku uanga sooq aaqqiissutissanik nassaartoqarneq ajortoq.

Massakkut takusinnaavara sooq, illuatungiliuttut partiininngaanniik najuuttutuaapput oqaaseqartut. Oqaluuserinissaanut soorlu soqtigineqarsimanngitsoq qinikkaninngaanniit inatsisartunit. Massakkut Inuit Ataqatigiinninngaanniit siunnersuuteqartoqarpoq, siunissaq ungasinnerusoq eqqarsaatigalugu aaqqiissutissamik. Taamaakkaluartoq Siumut oqaaseqartuaninngaanniik uparuartorneqarput massakkut ileqqaarutigineqarlutik, sipaarutigineqarniartorpassuit Inatsisartuni oqaluuserineqareersut taakkartorlugit.

Taakkua sumit tunngaveqarnersut tamarluinnatta nalunngilarput, Inatsisartunit qinersineqaqqammersoq Naalakkersuisunngortut nutaat pilersinneqaramik Nunatta

ajutoorutigisinnaasaanik pisoqalermat aaqqiiniarneq suliaat siulliusimavoq immikkut ataatsimiittariaqarsimallutik, maannamullu suli taanna uparuartorneqaatigijuarpaat.

Massakkullu taakkua taakkartukkatit tassa tassannga kinguneqarput. Aaqqiinissamut ungasinnerusoq eqqarsaatigalugu aaqqiinissamut Siumut qanormita isumaqarpa.

Per Berthelsen, Siulittaasup tullia siulleq (S)

Qujanaq.

Erseqqissaagigilaassavara maaniinnginneq nalilerneqarsinnaanngimmat soqtiginnginninnertut, maanna neriuiffiunera eqqaasitsissutigilaarpala aammalu allaffitsinninngaanniit naalaarsinnaaneq taanna ilisimatsitsissutigilaarlugu.

Maannalu Siumup oqaaseqartua takanna.

Karl Lyberth (S)

Aap, apeqqummut angiisumut qujanaq. Tassa ilaatigut oqarputit apeqquteqarnini Nunatta ajutuulernera Naalakkersuisut nutaat aaqqiiviginiraat annaanniaraat. Uanga taanna taamatut oqarneq ilisarisinnaanngilara. Naalakkersuisut nutaat aalartikkamik Nunarput ajutuulertutut isikkoqanngilaq, Nunarput pisuutut isikkoqarpoq.

Landskarsi taamannat 2 milliard missaani imaqarpoq. Suliffissaaleqisut aatsaat taamak Nunatsinni ikitsigipput, tassa 3,4 %-iunnguatsiarpoq taamani Naalakkersuisut aallartimmata eqqaamasara malillugu. Taamaattumik taamatut Nunatta ajutuulerneratut oqarneq isumaqarpunga pissusissamisuunngitsoq aamma uani piniartut aalisartullu ajornartorsiulernerani tunngatillugu taamatorujussuaq akisuumik allamut saattaqattaarneq ajunngilaq taanna kissaatigigussiuk allamut saattaqattaassaagut, akiussaqqaarpassi, nuannissaqaaq taamatut sivisuumik oqallisssaguta - ajorinngilluinmarpara.

Soorunami ukua piniartut aalisartullu eqqarsaatigalugu oqareerpunga aaqqiiniarnerit assigiinngitsut tamarmik tamaasa Siumuminngaanniit iluatigilluinarpagut. Aamma aaqqiiniarnerit assigiinngitsut apeqqutaatinnagu suminngaanniit partiiminngaanneernersut saqqummiunneqartut taakkununnga

inunnut maannakkut eqqartukkatsinnut aalisartut piniartunullu tunngatillugu Siumuminngaanniit suleqatigiissaqqaarpagut aamma aaqqiiniarnerit kusanartut tapersersussaqqaarpavut.

Taamaammanuna una siunnersuut nalunngilarput partiimi allaminngaanneeraluartoq, taanna soqutaanngilluinnarpoq. Siunnersuut una saqqummiunneqartoq imaluunniit oqaluuserisassatut taaneqartoq piviusummat aamma aaqqeeqataarusukkatta Inatsisartut ataatsimiititaliaanut ingerlateqqikkusukkaluarippuit.

Per Berthelsen, Siulittaasup tullia siulleq (S)

Qujanaq.

Tassa eqqaasitsissutigissavara oqaluuserisaq qulequartarmat, taannalu qimanneqannginnissaa uanga aqutsisutut isumaginiartussaavara. Taamaattumik kaammattuutigissavara, naak kajungertoqaraluartoq annertuumik aammalu siammasissumik oqallissinnaanermut, kaammattuutigissavara oqaluuserisassap aallaavia taanna qimannaveersaassagippuit.

Aamma erseqqissassavara tassa naak Siumut oqaaseqartuata ataatsimiititaliamut ingerlatsinissaq kaammattuutigialuaraa amerlanerussuteqavittut siunnersummik itigartitsimmata.

Pingasut suli oqaaseqarumallutik suli kissaateqarnikuupput, tulliuppoq Inuit Ataqatigiinniit Jane Petersen takanna.

Jane Petersen (IA)

Qujanaq.

Qulequataa oqallisigivarput aap, kisianni qulequataa imaqartorujussuovoq pissutigalugu inuiaqatigiinni naleqartikkatsigu pingaartillugulu, inuiaqatigiillu taakku pineqartillugit inuiaqatigiit tamarmiusutut aamma isigineqarlutik, aamma isumaginninnikkut isigineqarlutik eqqartorneqartussaapput. Taavalu aamma oqaatigineqartut assigiingitsorpassuit Siumut oqaaseqartuinnganniit tapertaliunneqarpoq Aningaasamut inatsisisamut tunngassuteqartut. Taakkua eqqaassanngilakka, siunertaqarmata tamaavimmik. Aamma taakkua qanorsuarluunniit oqallisigineqarsinnaapput akerleriikkutta akerleriinngikkutta.

Qanoruna iliornissatsinnut oqalunniartugut, ilaa inuiaqatigiit ajunnginnerusumik inuuneqalernissarput pillugu taamaaliorpugut. Qanoruna iliorneq apeqqutaaginnartoq allat taamatut isumaqarsimappata allat taamatut isumaqarsimammata. Aqqununa assigiinngitsoq atorusuinnaripput, tamatta ajunnginnerpaamik inuunissatsinnut siunertaqarpugut.

Siumut oqaaseqartua oqarpoq sukkasumik iliuuseqartoqartariaqartoq. Aammalu tamakku misissorneqarluartariaqartut aalisarnermut piniarnermullu akileraartarnikkut aammalu isumaginninnikkut tunngassuteqartut aaqqinneqassappata. Taava imaattoq akileraartarnermut tunngassuteqartut sukumiisumik misissorneqarnissaat aammalu ersarissumik paasineqarluni qanoq taanna ajornatorsiut suli maani aaqqinneqarsimanngitsoq aaqqinneqaqqullugu.

Sukumiisumik misissuinissap pingaartinneqartoq malugisinnaavara aamma Inuit Ataqatigiinnit taanna pingaartipparput, taamaattumillu Inuit Ataqatigiinnit inassutigissavarput Aalisarnermut Piniarnermullu Nunalerinermullu Ataatsimiititaliamut ingerlanneqassammat aamma Isumaginninnermut Ataatsimiititaliamut ingerlanneqarnissaa kissaatigaarput uagut.

Isumaqratta piniartut aalisartullu inuussutissarsiornermikkut Nunatsinni pingaartineqartutut isigineqassappata aammalu naleqartutut isigineqassappata tassaniittariaqartoq oqallinneq. Ajornartorsiullu aaqqinneqarnissaa uagut pingaartikkatsigu.

Per Berthelsen, Siulittaasuup tullia siulleq (S)

Qujanaq, oqaaseqartoq.

Karl Lyberth (S)

Aap qujanaq.

Tassa Jane Petersen ilumoorpoq ikioqatigiilluta taakkua Nunatsinni innuttaasut piniartut aalisartullu ajornartorsiuteqartartut ilaanneeriarlutik ajornartorsiuteqartartut sapinngisamik pitsaanerpaamik atugaqarnissaat pillugu suleqatigiilluta ikioqatigiilluta ingerlasariaqarpugut tassani.

Taamaattumik qujanarpoq Inatsisartut Ataatsimiititaliaannut ingerlatsinneqarnissaa Inuit Ataqatigiinninggaannit ammaffigineqarmat, ajorineqanngimmat isumaqtigivakka taanna

ataatsimiititaliarsuaq utaqqinngikkaluarlugu ajornanngippat sukknerusumik aaqqiisinnassagutta, sukknerusumik aaqqiineq tassa tassani anguniarneqarpat.

Taamaattumik siunnersuuteqartoq taamatut saqqummiisimanera Siumuminngaanniit taperserlugu aamma uagut Inatsisartut Ataatsimiititaliaani suleqataassaagut taakkua piniartut aalisartullu atugaasa sapinngisamik pitsaanerpaamik aaqqiiviginissaat anguniarlugu.

Tassa uggornaraluarpoq uani oqaluttarfimminngaanniit oqarsinnaanani aana aaqqiissutissarput, imak ikkutta aaqqiissutigissavarput – taanna ajornartorsiuq imaannaanngitsuuvoq. Kisianni ajunngilaq suleqatigiilluta ataatsimiititaliami aaqqiissutissanik ujartuiniarumaarpugut neriusaangalu taakkua inuit pineqartut arlaatigut ikiorsernissaanik angusaqarumaarluta.

Per Berthelsen, Siulittaasuup tullia siulleq (S)

Tassa aatsaannguaq naliliininni allanngortoqarpoq, tassalu Inuit Ataqatigiit oqaaseqartuata nalunaarneratigut ataatsimiititaliami aamma isumagineqarnissaa taanna maanna kaammattuutigalugu, tassa pappialat ukua pigisakka tunngavigalugit itigartitsisoqaraluarami. Kisianni tassa amerlanerussuteqartut maanna ataatsimiititaliamut taaneqanngikkaluartoq sumut, taanna inissinniarsarissavarput ingerlateqqaerneqarnissaa aappassaaneerneqartinnani kaammattuutigineqarpoq.

Taamaallilu tassa immaqa oqaluuserinera naalisarsinnaassavarput – immaqa neruppunga, ataatsimiititaliami iluamik ingerlanneqaaqqittussaassammat. Kisianni maannamut suli tallimat oqaaseqarniarlutik nalunaaruteqarnikuupput. Siulliussaarlut siunnersuuteqartoq Hans Aronen, Inuit Ataqatigiit – takanna.

Hans Aronen (IA)

Qujanaq.

Siumup oqaaseqartuanut tunngatillugu oqaaseqassuunga, tassa soorunami qulequtaq pingaartipparput – qulequtaq eqqartorneqassooq aammalu inuaqatigiinni kikkut qulequettami uani pineqarnersut aamma ilaatinneqarmata, tassa pisimasut aamma kingumut qiviatsiarneqareermata Siumup oqaluttuaninngaanniit. Aamma nuannaarutigaara tassa partiini tamatta immikkullarissumik politikkeqarluta anguniagaqtarattaa taavalu aamma illuatungiliuttuugutta

imaluunniit suleqatigiittuugutta arlaatigut Naalakkersuisunit tigumiaqartuugutta aalajangiussimasaqartarluta.

Unali Siumuminngaanniit oqaatigineqartoq aamma uani massakkut qulequattami immaqa pineqaqqissaarsinnaanngikkaluartoq kisianni qanillillugu tassani tikinnejarmat, tassa ukioq manna Naalakkersuinermi tiguneqarsimasut aningasat 2 milliartit Nunatta pisuussutigigai, kisiannili massakkut suut tamaasa kattullugit Naalakkersuisooqatigiit sulinerarlugit taagorneqarnerat, ajuusaarnarpoq taamatut nipilimmik una oqaluuserisassanngortitara massakkut tikinnejarmat, taannalu nammineq Siumumi oqaaseqartoq tappikani akisussaaffigiumaaraa aamma uani oqallinnissatsinni uunga tulluartuusorinnginnakku annertunerusumik tikikkusunngikkaluarpala, kisianni tassa inuiaqatigiit massakkut atugaat aammalu ukua massakkut oqaluuserisassanngortitagut ukiuni arlalissuarni taamatut qaqinnejartuarsimasut sooq inuiaqatigiit ukioq manna Naalakkersuinikkut aningasaataat 2 milliardinik pisuussuteqarnerarlugit taaneqarsinnaassappat, siornatigulli ukua inuutissarsiutillit taamatut atugaasigut aaqqiisoqarsimanani.

Per Berthelsen, Siulittaasuup tullia siulleq (S)

Qujanaq, tulliulluni oqaaseqarumavoq Inuit Ataqatigiinni Peter Lyberth. Naamik oqaaseqartoq akissuteqaqqaassaaq.

Karl Lyberth (S)

Aap Nunatta Karsiata qanoq imaqartigneranut oqaaseqarminnut tassa patsisaavoq – pissutaavoq Inuit Ataqatigiit sinnerrlugit Inatsisartuni ilaasortap Peter Lyberth oqariartuuteqarmat Naalakkersuisut nutaat Nunatta aqulersimagaat Nunarput ajutuulernerarlugu oqaaseqarmat, taannaana illuatungilerniarlugu taakkua kisitsisit taagikka. Isumaqarama taamatut oqarneq nunarpunngooq ajutuulersoq – taanna ilumuunngitsoq, ilumuunnginneranununa upternarsiniarlugu taamatut kisitsisinik taakkartuisunga.

Una siunnersuuteqartumut eqqaasitsissutigilaassavara tassa Siumuminngaannit taanna siunnersuut tapersernitsinni ilaatigut patsiseqaratta, tassa maannakkut siunniuffigineqartoq qiviaraanni Naalakkersuinermut ingerlatsinermut pisussat pereersullu qiviaraanni, taakkoqqeqqissaat annertoorujussuarmik eqqorneqartussaagamik. Aappaagumut Aningaasanut Inatsisissaq qiviaannaraanniluunniit maannakkullu iliuuserineqareersimasut qiviaannaraanniluunniit

taakkoqqissaat inuit ilaanneeriarlutik ajornartorsiuteqareeqisut aamma eqqorneqariaannartussaagamik. Ilaatigut taaneqaannarsinnaavoq meeraqarunik, meeraqarpata atuarfimmilu atuarunik angajullerni atuartut aningaasanik pisartagaaruttussaapput atuarnermi tunngatillugu – assersuutaannaavoq taanna.

Taamaattumik taakkua aamma eqqorneqarneri suli ajornartorsiulerunissaat uani Naalakkersuisut ingerlatsinerini takusinnaagatsigu uani saqqummiinitsinni taavagut, taakku ajornartorsiutit pioreersut suli anginerulernissaat annilaangatigigatsigu.

Per Berthelsen, Siulittaasuup tullia siulleq (S)

Ja qujanaq. Tassa eqqaasissutigeqqissavara oqaluuserisassaq qulequtaqarmat, taassuma iluani oqallinneq pissasoq matumani kaammattutigeqqissavara. Suli sisamat oqaaseqarniarlutik kissaateqarnikuupput tamanna ataqqivara, kisianni maannakkuminngaanniit aqutsineq sukannernerusariaqassaaq suli oqaluuserisassat ullumikkut arfiniliummata.

Taamaattumik kaammattueqqissaanga oqaluuserisassatut siunnersuutip imarisaa aallaavigalugu oqaaseqarnerit ingerlanniarneqassammata. Tulliuppoq Peter Lyberth, Inuit Ataqatigiit, takanna.

Peter Lyberth (IA)

Aap naqqiissuteqalaaginnarniarlunga. Tassa Siumup oqaaseqartuata siunnersuutigineqartumut oqaaseqaamminni allassimasai aamma oqaatigisai, tassa taakkua uanga uparuaaffigivakka. Tassa aamma naqqilaassavakkit oqanngilanga Nunarput nakkaattuulersoq, oqartungaana Nunatta aningaasatigut nakkaattoorutigisinnaasaanik pisoqarsinnaanera aaqqinniarlugu suliaq siulleq Inatsisartut suliarisimagaat – taanna naqqiissutigiinnarpaa oqaaserinikuusara.

Per Berthelsen, Siulittaasuup tullia siulleq (S)

Qujanaq erseqqissaasumut. Naluara oqaaseqartoq akissuteqarniarnersoq.

Karl Lyberth (S)

Tassa naatsuararsuarmik oqaannassaanga oqalunninni oqaravit Nunatta ajutuulernera, taamatut oqaravit – ingerlaannavissuaq allakkakkuuna eqqaamagiga taamatut oqarnerit. Ajungilaq taanna assortuussutigissanngilarput, qularnanngitsumik naqitanngorluni arlaanni saqqummerumaarpooq -

taanna pingarnerunngilaq assortuussutigissallugu tassa pingarneruvoq una oqaluuserisarput aamma pingarneruvoq taakkua inuit pineqartut qanoq ililluta Inatsisartuninngaanniit ajornartorsiuleranni ikiorserneqarsinnaanerinik suleqatigiilluta ikioqatigiillatalu ataatsimiititalami, qujanartumik Inuit Ataqatigiinninngaanniit tapersorsorneqalertumik ataatsimiititalami ingerlanneqarnissaani tassani sulissaagut taakkua ikiorniarlugit aamma sapinngisamik pitsaanerpaamik angusaqarniarluta suliumaarpugut qanoq kinguneqarnissaa maannakkut oqaatigisinnaanngikkaluarlugu, kisianni qularnanngitsumik isumallualertitsivoq taamatut ataatsimiititalami oqaluuserisap ingerlaqqinera.

Per Berthelsen, Siulittaasuup tullia siulleq (S)

Qujanaq, tulliulluni oqaaseqarumavoq Inatsisartuni ilaasortaq Hans Enoksen, Siumut – takanna.

Hans Enoksen (S)

Qujanaq Siulittaasoq.

Tassa uani Siumup oqaluttuata saqqummiussamini pingartillugit illersugai piniartukkut aalisartukkormiut taakkua qujanartumik massakkut Inuit Ataqatigiiit aamma peqataaffigilerpaat ataatsimiititaliamukarnissaa, tassami pingaaruteqarluinnaqqissaarpoq ajornartorsiutit taakku uteqattaartuartut ataatsimoorullugit aaqqittariaqalerpagut ukiut tamaasa eqqartortuaannarsinnaanngilagut, illuatungiliuttuunerput allatullu Naalakkersuisooqataanerput taakku aporfigiunnaarlugit inuit ajornartorsiuteqartut taakku aaqqiiffingiarniartigit. Aamma ulluni makkunani inuuniarnerat ilungersunareeqaaq Avanersuarmi soorlu aaffattassaarutereerput aamma sumiiffit ilaanni qilalugartassaqanngillat.

Taava aamma kingusinnerusukkut aamma takkutissapput, ilaa ikiorsiinissaq annertoorujussuanngoriaannaavoq taamaammat una ataatsimoorfiginiartigu. Qujanarlu Hans Aronen uunga siunnersuutinnut peqataassaagut, takusinnaavarput aaqqiisoqartariaqartoq. Karl Lyberthilu qutsavigerusuppara uani uteriisernermigut ataatsimiititaliamukartussanngortimmagu.

Per Berthelsen, Siulittaasuup tullia siulleq (S)

Ja qujanaq. Maanna tulliulluni oqaaseqarumavoq Jens Immanuelsen, Siumut – takanna.

Jens Immanuelsen (S)

Qujanaq.

Uangattaaq soorunami siullermik siunnersuuteqartoq qutsavigerusuppara peqqutigalugu ileqquliutiinnakkanneratsigu maani aalajangerneqartussat suulluunniit inuiaqatigiinni pingaarutillit Atugarissaarnermut Akileraartarnermullu Ataatsimiititaliarsuarmut innersuutiinnartarlugit qaqpulu suliassaq naammassineqarnissaa oqaatiginagu.

Pingaarluinnarmat pingaartumik ukiut tulliuttut eqqarsaatigalugit Aningaasanut Inatsit qiviaraanni isorliunerusut piniarnermik annermik ingerlataqartut atugaasa aaqqiiviginiarneranni, minnerpaamik ataatsimiititaliami suliarineqarnissaa anguneqarmat uuma siunnersuutip. Qujanaq.

Per Berthelsen, Siulittaasuup tullia siulleq (S)

Ja oqaaseqartoq, takanna.

Karl Lyberth (S)

Naamik ajunngilaq tapersiinera taamatut tusaatissatut tiguunnassavara.

Per Berthelsen, Siulittaasuup tullia siulleq (S)

Qujanaq, tulliulluni oqaaseqarumavoq Jane Petersen, Inuit Ataqatigiit – takanna.

Jane Petersen (IA)

Ja Siulittaasoq isumaqatigaakkit aqtsineq sukannererusariaqartoq, kisianniuna illit oqaravit uagut inassuteqaatigisimagipput itigartinneqassasoq, taamaanngilaq. Naalakkersuisunujuna inassutigigipput suliassaq taanna ingerlanneqassasoq – isumaqanngilaq itigartitsinermik.

Taava Nunarput sorsuutigineqartarpooq aammalu oqallisigineqartaqluni Siumukkuninnngaanniit, Nunarpungooq aalisarnikkut piniarnikkullu ajorsignaluttiunnarpoq. Qujanaqaaq neriuuteqalersimagassi – qujanaqaaq suleqataarusulersimagassi – qujanaqaaq tikkuartuineq tunullugu suleqatigiinnermut tikilluaqqusinersi aamma uagut qujarutigeqaarput assorujussuaq. Isumaqlertoqarsimammat aap suleqatigiilluni Nunatta ajornartorsiutai piniarnermut aalisarnermullu tunngasut aaqqinneqarsinnaanngorsimammata.

Aamma Siumukkut oqaaseqartuat naggataatigut allaat aalajangiiffi geqataasinjaanagu oqaaseqaraluartoq, isumaqalermat suleqatigiinnikkut ajornartorsiutit aaqqinnejarsinnaasut. Qujanaqaaq taamatut isumaqartoqalermat.

Taavalu Akileraartarnermut Atugarissaarnermullu Isumalioqatigiissitaq taakkartorneqartartoq pisariaqarluinnalersimammat Akileraartarnikkut Isumaginninnikkullu ataqtigisaaakkamik ingerlanngittoqarnera patsisigalugu tamakkua siunnersuutigineqartartut tassunga aaqqissuussamut aaqqissuunneqarnissaat pillugu taamatut Inuit Ataqatigiinni isumalluarfigigippu aamma oqaatigineqareerpoq.

Taamaattumik-una suleqatigiinniartugut, taamaatumik-una suleqatigigitsigit tikkuartuineq allallu akisussaaffiit oqaaserineqartut piunnaarlugit suleqatigiinneq pillugu suleqatigiinnissarput manna aalajangiunneqarmat piniartut aalisartullu pillugut nuanneqaaq. Qujanaq.

Per Berthelsen, Siulittaasuup tullia siulleq (S)

Qujanaq, oqaaseqartoq akitinnagu tassa taalaassavara nalinginnaasumik Aqutsisoq toqqaannartumik oqaaseqarfingineqarneq ajormat uanilu tassa issuaaginnassaanga, imatut allassimammat naliliigama ’tamanna ataatsimiitaliamut ingerlatsinissamut pisariaqartitsisoqanngitsoq’ allassimammat ”Taamatullu oqaaseqarluta siunnersuuteqartup anguniagai aamma Naalakkersuisunit suliniutigineqalereersunut ilaatinneqassasut pingartinneqarmat naggataatigut oqaatigisinnassavara tamanna Inuit Ataqatigiit assorsuaq iluarisimaaratsigu”.

Taanna aallaavigalugu toqqamik taaneqanngimmat, tassa naliliigaluarpunga ataatsimiitaliamut ingerlatinneqarnissaa uani pisariaqartinneqanngitsoq.

Kisianni tassa ingerlaqqissaagut, suli sisamat apeqquteqartussaassapput. Kisianni siulliulluni oqaaseqartoq oqaaseqarsinnaatitaavoq.

Karl Lyberth (S)

Aap qujanaq.

Siullermik eqqaasitsissutigilaaginnassavara Inuit Ataqatigiit sinnerlugit Inatsisartuni ilaasortaq Jane Petersen saqqummiimmat una oqaluuserisarput pillugu, aperivara toqqavillugu Inatsisartut

Ataatsimiititaliaanut ingerlanniarneqarnera Inuit Ataqatigiit qanoq isumaqarfigineraat. Toqqavillutit akivarma tamanna Inuit Ataqatigiit siunertarinngikkaat, ingerlannianngikkat ataatsimiititaliamut – uaniillutit aperigakkit taamatut akivutit.

Taamaattumik qujanarpoq taassuma kingornatigut paasinnilluni Inatsisartut ataatsimiititaliaannut ingerlateqqinnissaa taanna maannakkut tapersersulerassiuk.

Taamak oqariarlunga oqaatigissavara Jane Petersen-ip saqqummiinera, tassa Siumut suleqataarunngilluinnartutut taakkartorlugu oqalunnera taanna ilumuunngitsutut oqaatigisariaqarpoq. Siumuminngaanniit suleqataarusoqaagut apeqqut sunaagaluarpualluunniit piniartunut tunngappata, aalisartunut tunngappata, meeqqanut tunngappata allanut aamma tamanut tunngappata soorunami suleqatigiilluta ajornartorsiutit takusinnaasagut aaqqinniassavagut. Partii apeqqutaatippallaarnagu ilaana suleqatigiittassaagut, ajornartorsiutit aaqqinniarneranut tunngatillugu.

Kisianni soorunami taamatut suleqatigiinnermik immitsinnut ammaffigereerluta, kisianni aamma imattoqartarpoq ilumut takusinnaagaangatsigu siunniuffik kukkusooq, ajortoq taava soorunami sakkortuumik uparuaasinnaavugut. Immaqa taanna paatsoorneqartarsinnaassaaq ilaanneeriarluni partiininngaanniit allaninngaanniit Siumuminngaanniit uparuaasaratta sakkortuumik – una siunniuffik ajormat.

Assersuutitut taaneqaannarsinnaavoq ilungersuutigisorujussuugaluarparput Siumumi meeqqani atuartut angajulliit pisartagaat peerniarneqarmata, inimut akiliutit qaffaniarneqarmata, ileqqaarutit meeqqanut tunngasut peerniarneqarmata. Taakkua atorunnaarsinniarneqarmata sakkortuumik Siumuminngaanniit – soorunami uparuartuivugut taanna siunniuffik kukkusutut isigigatsigu. Taamaattumik sakkortuumik uparuaasinnaaneq imaanngilaq suleqatigiissinnaassusermik peqannginneq.

Per Berthelsen, Siulittaasuup tullia siulleq (S)

Qujanaq, sukannererusumik aqutsinissara tusaatissatut tigullugu malissavara. Tassa suli sisamat oqaaseqarumallutik kissaateqarnikuupput taakkua oqaaseqartereerutsigit taavalu siunnersuuteqartoq oqaaseqarteriarlugu taava Naalakkersuisoq oqaaseqartissavarput aamma. Kisianni tassa suli sisamat

oqaaseqarumallutik qinnuteqarnikuupput, maanna tulliuppoq Aalisarnermut Naalakkersuisoq, takanna.

Ane Hansen, Alisarnermut, Piniarnermut Nunalerinermullu Naalakkersuisoq (IA)
Qujanaq Aqutsisoq apeqquteqarnissannut periarfissikkamma.

Tassa siullermik oqaatigeqqaarusuppara nuannaarutigakku piniartut aalisartullu sulinerminni, tassa inuutissarsiornermi atugaat pitsavallaanngitsut pitsangorsarnissaat siunertaralugu oqallinneq soqutiginartorujussuaq ingerlanneqarmat.

Uani tassa ernummatigileraluarakku saqqummiussissut pappiliaq malillugu Inuit Ataqatigiit kisimik ingerlaqqiffissatut innersuussuteqarmata, kisianni qujanartumik oqallinnerup ingerlanerani soqutiginninneq allanngorpoq.

Tassa uani Siumup saqqummiussissutaani pappilianngorlugu agguaanneqarsimasumi Hans Enoksenimit atsiorneqarsimasumi saqqummiussassami naggaserneqarami imannaq, issuaalaarsinnaavunga ?; ”aalajangiiffissatut siunnersuut saqqummiunneqartoq nassuiardeqaraluarluni inatsisitigut qanoq aaqqiisoqarsinnaaneranik imaqanngimmat Siumumiit aalajangiiffigisinnaanngilarput” issuaaneq naavoq. Tassa taanna naanera aamma innersuussinertaqannginnami ataatsimiititaliamut ingerlaqqinnissaanut tunngasumik, taanna nassuaateqarfilaarsinnaaviuk qanoq isumaqartinnerlugu taamatut allassimanerlusiuk ?

Per Berthelsen, Siulittaasuup tullia siulleq (S)

Qujanaq, kisianni tassa taanna apeqqutigineqarnikuovoq aamma akineqareernikuulluni, kisianni oqaaseqartup aqussavaa taanna nammineq akeqqikkumanerlugu – takanna.

Karl Lyberth (S)

Aap qujanaq.

Tassa siullermik oqaaseqarfilaassavara Aalisarnermut Naalakkersuisup oqaatigisaa taakkua pineqartut atugaat pitsavallaanngitsut, tassa ilumoorpoq – ilaanneeriarlutik pitsavallaanngillat.

Taamaaattuminguna Siumuminngaanniit ilaatigut paasisinnaanngikkippusooq taakkorpiaat suli eqqorniarneqarnersut. Tassa taakkorpiaat atugassarivaat arnarlunniarniarunik 1.500 koruuneeqqaarlutik, saarullinniarniarunik 1.500 koruuneeqqaarlutik, qaleralinniarniarunik 1.500 koruuneeqqaarlutik – tassa taakkorpiarpiaat aamma taakkununnga atuisuupput.

Taamaattumik oqalullunilu pitsaavallaanngitsut taakku atugaat saniatigullu atugaasa aamma ajorseriarnissaannut aalajangiisaqattaarneq taanna paasuminaappoq. Aamma pinngitsoornani ajornanngippat aaqqittariaqarluni.

Tassunga apeqqutinnut tunngatillugu ilumoorpoq, tassa taamatut allaqqavoq Siumumiit aalajangeeqataaffigisinnaanngikkippusooq, tassunga patsisaavoq aamma akissutigereeraluarpara tassunga patsisaavoq uani erseqqisumik siunniuffeqanngimmat ajornartorsiu sunarpiaq, qanorpiaq ililluta aaqqissanerippus. Ajornartorsiu una taaneqartoq angisoorujussuartut imaluunniit silitorujussuarmik aaqqiivigineqarsinnaanngilaq assigiinngitsut aaqqiissutaasinnaasut atorlugit.

Taamaattuminguna sunarpiarpiaq pineqarnersoq allaqqanngimmat maannakkut aalajangeeqataaffigisinnaanngikkippusooq, kisiannili siunnersuutigalugu piumasaralugulu ataatsimiititaliamut ingerlaqqissasoq.

Per Berthelsen, Siulittaasuup tullia siulleq (S)

Qujanaq. Tassa oqareernittut sisamat kiserngorummata maanna tassa pingasuinnanngorput. Maannalu tulliulluni oqaaseqarumasoq tassaavoq siunnersuuteqartoq Hans Aronen, Inuit Ataqatigiit – takanna.

Hans Aronen (IA)

Aap soorunami illuatungiliuttuulluni peqqutissaqarnartorujussuussooq arlaatigulluunniit tapitarluulligit oqaluttarfimmi oqalussinnaaneq. Una aatsaannguaq oqaatigisannut aammalu siusinnerusukkut apeqqutigissasaraluannut uanga ilangutinngitsuukkannut ilaatisavara, tassa sinerissap qanittuani aalisagassartassiissutinut atuinermi akiliuteqartarnissamut tunngatillugu ullumikkut tusagassiuutitigut takusinnaavarput Sisimiuni aalisartut, sinerissap qanittuani aalisartut umiatsiaararsorlutilu inuutissarsiuteqartut, mikinerusunillu angallatillit ukiumut ataasiartumik

akiliuteqartarnissaq taperseraat. Nuannaarpunga taakkua atuisut taamatut paasinnissimmaata, ajuusaarutigaaralu Naalakkersuinikkut aamma suleqatigut maani inersuarmi suleqatigut Siumukkut suli tassani paasinnissimanngimmata, taanna ajuusaarnartorujussuuvoq. Nammineerlutik taakku atuisut paasinnissimallutik nalunaaruteqarput uanilu oqariartuitigisaqattaakkassinni ilissi suli paasinninneq ajuleqqasusi, taanna ajuusaarnartorujussuuvoq.

Unali tikilaassavara aamma uani aamma oqaaseqarninni akissuteqarnissannut ilanngunnikuuara, kisianni Naalakkersuisup oqariartuitigisaani aamma Akileraartarnermut Atugarissaarnermullu Isumalioqatigiissitassap suliassai, soorunami taanna pissanganartorujussuuvoq aamma nuannaarutigisorujorujussuuara uanga uani siunnersuuteqarlunga taamak ittumik Naalakkersuisut siunniussaqarsimanera, taassuma suliassat ataasiakkaat inunnut, inuiaqatigiinnut sutigut inuutissarsiuteqarnera apeqquataatinnagut atugaasigut, taavalu aamma Akileraartarnermut Atugarissaarnermullu tunngasunik atugaasigut aaqqissuussilernissaa erinigisorujussuugakku, tassami taassumap suliassat tigooqqarpagit sukumiisumik suliaqartarnissaa qularinagu.

Per Berthelsen, Siulittaasuup tullia siulleq (S)

Siumup oqaaseqartua.

Karl Lyberth (S)

Tassa siullermik oqaatigissavara siunnersuuteqartoq paasiuminaatsilaarakku taamatut oqalunnera, tassa aalisartut aalisartinnatik akileeqqaartalernissaat taanna assut tapersensorit paasinarpooq aatsaannguaq oqalunninni, kisianni eqqaasitsissutigilaaginnassavara uani siunnersuuteqarninni allaputit, taakkua aalisartut piniartullu ajornartorsiuteqartarmata aamma ikiortariaqartarmata taamaattumik taanna ajornartorsiuq qaqikkit.

Eqqaasitsissutigiinnassavara aamma aatsaannguaq oqaatigivara, tassa taakkorpiaanuku eqqugaasussat akileeqqaartalerunik. Taakkununnga aalisalerunik saarullinnialerunik 1.500 koruuneeqqaarneq, arnarlunnialerunik – suannianniarlutik 1.500 koruuneeqqaarneq isumalerujussuuvoq, taakkununnga nalituvooq. Taamaammanuna taamatut akileeqqaartalernissamut tapersersuillutillu inuillu taakkooqqeqqissaat ajornartorsiuteqarneri pillugit siunnersuuteqarneri imminut ataqatigiippallaannginnerat eqqaasitsissugilaaginnarniarlugu.

Una Sisimiormiunut tunngatillugu – aap uangattaaq nammineerlunga tusaavara Sisimiuninngaanniit angallateerarsortut sinnerlugit oqaaseqartoq oqarmat, tunngaviatigut ajorinagu. Taanna arlalinnik paasineqarsinnaavoq, kisianni aamma tusarniarpara oqartoq taamatut saqqummiunneqartoq siunnersuut taamatut isikkoqartillugu akuerisinnaanagu, una tunngaviatigut pisaqarniarnermi aalisarnermi akileeqqaartalernissaq tunngaviatigut ajorinngikkaluarlugu. Aamma tassani eqqaavai soorlu assersutigiinnarlugu sunngiffimminni aalisartartut, sunngiffimminni saarullinniartartut, sunngiffimminni qaleralinniartartut aamma taakkua taamatut eqqusisoqassappat soorunami aamma taakkua eqqarsaatigineqartariaqartut aamma Nunatta pisuussutaanik atuisummata.

Per Berthelsen, Siulittaasuup tullia siulleq (S)

Tassa oqareernittuut maanna akuerineqartut oqaaseqarsinnaanermut marluinnanngorput, siulliussaaru Hans Enoksen, Siumut – takanna.

Hans Enoksen (S)

Qujanaq Siulittaasoq.

Siullermik Hans Aronsenimut oqaatigissavara uanga qanoq oqalussanerlunga maani illuatungiliuttutut Naalakkersuisooqatigiit ilaasortaatitai aperiartoqqaartussaannginnakkit. Uanga ilittulli maani pisinnaatitaaffeqarpunga aamma oqalunnissannut.

Uani Inuit Ataqatigiit isummaminnik allanngortitseriataarnerat Jane Petersen-ip allatut nassuiarniarsarigaluaraa aammalu Siulittasumut oqqassinera uanga isumaqatiginnginnakku uani issuaalaarusuppunga, tassanilu imatut allassimapput - issuaaneq aallartippoq; "Naalakkersuisut Akileraartarnermut Atugarissaarnermullu Isumalioqatigiissitamut pilersitsiniarnerannut ilaatisallugit tulluartuusut, taamaattumillu Isumalioqatigiissitap inerniliussassai inassuteqaatissaalu utaqqimaarneqarallassasut", issuaaneq naavoq.

Ersarilluinnaqqissaartumik tassani allaqqavoq, kisianni qujanartumik partiinni qullersanninngaanniit naalakkerneqarputit uani Siumup oqariartuutaat tapersissagut.

Taamaammat nuannaarutigaara illuatungiliukkaluarluta siunnersuuteqartup siunnersuutaa iluatinnarluinnaqqissaarmat taanna ataatsimiititaliami eqqartorneqartussangormat. Karl Lyberth qujanaq tassuuna annertuumik sunniuteqarputit.

Per Berthelsen, Siulittaasuup tullia siulleq (S)

Eqqaasitsissutigilaaginnassavara Inatsisartuni ilaasortat taagaangatsigit atii tamaasa taasassagatsigit. Taava tassa oqaaseqarniartuni akuerisaasut kingulleq tassaavoq Jens Immanuelsen, Siumut – takanna.

Jens Immanuelsen (S)

Qujanaq.

Ilaatigut uani erseqqisaaneriinnaassooq oqartoqarmat ilaatigut Siumut erseqqissumik isuminngitsoq, kisianni oqaaseqatigiit kingullerpiaat taakku atortut siornatungaani ima allaqqasoqarpoq, issuaavunga; ”neriuppugullu partiit Naalakkersuisuutaqartut kingusinaartigatik aaqqiissutissanik Inatsisartunut saqqummiussiumaartut, tassa Inatsisartut 2010-imni Aningaasanut Inatsisissaanut siunnersuummut suliaqernerat naammassinnginnerani” issuaaneq naavoq.

Taanna unnersuussutaavoq paatsuugassutigineqarsinnaanngitsoq 2010-mut Aningaasanut Inatsimmiluunniit qanoq aaqqiissuteqarnissaanut ilanngussisoqartoqarsimanngimmat aamma siunnersuuteqartup siunnersuutaanut Naalakkersuisut **akuerseqqisimatit** (Upernavimmiutut qanoq oqarnerpoq) inassuteqarmata, tassa taakku erseqqissaanerinnaapput.

Per Berthelsen, Siulittaasuup tullia siulleq (S)

Qujanaq, oqaaseqartumut taassavara oqaaseqartut kingulliit marluk qisuararfiginissaa pisariaqartinneqarpat uani immikkut akuersigama qarsutsisoorama.

Karl Lyberth (S)

Ajunngilaq tassa naatsuararsuarmik naggataatigut oqaatigiinnassavara siunnersuuteqartoq qujaffigissavara. Naggaterpiaatigullu oqaatigissallugu piniartut maannakkut aalisartullu taakkartoratsigit ajornartorsiutaannaavissuit taakkartoratsigit. Kisianni oqaatigissavara ukiuni 17-ini piniartuunikuugama – piniartuuneruna nuannersoq, inuuneq nuannersuuvoq ilaanneeriarluni immaqa ajornartorsiutit assigiinngitsut takkussinnaasaraluartut immaqa silamik patsiseqarluni imaluunniit arlaannik patsiseqarluni tamakkua ajornartorsiutit assigiinngitsut takkussinnaasaraluartut, piniartuuneq aalisartuunerlu nuannersuuvoq inuutissarsiutigissallugu.

Sila nuannersuusarpoq ilaanneeriarluni qatsungasorsuusarpoq ilaanni anorlertarpoq aallarfiunani imaluunniit aallalarluarluni ilungersunarsinnaasarpoq. Kisianni ilaanneeriarluni tassa ajornartorsiortiusarluarluni taamatut inuuneq piniartuuneq, aalisartuunerlu nuannersupilorusuuvvoq.

Per Berthelsen, Siulittaasuup tullia siulleq (S)

Qujanaq taamaalillatalu Siumup oqaaseqartua qutsavigaarpuit. Isumaqtigiissutigineqarpoq tassa ataatsimiititaliamut ingerlatinneqassasoq uanilu tassa uuma tunngavia aallaavigalugu tassa Ilaqutariinnermut Ataatsimiititaliamut ingerlasussaassaaq taakku periarfissaqarumaarpoq Aalisarnermut Ataatsimiititaliamut tusarniaasinnaanermut allatigullu attaveqarnissamut.

Puullaaqititsilaarpunga aatsaaginnaq oqarama puigorluinnarlugu suli partiit sinneqarmata oqaaseqartussat, taanna soorunami utoqqatsissutigingaarpala.

Maanna tulliulluni oqaaseqassaaq Demokraatit sinnerlugit Andreas Uldum, takanna.

Andreas Uldum (D)

Qujanaq.

Siunnersuut manna innuttaasut ilaannik ajornartorsiortunik - piniartunik aalisartunillu – misiginneqataalluni ikiueriarneruvoq. Siunnersuuteqartup pisortat ikorsiisarnerat pillugu peqqussutinik qasukkaaniarpoq, aalisartut piniartullu immikkullarissunik atugaqarnerat pissutigalugu pisortanik ikiorneqassagunik sukkulluunniit sulisussarsiariqeqarsinnaasariaqarnerat atuuttussajunnaarlugu.

Demokraatit paasisinnaalluarpaat, aalisartut piniartullu ajornartorsiulersinnaammata, tikkuartariaqarpapulli, aamma inuutissarsiortut allat ajornartorsiulersinnaasarmata. Taamaattumik isumaqarpugut, isumassarsiatsialaanngitsoq inuiaqatigiinni innuttaasut ilaannik ikiuiniarluni, pisortat ikorsiisarnerannut peqqussutinik qasukkaanissaq. Isumaqarpugut, pingartoq, inatsisit peqqussutillu assigiimmik inuiaqatigiinnut tamanut atuunnissaat.

Nunatsinni amerlasuut isumaqassagunaruartut ajorniarpallaartugut Demokraatini isumaqarpugut, aalisartut piniartullu inuussutissaqarumallutik ikioqqullutik pisortanut arlaleriarlutik

saaffiginnittarsimappata, taava inuit taakku eqqarsaatigisariaqarpaat piffissanngunnersoq allamik inuutissarsiummik nassaarniassalluni.

Demokraatit iluarisimaarpaat, Naalakkersuisut pilersaarutigimmassuk, Akileraartarnermut Tungiuinermullu Ataatsimiititaliarsuarmik pilersitsiniarlutik qilanaarpugullu, ataatsimiititaliarsuup taassuma inassuteqarnissaanut. Tamatuma saniatigut aamma nuannaarutigaarput, Isumaginninnermut Qullersaqarfik kalaallinut attuumasumik piitsuussuseq pillugu misissuimmat piariilersumik.

Neriuppugut upperalugulu, iliuutsit aqqutigalugit piffissami qanittumi qulakkeerneqarumaartoq, inuit ikinnerit pisortanit ikiorneqartarnissaat. Aammali naqissuserusupparput, qaqqumulluunniit Demokraatit politikkerilernavianngimmassuk, inuiaqatigiinni innuttaasunik immikkoortitsilernissaq.

Tamanna tunngavigalugu siunnersuut itigartipparput.

Per Berthelsen, Siulittaasuup tullia siulleq (S)

Qujanaq, maannalu tassa periarfissaavoq oqaaseqarumasunut. Siulliulluni oqaaseqarumalluni kissaateqarpoq Jens Immanuelsen, Siumut – takanna.

Jens Immanuelsen (S)

Qujanaq.

Demokraatit saqqummiussassinni aallaqqaataani oqaatsit atukkasi siunnersuuteqartup siunnersummi misiginneqataalluni ikiueriarneratut isigalusiuk, erseqqisumik una oqaatigissavara piniartuuneq, aalisartuunerlu aamma suliffiummata. Inuiaqatigiinni ullumi aningaasatigut pilersuisuusut pingarnerpaamillu Nunatsinni inuutissarsiutaasut.

Demokraatit saqqummiussassinni oqariartutigivarsi Demokraatit iluarisimaaraat Naalakkersuisut pilersaarutigimmassuk Akileraartarnermut Atugarissaarnermullu Ataatsimiititaliarsuarmik pilersitsiniarlutik, taassuma qaqgu naammassineqarsinnaanera ilisimaneqanngilaq – pilersinneqannginnami suli aamma nalunngisagut malillugit suliassai imak annertutigipput ulluni qaangiuttuni itigartitat tamarmik taassuma suliassaatut innersuunneqartarlutik. Ilimaginnginnakku

uanga immikkoortillugit pingaarnersiuilluni taassuma iluani sukkanerusumik suliarineqartussatut isiginnittaasoqartoqassasoq, suliluunniimmi ataatsimiitaliaq pilersinneqanngimmat.

Demokraatit qaqlugu naatsorsuutigaat taanna ataatsimiitaliaq suliaminik naammassisqarumaartoq ? uanimi pisariaqartitsineq piaarnerpaamik 2010-imi Aningaasanut Inatsimmilluunniit aallartitsisinnaasoq naatsorsuutigisariaqarmat. Peqqutigalugu piniarneq, aalisarneq qiviarutsigu annertoorujorujussuarmik kipusoortitaavoq ukiaq manna, nuna immikkoortui piniartoqarfisa aalisartoqarfisa eqqarsaatigalugit. pisariaqartitsineqarpoq taamaattumik ataatsimiitaliarsuarmik pilersitsinissaq utaqqinagu suliassap suliarineqarnissaa kaammattuutigaara.

Per Berthelsen, Siulittaasuup tullia siulleq (S)

Qujanaq, oqaaseqartoq.

Andreas Uldum (D)

Aallaqqaasiutigalugu eqqaalaassavara imaassinnaagami paasiuminaalaarsinnaasoq misiginneqataanermik allassimanera, paasinnilluni immaqa oqaaseq pitsaanerussimassagaluarpoq ikkusimagukku. Uanga oqaatsit atortakkanni imaluunniit taakku assigiittutut uannut isikkoqaramik.

Taanna Akileraartarnermut Inuulluarnissamullu Ataatsimiitaliarsuup suliai qilanaarluta utaqqivagut aamma siunnersuutissai aamma soorunami nalilerumaarpagut taamanikkussamut.

Per Berthelsen, Siulittaasuup tullia siulleq (S)

Qujanaq. Tulliulluni oqaaseqarumavoq Karl Lyberth, Siumut – takanna.

Karl Lyberth (S)

Qujanaq.

Andreas Uldum, Demokraatit sinnerlugit saqqummiininni ilaatigut allapputit ”taava inuit taakku eqqarsaatigisariaqarpaat piffissanngunnginnersoq allamik inuutissarsiummik nassaarniassallutik”. Tassa taamatut eqqarsariaaseq qanoluunniit taassallugu naluara, inoqatinik suusupaginninneruvoq, ataqqininnginneruallaarpoq inoqatimik taamatut eqqarsariaaseq.

Demokraatit tunngavimmikkut isumaliortaataat tassani aamma tassuuna erserpoq innuttaasut kisitsisaannartut isigalugit suliniarneq, soorlu naggataatigut oqaaseqarninni ilaatigut aamma oqarputit ”inuiaqatigiinnik innuttaasunik immikkoortitsilernissaq politikkerilernaviangnikkissi”. Tassa taassuma upternarsiinnarpaa innuttaasut kisitsisaannartut Demokraatininggaanniit isigineqartut aammalu taakkua piniartut aalisartullu oqarfingivasi allamik inuutissarsiummik nassaarniaritsi tassaniikkunnaarlusi.

Taamaatuminguna uanga nammieq inuttut paasisinnaarpianngikkiga assut eqqumiigigiga Demokraatit, Inuit Ataqatigiillu suleqatigiinnerat nalunnginnakku eqqarsartaatsimikkut inunnik isiginneriaatsimikkut assigiinngitsorujorujussuugaluartut – tassa taamatut isumaqarnikuugaluarama kisianni kukkusimassaguma kukkusimassaanga, ajunngilaq tassa qujanaq.

Per Berthelsen, Siulittaasuup tullia siulleq (S)

Oqaaseqartoq, takanna.

Andreas Uldum (D)

Uani erseqissaatigilaassavara aalisartut piniartullu tamarmik taamatut eqqaaneqanngimmata, tassa uku pisortanit ikiorserneqartuarlutik takusinnaagunikku inuit aamma nalilersinnaasariaqarpaat. Soorunami uagut kialuunniit sumi sulerusunnerat sumillu suliaqarusunnerat taanna apeqqusinngivipparput ataasinnguamilluunniit. Isummersornitik Demokraatit inuit kisitsisaannartut isigneri, taakku illit nammieq akisussaaffiginiakkit uanga ilisarisinnaannginnakkit.

Per Berthelsen, Siulittaasuup tullia siulleq (S)

Tulliulluni oqaaseqarumasoq tassaavoq Aningaasaqarnermut Naalakkersuisoq Palle Christiansen, Demokraatit – takanna.

Palle Christiansen, Aningaasaqarnermut Naalakkersuisoq (D)

Tassa ilumoorpa paasineqarpa Demokraatit imannak oqarunik aalajangersimasumik inuutissarsiutillit allanik tamanit inuutissarsiortunit sanilliunneqarsinnaasut, taamannak aningaasaqarnermut tunngatillugu sapinngisamik ilinniartariaqaratta taavalu iluamik aaqqillutik. Taava imannak tusaasinnaavara iniminngaanniit amerlasoorpassuit ilisimasaqarnerorusuttut Akileraartarnermut Inuulluarnermullu Ataatsimiitaliarsuarmi tassani aamma kikkut

inuttaassanersut, taava Atassumminngaanniit – tassa inuttassai tamarmik toqqareernikuupput aamma akuerineqarsimallutik.

Taava ullumikkut suleriaasissaat aalajangersarneqassaaq, tassa ullumikkuminngaanniit aatsaat aallartittussaavoq. Taavalu kaammattuutit ingerlaannartumik nalilersussavagut, taavalu suliatik naammassiivillugit suliarisimassavaat aappaagussamut. Taannaana ilisimatitsissutigilaaginnarniarlugu.

Per Berthelsen, Siulittaasuup tullia siulleq (S)

Tulliulluni oqaaseqassaaq Kristian Jeremiassen, Siumut – takanna. Utoqqatserpunga soorunami uani aamma apeqquteqarmat periarfissaqassaaq oqaaseqartoq qisuarialeqassalluni, takanna.

Andreas Uldum (D)

Qujanaq.

Soorunami aamma Nunatsinni ineriertornerput malittaralugu inuit amerlasuut allanut suliffinnut imaluunniit allanik suliffittaajortornissaat avaqqunnaviangnilarput. Uunga Akileraartarnermut Tunguinermallu Ataatsimiititaliarsuup sulilernissaa tusarlugu qiimmaallannartorujussuuvoq, taava imaassinggaavoq taanna apeqquterpassuarnik aamma sussaartitsijumaarloq apeqquterpassuarnut taanna qaquinneqartarmat ataatsimiinnerup nalaani.

Per Berthelsen, Siulittaasuup tullia siulleq (S)

Qujanaq, tassa oqareernittut tassa oqaaseqarniarluni kissaateqartoq tulliuttoq tassaavoq Kristian Jeremiassen, Siumut. Utoqqatserpungalu uani puyllaqititsigama.

Kristian Jeremiassen (S)

Siulittaasoq qujanaq.

Uani saqqummiussami maluginiarpara ilaatigut oqaaseq imaattoq atorneqartoq, issuaalaarpunga: ”Inuit taakku eqqarsaatigisariaqarpaat piffissanngunnginnersoq allamik inuutissarsiummik nassaarniassallutik” issuaaneq naavoq. Tassa piniartut aalisartullu, Inuit Ataqatigiit aammalu Kattusseqatigiit Partiiat suleqatigivaat tassa pissanganartippa aamma taamatut isumaqarnersoq piniartut aalisartullu tamaasa suliffeqartinneqalissasut.

Isumaqpunga aamma imminut pilersorsinnaaneq, taanna ukiuni makkunani anguniarneqartoq avataaniillu eqqussukkat annikillisarniarneqarneri eqqarsaatigalugu piniartut aalisartullu taakkua pisariaqartikkigut, tassa imminut pilersorsinnaanermut taakkua aqutissat annertunerpaartaraat. Taamaattumik Demokraatit aalisartunik aammalu piniartunik taamatut sullersitsiniarnerat taanna assorujussuaq eqqarsarnarpoq aamma isumaalliorneruvoq.

Aamma oqaatigineqartoq maluginiarpala inuit kisitsisaannartut taagorneqartut, isumaqpunga ukiaq manna ataatsimiinneq eqqarsaatigalugu taanna ersarissorujussusoq. Inuit kisitsisaannarmik naatsorsorniarneqarnerat pissusissamisuunngilaq. Inuk naleqarpoq aamma ataqqinassuseqarpoq. Taanna immaqa ilisarinerusinnaanerussavarsi Demokraatinngaanniit inuit kisitsisaannartut isiginiarneqarnerat oqaatigisarassiuk uani ataatsimiinnermi.

Per Berthelsen, Siulittaasuup tullia siulleq (S)

Oqaaseqartoq.

Andreas Uldum (D)

Ilarpasui akereernikuugakkit ukua akissavakka. Soorunami Inuit Ataqatigiit, Demokraatit, Kattusseqatigiit Partiiallu partiit assigiinngitsut pingasuurput – qujanaqaaq maluginiarsimagit taannartaa. Isummagut assigiinngittarput soorunami.

Aamma una imminut pilersornissaq apeqqusinngivipparput arlaannaatigulluunniit, taavalu oqalunnerit sullersitsiniaanerat taanna ilisarisinnaanngilara, aatsaannguaq aamma siuliani oqarpunga inuup kialuunniit sumi sulerusunnerluni sumillu suliaqarusunnerluni nammineq aalajangertarpaa. Taamaammat tunngavissaqartinngilara oqaaseq taanna annertunerusumik oqaaseqarfingissallugu.

Per Berthelsen, Siulittaasuup tullia siulleq (S)

Qujanaq. Taavalu tassa kingulliulluni oqaaseqarumalluni qinnuteqarnikuuvooq Hans Enoksen, Siumut – takanna.

Hans Enoksen (S)

Qujanaq Siulittaasoq.

Tassa uani oqaluttuarissaneq kingumut qiviaraanni piniartoqarsimannngippat nuna manna tunngavissineqarsimanavianngikkaluarpoq, taamanikkut piniartut orsuerutiminnik taamaallaat akileraartarsimapput inuiaqatigiinni aningaasalersueqataajumallutik. Taamaammat piniartukkunnut isiginnitaaserput massakkut ataqqinarnerusumik ingerlattariaqarparput tamatta. Aamma massakkut killiffik piniartukkunnut ilungersunartorujussuuvoq, killilersuinerit annertuut sukangasuut ingerlanneqarput. Neriuppunga taanna Naalakkersuisooqatigiit nalileqqilaarumaaraat inuit pineqarmata, kisitsisit aallaavigiinnarlugit inuit maani ingerlanneqarsinnaanngimmata.

Taavalu Demokraatit oqaaserisaanut issuaalaarniarpunga, Siulittaasoq ? issuaaneq aallartippoq; ”Aammali naqissuserusupparput qaqugumulluunnit Demokraatit politikkerilernavianngimmassuk inuiaqatigiinni innuttaasunik immikkoortitsilernissaq”, issuaaneq naavoq.

Tassa uani Siumup oqaluttuata Karl Lyberth-ip aamma eqqartoreerpai akuersissutinut 1.500 koruuninik aalisartunut piniartunullu akiliisitsisalernissaq, kisianni uagut saniatigooralugu piniartartut saarullinnialerutta, qaleralinnialerutta, saattuarnialerutta, nipsisannialerutta taamaallaat 50 koruuniinnaq akilertussaavarput akuersissummut. Allannguutissamik suli takusaqanngilanga massakkut Naalakkersuisunut ilaasortaq naaggaartoraluarpualluunniit. Ilaa illuatungaanut sammisariaqarluarpoq uagut nammassinnaanerunnguatsiaraluarparput 1.500 koruuneernissarput taavalu aalisartukkormiut 50 koruuniiginnarlutik.

Tassunga qanoq isumaqarpit assigiinngisitsilertussaavugut tessani. Uanilu politikkerinngilarsi assigiinngisitsilernissaq. Qujanaq.

Per Berthelsen, Siulittaasuup tullia siulleq (S)

Oqaaseqartoq.

Andreas Uldum (D)

Aallaqqaammut oqaatigilaassavara aalisartunut piniartunullu isiginnitaaserput uagut kusanartorujussuuvoq, ataqqivagut aammalu nuannaarutigisarpagut Nunatsinni taamak suliniuteqarlutik imaluunniit suliniuteqaaqataatigimmata.

Nassuaatilaassavakkit namminersortutut sulineq taavalu sunngiffimmi aalisariartarneq. Ilaa siornatigut aamma eqqartorpaa nammineq oqaaseqartartussi Karl Lyberth-ip namminersortutut

inisisimasartut piniartut amerlasuut, taavalu saniatigooralugu assigiinngissuseqarpoq tuniniartarlugit imaluunniit sunngiffimmi nammineq imminut pilorsorneq imaluunniit nioqqutignerlugit.

Per Berthelsen, Siulittaasuup tullia siulleq (S)

Qujanaq. Tassa naggataarluni oqaaseqartuussaaq Hans Enoksen, Siumut – takanna.

Hans Enoksen (S)

Imaanngilaq aamma piniartukkormiut aalisartukkormiullu tuniniagassaannavimminik piniartartut aamma namminneq inuussutissaminnik annertoorujussuarmik imminut pilorsorput. Uagut taakkuninnga ajornartorsiunnginnerungaarluta 1.500 koruuneernissarput soorlu nukissaqarfiginerussagipput taakkunanngaanniit. Illuatungaanut sammisumik Naalakkersuinikkut ingerlatsisoqarpoq, pissakinnerusut annertunerusumik akiliissapput pissaqarnerusut ajunngilaq akiliinikkinnerulaaraluarunik – taanna illuatungaanut saatittariaqarparput.

Demokraatit tessani neriuuppunga peqatigissagaatigut.

Per Berthelsen, Siulittaasuup tullia siulleq (S)

Qujanaq, oqaaseqartoq.

Andreas Uldum (D)

Erseqqissaatai tusaatissatut tigussavakka.

Per Berthelsen, Siulittaasuup tullia siulleq (S)

Qujanaq. Taamallu ililluta Demokraatit oqaaseqartuat qutsavigaarput ingerlariaqqissinnaalerlatalu maanna Atassutip oqaaseqartua, oqaaseqartuussaaq Siverth K. Heilmann – takanna.

Siverth K. Heilmann (A)

Kiisami qujanaq.

Inuit Ataqatigiit sinnerlugit Inatsisartuni ilaasortaq Hans Aronen matumani siunnersuuteqarpoq piniartut aalisartullu piffissap ilaanni inuuniarnikkut ajornartorsiuteqarnerminni pisortanit ikiorserneqarsinnaanerisa pitsaanerulernissaat sulissutigineqassasoq.

Atassummiit tupigusuutiginngitsuunngilarput piniarnermik inuussutissarsiuteqartut aammalu aalisartut piniarnermik allagartallit eqaannerusumik aningaasarsiorsinnaanerat siunertalarugu piniarnermut allagartamik peqarnissamik piumasaqaatit allanngortinneqarnissaannik siunnersuuteqarnerput itigarteriarlugu piniartut aalisartullu isumaginninnikkut ikiorserneqarnerunissaat matumani ujartorneqarmat.

Atassummit qularutiginngilarput piniartut aalisartullu isumaginninnikkut ikiorserneqarnissamut sanilliullugu aningaasarsiornikkut periafissat pitsaanerulersinneqarnissaannik toqqararusunnerussasut, taamaammat piniartunut aalisartunullu tunngatillugu naalakkersuinikkut iliuusissat pitsasut aammalu siunissamut siammasissumik isumannaarisut aqqtissiuunneqarnissaat Atassummit oqaloqataaffigerusunneruarpot.

Isumaginninnikkut ikiorserneqarnissamik aalisartut piniartullu allatulli pisinnaatitaaffeqarput, inatsisitigullu sinaakkutassat tunngavigalugit Nunatsinni kommunit sullisisussaapput, tamannalu naammaginartumik naammassineqartarsimangippat pissusissamisoorpoq qitiusumiiit kommuninut erseqqissaateqassalluni piniartunut aalisartunullu ikorsiinissamut tunngavait malillugit ingerlasoqartariaqartoq.

Taamatut naatsumik oqaaseqaateqarluta Atassummiit inassutigissavarput siunnersuut ilalerneqassanngitsoq taamatullu iluseqarluni aappassaaniigassanngortinneqassasoq. Qujanaq.

Per Berthelsen, Siulittaasuup tullia siulleq (S)

Ja qujanaq. Iniminngaanniit ataatsimiittarfimminngaanniit oqaaseqarnissamik kissaateqartoqanngimmat – nå teknikkikkut ajornartorsiulaarpugut, takusinnaavara Inatsisartuni ilaasortaq Hans Enoksen, Siumuminngaanneersoq kissaateqartoq oqaaseqassalluni – takanna.

Hans Enoksen (S)

Qujanaq Siulittaasoq.

Atassutip oqaluttua Siverth K. Heilmann isumaqtigaara oqaaseqarnerpit ilaani uani periarfissanik pitsanngorsaaniarnissamik ujartueqatigiinnissamik anguniagaqarneq, taanna ilumoorluinnaqqissaarpoq aamma qularinngiivippara uanga ilittulli aalisartut, piniartullu periarfissat pitsanngorsarneqarnissaanik ujartuerusunnerussasut isumaginninnermut allaffimmukarnissaminngaanniit. Taamaammat massakkut killiffit ilungersunartut qaangerniarnissaanut neriuppunga illuatungiliuttut ikioqatigiinnerulissasugut, tassa piniartukkormiut massakkut Avanersuarmi aammalu nunap sinnerani allani ajornartorsiorput, puisit amii akikillineqarnikuupput taavalu aaffattassaqanngillat, qilakukkat sumiiffiit ilaanni nungoreerput. Qaamat naammatsingajallugu qaleralinniaqquaanikuunngillat, sorparujorujussuarnik aporfissaqarput, kisiannili isumaginninnermut allaffimukaraluaraangamik periarfissinneqarsinnaanatik.

Taamaammat taakku oqilisarneqarnissaanut Atassut Siumullu neriuppunga assut tunuliaqtaassasut, tassami piniartukkormiunik illersuisarnerput taanna ilaatigut tusakuluutigisarparput kisianniuna piviusumik ilungersormata Siumumi uagut annertuumik illersorigut. Aamma illersortuaannarnikuuarpot allaat niaqorput akigingajassaallugu. Qujanaq.

Per Berthelsen, Siulittaasuup tullia siulleq (S)

Oqaaseqartoq, takanna.

Siverth K. Heilmann (A)

Ja qujanaq. Qujanaq Hans Enoksen, Siumut oqaaserisannut, uani saqquuminitsinni soorunami tunngavilersuutigaarput siunnersuuteqartup siunnersuutaa aammalu Atassumminngaanniit isummersuutigisarput ersarippoq uani oqallinneq, oqallinnermi maluginiarpara siullit Inuit Ataqatigiit, Siumut, Demokraatillu saqqummiineranni sivisuumik ilaatigut siullit utikulunneqaqattaartut. Ippigisara uaniippoq siunnersuut, tunngavilersugaq, partiillu oqaaseqaataat allangoqattaarlugit sulinerput ingerlatissappat taanna tukattutut isigivara.

Neriuppunga taamatut suleriaaseqalissanngitsugut, nalunngilara siunnersummut assingusumik suleriaaseqartoqassappat imaluunniit siunnersuuteqartoqarpat ataatsimiitaliami inassuteqartoqarsimappat, akuerineqarpallu allannguutaasinnaasumik siunnersuuteqartoqartartoq.

Kisianni Atassumminngaanniit qularutigineqassanngilaq Hans Enoksen-i oqarneratuulli piniartut atugaasa, aalisartullu sinerissami qanittumik periarfissaasa pitsangorsarnissaannut suliniuteqarluta tamatta eqeersimaarfigigutsigit ikiuisarnermut Hans Aronen-ip Inuit Ataqatigiinninngaanniit siunnersuataatut periarfissat annikinneerarsuussammata.

Eqqaamaneqassaaq 2006-imiugunarpoq peqqussut allanngortinneqarnikuuvoq imaluunniit nutarsarneqarnikuovoq, tassa periarfissaqareersoq. Kisiannili piniartut ikiorutsigit pisassaannik, soorlu aamma ippasaaninnguaq tusagassiutit aqqutigalugit tusarpara Inuit Ataqatigiinninngaanniit Harald Bianco Tunumi nannunniarnissamut tunngatillugu killilersuineq unitsikkallarneqarnissaa, Avanersuarmi soorlu Hans Enoksen-ip oqaatigisaatulli aamma aarrinik pisassinneqarnissamik nilliasut, tamakkua tusaaniarnissaanut Atassumminngaanniit kaammattuuteqarnissamullu piareersimavugut.

Per Berthelsen, Siulittaasuup tullia siulleq (S)

Qujanaq. Tulliupporlu oqaaseqartussani Andreas Uldum, Demokraatit.

Andreas Uldum (D)

Erseqissaanerinjaassagunarpoq oqaaseqartup siulima Hr. Hans Enoksen-ip oqaasiinut imatut nipeqalissannginnami aporfinnarnik uagut pilersitsiniaasugut, soorunami aamma iluarsiissutissanik imaassinjaavoq suleriaatsigut assigiinngitsuusut. Kisianni qilanaarpunga suleqatigiilluarnissatsinnut tamatta.

Per Berthelsen, Siulittaasuup tullia siulleq (S)

Naluara oqaaseqartoq qisuarialeqarniarnersoq. Taava ingerlaqqippugut, tulliulluni oqaaseqarumavoq Aqqaluaq B. Egede, Inuit Ataqatigiit – takanna.

Aqqaluaq B. Egede (IA)

Qujanaq.

Tassa saqqummiuneqartut tamarmik oqaaserineqartullu Inuit Ataqatigiinninngaanniit nuannaarutigivarput aalisarnikkut piniarnikkullu inuussutissarsiatip taamak pitsaatigisumik aaqqiiviginiarneqarneranut oqaluttoqarmat.

2007-imi aningasaqarnikkut ingerlatsineq pillugu Atassut, Siumullu Naalakkersuisuutitaqarnerata nalaani nalunaarummi imatut ilaatigut oqaaseqartoq issuaaviginissaa qinnutigilaarpa.

”Aningasaarsiornikkut allanut nallersuussinnaalernissarput angujumallugu Naalakkersuisuni arlalinnik suliniuteqalereerpugut, taamaammat siunissami suliassaq pingarnerit ilagissavaat inuussutissarsiutitoqatsinni soorlu aalisakkanik tunisassiornermi, aalisarnermi, piniarnermi nunalerinermilu sulisuuusimasut pisariaqavissumik inuussutissarsiutinut inerartorfiusunut nuuttariaqarneranni tapersersussallugit. Inuussutissarsiutillit nutaat tamakku matumanit eqqartukkagut tassaapput aatsitassarsiorneq, nukik annertooq atorlugu aluminiummimik tunisassiornermi kiisalu nunatta ernganik iluanaarniuteqarneq”.

Tassa imaaappoq aalisartut inuussutissarsiortermi allamut nuunnissaat taamatut politikkeqarneq maannakkut qimassimavisiuk imaluunniit qanoq sulinersi ingerlariaqqippa taassumap kingorna.

Per Berthelsen, Siulittaasuup tullia siulleq (S)

Oqaaseqartoq.

Siverth K. Heilmann (A)

Ja qujanaq apeqqutinnut Aqqaluaq B. Egede, Inuit Ataqatigiit. Atassut politikkeqarpooq ersarisorujussuarmik soorlu oqaatigisara piniarnermut, aalisarnermullu politikkeqarpugut qangarsuarli partiit aamma immersortaqaagut siunissami pitsaanerpaamik pinngortitap allanngorarfiquagaani naleqqussaasoqartariaqartarluni, taanna saneqqunneqarsinnaanngilaq politikkikkut sulinermi.

Minnerungitsumik aalisartut, piniartullu aamma tusaallugit. Uani illit apeqqutigisanni 2007-imi aningasaqarniarneq pillugu nalunaarusiami soorunami taanna nalunaarusiaq politikkikkut suleqatigisaq peqatigalugit nalunaaruteqarsinnaasarpugut aamma taanna uagut oqariartutigisimasarput qimarratigisinnaanngilarput.

Oqanngilagut piniartut aalisartullu nunamut pinngitsoorasi qaqigitsi, kisianni kaammattuinerit suliffisanut allanut ataavartunut Atassut peqataarsummat, aalisarneq inuutissarsiutit pingaarnissaata saniatigut nunami suliffit annertusarneqartariaqartut, ukiorpassuarni suliffissat

suliffigineqarsinnaanissaanut inuiaqatigut aalisartuuppata piniartuuppataluunniit peqataasariaqartut. Tassa aqqutissiuussineq, inuutissarsiorneq aalisarneq kisimi inuutissarsiutaanngimmat.

Kisianni oqaatigeqqiinnassavara aalisarneq piniarnerlu Atassutip uummateqarfigaa sakkortoqisumik, taamaattumik siunnersuuteqartoq aamma kaammattuinnassavara ilissi partiissinni nammineq oqariartutigisasi aammalu 100%-imik tapersersuinnginnermik imaqarmata imminut qanillattorsinnaaneq, siunnersuusiussagaanni tunngavilorsorluakkamik aamma siunnersuuteqarsinnaaneq minnerunngitsumillu ataatsimiititaliami naaperiarsinnaanissamik aqqutissiuussisinnaaneq pikkoriffiginerusariaqalerparput.

Per Berthelsen, Siulittaasuup tullia siulleq (S)

Qujanaq, tulliupporlu Jane Petersen, Inuit Ataqatigiit.

Jane Petersen (IA)

Qujanaq Atassutip oqaaseqartuanut saqqummiussaanut.

Eqqarsaatigaluguuna itigartitsinermut tunngaviunerpaasoq tassaavoq Atassutip siunnersuutaani aalisarnermut piniarnermullu allagartaqartarneq pillugu itigartinneqarsimanera taanna patsisaqaqataasoq.

Atassut isumaqarpa inuuniarnermi aammalu aalisarnermi atukkat qulaajarneqassasut, taakkua patsisaallutik aalisartut piniartullu aamma tessani equngassuteqartoqarmat, aalisartut piniartullu ajornartorsiataat aamma tessaniimmat – taakkua qulaajarneqarnissaat marluutillugit taakkua Atassutip isumaqarfigai imaluunniit aalisarnermut piniarnermut allagartaqarneq taamaallaat patsisigalugu taanna ajornartorsiut qaangerneqarsinnaasutut isigigamikku ?

Per Berthelsen, Siulittaasuup tullia siulleq (S)

Oqaaseqartoq.

Siverth K. Heilmann (A)

Ja qujanaq apeqqutinnut Jane Petersen, Inuit Ataqatigiit. Uani ilumoorputit saqqumiinitsinni Atassumminngaanniit piniarnermut allagartaqarnermut tunngassuteqartut piniartut ikiorserniarlugit

siunnersuuteqarsimasugut innersuussuteqarpugut, taanna kisianni pinngilarput. Itisilerutaasumik oqarpugut piniartut aqqutissiuunneqartariaqartut piniarsinnaasaannik killilersugaappata aammalu pisasseqqinneqarsinnaanerannut tunngassuteqartut paaseqatigiisummik tamakkua aqqutissiuunneqartariaqartut.

Qilalukkat assersuutigineqarsinnaapput, nungukkaangata pisasseeqqikkaangatta illuatungiliuttut taamanikkut nilliarsuaartarput isornartorsiorneqarluta. Kisianni pisasseeqqikkaangatta annerusumik nilliasoqarunnaartarpoq, kisianni ilikkaannagassaq aana Nunatsinnut pisassiissutaasut piniartut iluaqtigisassaat aningaasarsiornissaminni nunguttariaqarput, nungunnissaata tungaanut imaanngitsoq ukua-ukulu illoqarfikkaarlugit nunaqarfikkaarlugilluunniit kisimik pisai nungupputa tassa univillutik unissasut.

Pinngortitap aquuttaaatigut, aquuttaaatigut ukiorpassuarni. Aalisakkat tammakarsimaneri misigisaqarfigipilussimavarput massakkut qummut aallariartortoqarpoq, siunnersuutit assigiinngitsorpassuit maanngaanniit saqqummiussuunneqartartut isumaqarpunga pikkoriffigineqarnerulerteriaqartut siunissamut qaamasumi isumalluarlunilu qanoq aaqqissuussisinnaanerput eqqumaffigalutigu.

Siunnersuuteqartup tunngavilersuutai isumaqarpunga uani naalakersuisuutitaatalu akissutaa ersarissut peqqussuteqareerpoq ersarissumik piniartut pisinnaatitaaffeqarput ikiorneqassallutik, allatut naalakersuisooqatigiinni allatut iluseqartumik ataatsimiititaliami peqataarusuppata Atassut peqataassaqqaarpoq. Kisianni taamatut ingerlaaseqarneq tukassaqaaq siunissami ingerlajuassagutta taamatut.

Per Berthelsen, Siulittaasuup tullia siulleq (S)

Qujanaq, tassa eqqaasitsissutigeqqissavara tassa una oqaluuserineqartoq ingerlariaqqittussanngorlugu aalajangjunneqareerpoq, taamaattumillu aamma oqallinnerit annertuut suli periarfissaqarumaarput. Taamaattumik ullumikkut suli oqaluuserisassat arfinillit amigaatigigatsigit maannamut naqitsisimasut sinneruttut tallimat oqaaseqarteriarlugit naggataatigut partii oqaaseqartussaa kingulleq oqaaseqartissavarput.

Tulliulluni oqaaseqarumavoq Hans Aronsen, Inuit Ataqatigiit siunnersuuteqartuusoq – takanna.

Hans Aronsen (IA)

Aap qujanaq Siulittaasoq.

Atassutip oqaaseqartuanut Siverth K. Heilmann-imut apeqqutigeeqqaassavara sutigut Inuit Ataqatigiinnngaanniit sutigut siunnersuutigineqartut ukua pillugit taavalu aamma ullut kingulliit piniartunut tunngasut aalisartunullu tunngatillugu sulianut tunngasut 100%-imik nammaqtigiaqutut taanerai, taavalu aamma aalisakkat qummut aallariartornerarlugit massakkut oqalupputit. Aap ilumoorsimappat sooq massakkut sinerissami aalisarnikkut inuutissarsiorneq piffit ilaanni taamatut atugarliorfiutigiva ? tassa inuutissarsiorniarnikkut tulaassuiniarnikkullu periarfissalutsigiva ?

Per Berthelsen, Siulittaasuup tullia siulleq (S)

Oqaaseqartoq.

Siverth K. Heilmann (A)

Ja qujanaq siunnersuuteqartoq. Illit siunnersuteqarninni Naalakkersuisup akissutaa Atassutip isumaqtigaa uanilu peqqussuteqareerpoq aalisartut piniartullu ajornartorsiuteqarunik allatuulli innuttaasutut pisinnaatitaaffeqarput.

Taamaattumik aatsaaginnaq oqaatsikka innersuussutigeeqqiqinnassavakka aalisartut piniartullu atugaasa pitsangorsarnissaannut oqaaserpassuit maani inimi atorneqartartut, paaseqatigiiffingineqarnissaa siunertaralugu periarfissiinerunissamik oqariartutikka uteqqissanngilakka piniakkanut tunngasut, aalisakkanut tunngassuteqartut eqqumaffigisariaqarpagut aamma tunisassiortut – illit oqaatigerusutatit tunisissassiorfiit eqqumaffigisariaqarpaat pisuussutinik ulikkaarpagut, immamit qaqinnejqarsinnaasunik.

Tamakkulu periarfissat atorluarutsigit Nunatta aningaasarsiorneranut suliffissaqarnikkullu iluaqtigisinnaavagut.

Siumut ilaatigut oqaaseqartuata tikissimasai assigiinngitsut malugalugu qaangiutereersut ilaatigut Aalisarnermi inatsisissami suliaqarnermi ippigisimasa aamma Atassutip, Naalakkersuisooqatigiit ersarissorujussuarmik allannguisoqarnissaanik siunnersuuteqassappata Atassut peqataassaappaqarpoq.

Kisianni illit siunnersuuteqarnikkut erseqqissumik isummerpugut, tassa allatut ajornartumik taamatut suleriaaseq ippoq kisianni aqqutissiuussinissamut Atassut isumassaarunnavigianngilaq. Qujanaq.

Per Berthelsen, Siulittaasuup tullia siulleq (S)

Tulliupporlu Finn Karlsen, Atassut – takanna.

Finn Karlsen (A)

Qujanaq, siuliani oqaaseqartup oqaatigisaani Aqqaluq B. Egede oqaatigisaani erseqqissaateqalaarniarlunga, tassani apeqquataavormi kisianni erseqqissaatigilaartariaqaraku isumaqarama pisariaqartoq.

Inuit Ataqatigiit Naalakkersuisooqatigigallaratsigit siullerpaarpaalluni taanna apeqquut saqqummiuppa ammasumillu uanga assortornikuura Naalakkersuisutut aamma oqaluttarfik pinnga atorlugu. Aamma tamatuma kingorna saqqummeqqimmat Naalakkersuisuunerma nalaani aamma assortorpara taanna. Taamaattumik Atassutip taanna piliarinngilaa, kisianni pisuutitsinianngilanga allanut.

Kisianni oqaluttut ilaaniit nuannarineqarmat aalisartunngooq paasinnimmata 1.500 koruunimik akiliisalernissamut, taanna uanga aamma nammineq tusarnaarpara isiginnaarlugulu – radio tusarnaarpara, kisianni taamak toqqaannartigisumik tapersinngilaa. Aamma ilisimanerpaa assagiarsunniassaguni, saarullinniassaguni, suanniassaguni, qaleralinniassaguni 6.000 kr. akilissagamiuk. Taanna siunnersuutaavoq, taanna ilisimanerpaa taakku aalisartut taamatut oqaramik, tassa imaappoq 1.500 koruunimik akiliisaqattaassaapput assigiinngitsunut taakkununnga.

Taamaammat isumaqarpunga – soorunami uagut taanna akerlerilluinnarparput taamatut imaattorneqarnissaa, qujanartumillu aamma Naalakkersuisoq naaperiaaffeqarniarluni oqaluppoq ataasiaannartumik akiliisarsinnaanissaq eqqarsaatigalugu taamatut isumakannersumik.

Kisianni uani pingarnerpaatippalput uagut aalisartut piniartullu periarfissaqarsinnaanerat allanik, soorlu ippassaaninnguaq siunnersuuteqartugut aalisarnermik piniarnermik ajornartorsiuteqarunik

periarfissaqarunik suliffissani sulilaarallarlik, aningaasarsiorsimanertik pisaminnik isertitatik qaangerlugit pissarsigaluarunik annaasaqarnatik – periarfissaarutiivikkunik inuttullu allatut periarfissaqarput ikiorneqarnissaminntut inatsiseqarpoq 2006-imili pilersinneqartumik, tassa taannaana pigipput.

Imaaginnassanngilaq ullumikkut aalisarsinnajunnaaramat piniarsinnaajunnaarama socialimukassaanga, periarfissamik allamik ujarliutilaartigit ikiorlugit – tassa pitsaaneq. Qujanaq.

Per Berthelsen, Siulittaasuup tullia siulleq (S)

Akissuteqartussaq, takanna.

Siverth K. Heilmann (A)

Ja qujanaq Finn Karlsen ilassuteqarninnut. Uani ersarissaatigiinnarusuppara soorlu ersarissumik taannginnakku aatsaaginnaq Aalisarnermut Inatsisissap suliarinerani Atassumminngaanniit uparuartuisimavugut aamma ippigisaqluta paasiumasaqlatalu, ilaatigut aatsaaginnaq eqqartorneqartunut akiliisitsisoqartarnissamut tunngassuteqartunut. Sulinissami tamakkua peqqissaarullugit pingaaruteqarluinnarpoq ataatsimiititaliami suliarineqarnissaa aamma taamaattoq ikiorumaarpagut. Inatsisiliortariaqaratta aamma innuttaasut oqarfigissagutsigit imatut akiliuteqartariaqarpugut paatsuunganangitsumik tusarlertariaqaratsigit taanna pingarnerpaavoq.

Uteqattaarneqareeqimmata taakkua annertunerusumik itisilissanngilakka.

Per Berthelsen, Siulittaasuup tullia siulleq (S)

Qujanaq. Oqareernittut tulliuppoq Aqqaluaq B. Egede, Inuit Ataqatigiit – takanna.

Aqqaluaq B. Egede (IA)

Ja qujanaq. Tassa oqaatigeqqissavara Inuit Ataqatigiinni nuannaarutigigatsigu maannakkut Naalakkersuisut, aalisarnermut piniarnermillu inuussutissarsiuteqarnerup pitsangorsaavigalugu piujuarnissaa qulakkeerniarlugu aaqqissuimmata.

Taamaammanuna siullermik apeqquteqaatigisanni apeqqutigigiga taamatut
Naalakkersuisooqatigiinnerminni Atassutikkut Siumullu oqariartuuteqarnikuunerat, tassa

aalisarnermut piniarnermullu inuussutissarsiuteqartut inuit 1.000-1.500 amerlassusillit aatsitassarsiornermut nuutinnejarnissa siunnerfiginikuummassuk. Taavalu uagut maannakkut suliniutitsinnut taanna assortuummat. Ilaa aalisarnermut piniarnermillu inuussutissarsiuteqartut nuutinnejarnissaat suli politikkikkut siunnerfigineqarpa imaluunniit allanngortinnejarnissaat ? taannaana paaserusukkiga suli isuma taanna attanneqarnersoq.

Per Berthelsen, Siulittaasuup tullia siulleq (S)

Oqaaseqartoq.

Siverth K. Heilmann (A)

Ja qujanaq. Piujuartitsinissaq Atassumminngaanniit pingaartillugu oqaatiguartarpalput. Inatsisartuni sulinitssinni manna tikillugu aamma nutaamik taanna erseqqissarusupparu.

Aqqaluaq B. Egede Naalakkersuisuusimasut sinnerlugit massakkut maani oqaluttarfimmuinngilanga, oqariartutigisimasarput inuutissarsiutit siuarsarnissaannut – imaani inuutissarsiuteqartut piniartuuppata sulisinnaanerat imaluunniit periarfissaasa pitsangorsarnissaanik oqariartuuteqartuarnerput taanna allanngortissinnaanngilarput oqareeratta taamatut.

Aammalu allanngortissinnaanngilara imatut oqarama; kikkulluunniit aalisartuugunik piniartuugunilluunniit nunami suliffissanik periarfissanik namminneq ujartuisinnaanerat periarfissamik atuisinnaanerat mattunneqanngimmat, pinngitsaaliissutaanngimmat – taanna paasilaaruk – pinngitsaaliissutaanngimmat nammineq qinigassaqtariaqarput uagununa Naalakkersuisuusimasuni aqqutissiuussisimasugut, ukiorpassuarni suliffissanik ataavartunik pilersitsinissamik, tamakku ilagiinnarpaat periarfissaarunnermi aamma inuusuttut suliffissaminnik nuttarsinnaanermullu atatillugu aqqutissiuussineq isumaqarpunga torrallataasoq kisianni aamma iluarsisassaqarpugut Naalakkersuisunngortunut aamma massakkut iluarsiagaat uagut uparuartoreersimasarput nuttartitsiniarnermut tunngassuteqartoq.

Per Berthelsen, Siulittaasuup tullia siulleq (S)

Qujanaq. Tulliupporlu Kim Kielsen, Siumut – takanna.

Kim Kielsen (S)

Siulittaasoq qujanaq.

Uani partit oqaaseqartartuasa ilaanninngaanniit Aqqaluaq B. Egede-minngaanniit oqariartutigineqaqattaartut 2007-imi saqqummiunneqartut politikkikkut oqariartututinut tunngatillugu – aningaasaqarnermut oqariartuummut tunngatillugu.

Miserratigineqarsinnaanngilaq naqitaavoq pisut 2007-imi tassa taamatut pissutsit ippu aammalu takorluuisimapput taamanikkut Naalakkersuisooqatigiit aatsitassarsiorneq aamma siunissami kikkunnut tamanut piniartunuinnaanngitsoq periarfissiissasoq suliffinnik nutaanik pilersitsissalluni.

Taanna nutaarsiassaanngilaq, qanoq tupinnartuliatut takorloorneqarsinnaanngilaq taannartaa. Piniartut atugarisaat massakkut Atassutip oqaaseqartartuata arlaleriarluni ersarissarpaa silap pissusaanik tunngatillugu massakkut sunarpassuarnik nalaataqarput. Sikusarneq allanngornikooqaaq, silarlukkajunnerulerpoq sunarpassuit uagut sunniuteqarfingisinnaanngisagut pisoqarpoq. Nunarsuarmioqataasut amminik pisiumajunnaarnerat annertunerusumik uagut iliuuseqarfingisinnaanngilarput ikippallaarnerput tunngavigalugu. Sunarparparssuit peqquaallutik massakkut tessani aningaasarsiornermut tunngatillugu piniartunut atugassarititaasut ajornartitsilernikuupput.

Taamaattorli piniartukkut kiffaanngissusertik taanna pigiuarlugu neriuuteqartuaannarlutillu politikkikkut arlaatigut aaqqiisoqarsinnanera taanna siunnerfigaat.

Taamaammat massakkut siunnersuuteqartoq taanna Inuit Ataqatigiinneersoq Hans Aronsen-ip Siumuminngaanniit tassa oqariartuuterput tassa suleqataafffiginiarparput aamma neriuuppunga uani ataatsimiititaliami Rasmus Ole Rasmussen 2005-imi piniartutut oqariartutigisimasai misissuisimanera taanna sakkussatut atorumaaraat. qujanaq.

Per Berthelsen, Siulittaasuup tullia siulleq (S)

Oqaaseqartoq.

Siverth K. Heilmann (A)

Ja qujanaq Kim Kielsen, Siumut ersarissaateqarninni. Ja naqitanngorsimanera taanna atuarneqarsinnaaneralu allanngortinneqarsinnaanngilaq aamma qanoq paasineqarnera aammalu uani qanoq Atassumminngaanniit oqariartuutigisakka aamma anngaagavit naatsorsuutigaara paaseqqissaarit aalisartut piniartullu periarfissaarunnerminni, periarfissaqareernerat inunniq isumaginninnikkut peqqussut atorlugu ikiorserneqarsinnaanerat aammalu nunami suliffissatigut sukkulluunniit periarfissaqarsorilerunik aamma suliffissaminnik aallamik qaqlisoqarsinnaaneri.

Assersuutitut taaneqarsinnaavoq aatsitsivissualiortoqarnialermat isumalluartoqarpoq aamma aalisartuinngaanniit, peqqutigalugu tunitsivitsigut allatigullu aningaasarsiornikkut aalisarnerup iluani piniarnikkullu ajornartorsiortoqarmat. Nammineq aamma aningaasarsiorusukkamik pilersugaqaramillu nunami suliffissaminnik immaqa isumalluarnartumik takusaqarput.

Tamakkua isumaqarpunga ilassilluartariaqarigut piniartuugutta aalisartuugutta imaluunniit nunami suliffeqartuugutta, pingarnerpaavoq suliffimmik namminerlu sulisinnaajumalluta tigusaqarnissatsinnut.

Nammineq nalaatarisimavarput aamma aalisakkat tammakarnerisa nalaani aningaasarsiornitsinni ajornartoorujussuarnerput nammineq aggerfigisimasatsinni taanna nalaassimavarput. Kisianni ikioqatigiinnitsigut innuttagut peqatigalugit makeqqinniarsimavugut akiitsugarsuagullu Namminersornerusunut akilerneqarnikuupput. Suleqatigiinneq ammasumik angusaqarfiusarpoq aamma Inatsisartuni aamma taamatut sulissaagut.

Per Berthelsen, Siulittaasuup tullia siulleq (S)

Qujanaq, tassa oqaatigeriikkattut oqaaseqarumasut akornanni kingulleq Inatsisartuinngaanniit oqaaseqartissavara Hr. Hans Enoksen, Siumut kisianni oqaatigilaassavara immikkut illuinnartumi Hr. Finn Karlsen-ip Aalisarnermut Naalakkersuisumut toqqaannavissumik oqariartuuteqarnera aamma naalaartunit soqtigineqarlunilu naalaarneqanngitsoornaviangimmat taanna immikkut illuinnartumik akuerigakku minuttit marluk akineqarnissaa.

Kisianni tassa tulliuppoq Hr. Hans Enoksen, Siumut – takanna.

Hans Enoksen (S)

Qujanaq Siulittaasoq.

Atassutip oqaluttua Siverth K. Heilmanni kaammattussavara inussiarnersumik una siunnersuut soqutiginarmat ataatsimiititaliamut ingerlanneqarnissaa Atassutip peqataaffigisinnaappagu assut ataatsimoornermik aamma takutitsissagaluarmermat.

Ilaatigut pisuussutinik uumassusilinnik ajornartorsiorneraallutik sumiiffinni oqalunnera taanna ilumuunngilaq, Hans Aronen-i oqaaseqarnermini oqaatigisai. Pisassaqarpugut naammattunik aamma killilorsorneqarput aamma karseqarpugut – karsilersuinikuuvugut sinerissami aalisarfigineqarsinnaanngitsunik. Tunumi massakkut karsiliinikuuvugut saarullinniarsinnaanngillat, taanna pissutigalugu kujataani suliffit matuneqarput pisassaqarluartut uffa illuatungaani Islandimut killingani aalisartut, ilaa taakku allanngortilaarniartigit aamma ataatsimoorukkutsigit artornaviarananngilarput.

Tassa ukua 1.500 koruunimik akiliisarnissaq taanna takusinnaavara uanga kisitsinera malillugu aalisartut 2.400 missaaniippata 1.500 koruuniuppatalu, taava 360.000 koruunit missaannaanni isertinneqartussaapput, kisianni Aningaasanut Inatsimmiipput 2,1 mio.kooruuninit taakkunanngaanniit isertinneqartussat, nikingavoq taamaammat takusinnaavara tassa immikkoortunut tamanut akiliisaqattaartitsinissaq siunnerfigineqarsimasoq.

Taavalu aamma Aqqaluaq B. Egede-p oqaaseqarnera una nalunaarusiaq pillugu. Tassa taamanikkut Inuit Ataqatigiit aningaasarsiornermut Naalakkersuisuutitaata taanna oqariartuutaa pimoorussimannguatsiarassiuk massakkut aatsitassarsiornissaq kujataani allaat soriarsinnaajunnaavillugu mattupparsi – taanna ajuusaarnarpoq, uffali kujataani inuutissarsiornikkut periarfissat massakkut killeqartorujussuusut. Taanna eqqarsaatigeqqilaarniarsiuk partiissinni. Qujanaq.

Per Berthelsen, Siulittaasuup tullia siulleq (S)

Ja tassa iluaqutaanngilaq massakkut oqaaseqarniarluni nalunaarneq, nalunaarutigereerpara kipineqassasoq, kisianni aamma immikkorluinnaq ittumik tassa Aalisarnermut Naalakkersuisoq akissuteqarsinnaanera Hr. Finn Karlsen-ip oqaaseqaataanut ammaatissallugu neriorsuutigereerpara, kisianni massakkut oqaaseqartumut kingullermut oqaaseqartoq qisuarialteqarumassaaq. Oqaaseqartoq.

Siverth K. Heilmann (A)

Qujanaq Hans Enoksen, Siumut.

Aap piniartut aalisartullu piffissap ilaani inuuniarnikkut ajornartorsiulernermini taannartaa tikillugu siunnersuuteqartoq siunnersuuteqarpoq, kisianni pisortanit ikioriisarnermut tunngassuteqartoq erseqqissorujussuarmik periarfissaqareernera Atassutip itigartitsinera taanna aalajangiusimavarput, allanngortissinnaanngilara.

Kisianni piniarnikkut aalisarnikkullu ajornartorsiuteqartoqarnera aqqutissiuussiumaleqinitssinnillu oqalunnerput – Enoksen oqariartuutikka tusaassagukkit apeqqutigisannut atatillugu, ataatsimiititaliami tamakkua piumassuseqarfingineqarpata oqareerpunga Atassutip tunuarsimaarfiginiavianngikkai.

Umiatsiaararsortut aalisartullu atugaasa aammalu aalisarnermut inatsisisamut aarleqqtigisatsinnut Naalakkersuisooqatigiit paaseqatigalugit qanillattortoqarsinnaappat Atassutip – ilaana tassunga isumaqarpunga nangaanngiivillunga taanna akuersaarsinnaallugu oqariartuutigissallugu, kisianni iluaquutanavianngilaq tamakkua allannguiteqalaarsinnaanissamik siunnerfeqarniartoqanngippat iluaquutanissaa qularaara, kisianni misilikkaluariartigu.

Per Berthelsen, Siulittaasuup tullia siulleq (S)

Ja qujanaq, taamaalilluta Atassutip oqaaseqartua qutsavigaarpus. Kisianni tassa oqareernittut immikkorluinnaq ittumik Aalisarnermut Naalakkersuisoq minuttit marluk iluini oqaaseqarsinnaatillugu akuersaarpara – takanna.

Ane Hansen, Aalisarnermut, Piniarnermut Nunalerinermullu Naalakkersuisoq (IA)

Aqutsisoq qujanaq.

Tassa erseqqissaateqassallunga pisariaqarsorigakku oqaaseqarnissara kissaatigivara, tassa atuisut akiliissuteqartalernissaannut tunngatillugu uani oqaatigineqaqattaartut eqqunngimmata, tassa oqaatigissavara umiatsiaaqhat immikkut atuisut akiliuteqartalernissaannut tunngatillugu oqallinnerup nalaani isumaqatigiissutigineqarpoq immikkut taakku pineqassasut, aaqqissuussiffigineqassasullu. Taamaattumillu Naalakkersuisuninngaanniit uagut iluarsiissutissamik

allanngutissamik tunniussaqareerpugut Aningaasanut inatsisip pingajussaaneerneqarnissaata tungaanut.

Taava oqaatigerusuppara una Naalakkersuisuni massakkut ilumoorpoq aallaaviginikuugaluaratsigu Naalakkersuisut siulitta, tassa Hans Enoksen-i Siulittaasuunerata nalaani aamma Finn Karlsen-ip Aalisarnermut Piniarnermullu Naalakkersuisuunerata nalaani taakku siunnersuataat maleqqaarsimagaluaratsigu, tassalu taakku siunnersuuteqarput aalisarnermi atuisut akiliuteqarttalarernissaannut tunngatillugu umiatsiaaqqanut tunngatillugu, umiatsiaaqqat tamaavimmik aalisarnermut akuersissutit tamarmik immikkut 1.500 koruuneqassasut – taannali paaseqatigiinnerput tunngavigalugu massakkut Naalakkersuisuni allanngutissatut siunnersuuteqarfigivarput, tassa ataasiaannartumik akiliuteqartarnissaq pillugu tamatta naapiffigigatsigu.

Aamma Naalakkersuisuni qularineqassanngilaq aalisarnermut piniarnermullu atukkat annertoorujussuarmik aaqqissuussiffingineqarnissaat aallartikkatsigit pisariaqartorujussuarmik ukiuni kingullerni pissutsit assigiinngitsut ineriertorsimasut pitsangorsarnissaat pillugu suliniuteqarpugut aammalu pisassiissutit siulitta aalajangersarsimasaat uagut erloqissutigigatsigit massakkut erseqqissarusuppara aammalu suliniutigivarput ukiuni tulliuttuni pitsaanerusumik naleqqinnerusumillu pisasseeriaasissat eqqunneqartalernissaat. Qujanaq.

Per Berthelsen, Siulittaasuup tullia siulleq (S)

Ja qujanaq. Tassa aalajangiunneqarpoq Ilaqtariinnermut Ataatsimiititaliamut oqaluuserisaq una aappassaaneerneqartinnani ingerlatinneqassasoq taassuma kingorna aamma oqaluutikkuttoqassaaq. Soorunami ajuusaarutigaara oqaaseqarusuttuni ipianngutitsigama, kisianni tassa aqtsineq tutsuiginartumik ingerlassappat aamma killiliisariaqartarpugut, suli oqaluuserisassagut amerlasoorujussuupput namminerlu taanna piffissaq akilertussaavarput kinguaattoorermik imaluunniit sivisoorujussuarmik unnumut ingerlanissamik imaluunniit ulluni tulliuttuni ulaperujussuarnissamik.

Taamaattumik tassa ipianngutitakka taamatut ajuusaarninnik nalunnaarfagalugit oqarfigissavakka tassa periarfissaqarpoq una oqaluuserisaq oqaluuserineqaqqittussanngorluni ingerlasussanngorpoq

ataatsimiititalimut ingerlanneqarnermigut. Taamaalillunilu oqaaseqaqqinnissaq tassani periarfissaajumaarpooq.

Tassa tamakkua iluarsineqarumaarput oqaluuserisaq naammasivarput. Naamik suli Kattusseqatigiit Partiata oqaaseqartua amigaatigaarput Hr. Jakob Skade – takanna.

Jakob Skade (KP)

Qujanaq.

Inatsisartuni ilaasortap Hans Aronen, Inuit Ataqatigiinneersup siunnersuuta Kattusseqatigiit Partiianit imaattumik oqaaseqarfingissavarput.

Inatsisartuni ilaasortaq Hans Aronen, Inuit Ataqatigiit siunnersuuteqarpoq aalisartut piniartullu pisortanit ikiorserneqartarerat pillugu Inatsisartut peqqussutaat nr. 14 20. november 2006-imeersup kingusinnerusukkut allanngortinnejarsimasup ajornannginnerulersinniarlugu siunnerusuteqarluni.

Kattusseqatigiit Partiianit maluginiarparput ajornartoornermi aalisartut piniartullu pisortanit ikiorserneqarsinnaanerat piffimmi assigiinngitsunik inatsisip atuunnermini assigiinngitsunik tunngavigneqartartoq. Assersuutigalugu oqaatigerusunnarpoq aalisartut piniartullu akiligassatigut soorlu kallerup inneranut akiliunneqarnissamik saaffiginnitoqarsimatillugu killilerujussuarmik akissuteqaatinik tunineqaannartarneri aalisartut piniartullu namminersortuummata ikorsiiffingineqarsinnaasaratik.

Tamatumanngalu ilanngullugu Kattusseqatigiit Partiianit oqaatigerusupparput ajornartoornermi tiimit suliffissaqartitsiniutit atortarneri pitsasuugaluarlutik killissaqartitaanertik pissutigalugu unitsinnejartarmata.

Naalakkersuisunut kaammattutigerusunnarpoq ikorseeriaatsip inatsisip atuuttup siammasissumik Nunatsinnut ersarissarlugu inassuteqaatigeqqullugu.

Kattusseqatigiit Partiianit Naalakkersuisut oqariartuutaat paasilluaratsigit nalunaarutigissavarput ikorseeriaatsimut ikorsiissutit ilanngullugit isumalioqatigiissitami misissoqqissaarneqartussanngorneri ilisimaarigatsigit nalunaarutigaarput.

Taamak oqaaseqarlunga siunnersuut akuerseqataaffiginagu nalunaarutigaarput.

Per Berthelsen, Siulittaasuup tullia siulleq (S)

Taamaasillutik iniminngaanniit maani oqaaseqarumasut periarfissaqalerput aamma oqaatigissavara tassa minuttit marluk iluini oqaaseqarsinnaatitaagatta taamaattumillu aamma oqaluuserisap uuma aallaavia tunngaviutillugu soorunami killilersuisoqanngilaq, taamaattumik ipianngulluinnartut siuliani uani periarfissaqarsinnaapput aamma anersaariarnissaminut.

Siulliulluni oqaaseqarumalluni qinnuteqarpoq Hr. Jens Immanuelsen, Siumut – takanna.

Jens Immanuelsen (S)

Qujanaq.

Siulliulugu oqaatigeqqaassavara Aalisarnermut Piniarnermullu Naalakkersuisup oqariartuutaapiniarnermut aalisarnermullu tunngatillugu ukiuni siusinnerusuni aalajangerneqartartoq Naalakkersuisuni maani erloqissutigineqartutut oqaatigineqartoq. Uanga paasinnittaatsinnut taamaanngilaq, peqqutigalugu assersuutissaqarama qilalukkat pillugit.

Ukiuni pingasuni pisassiissutit aallaavigalugit aalajangiisoqarpoq, kisianni taakkua ukiumut pisassiissutit piniarneqanngitsulluunniit ukiup siuliani pisassiissutinik ilanngaavagineqarmata qan... paas... malugineqanngitsoorpoq, taamaattumik aaqqiissoqanngilaq tassani, naak siunertaagaluartoq taanna.

Kattusseqatigiit Partianni oqaaseqartoq Jakob Skade oqaatigivat isumalioqatigiissitap misissuinissaa iluarismaarlugu, isumalioqatigiissitaq sorleq pineqarpa ?

Per Berthelsen, Siulittaasuup tullia siulleq (S)

Oqaaseqartoq, takanna.

Jakob Skade (KP)

Qujanaq.

Ikiorseeriaatsimut inatsit uani eqqartoratsigu pisassiinissamut qulequtaanngimmat taanna pisassiinissamut tunngatillugu oqaaseqarfingissanngilara.

Ikorseeriaatsimi inatsit maannakkut Isumalioqatigiissitami taanna Naalakkersuisuni suliarineqarpoq, taannalu inatsit pissutaalluni assigiimmik kommunini inisisimanitsinni assigiimmik atorneqannginnami eqarmat, eqaallisarneqarnissaa maannakkut piumasarineqarpoq. Qujanaqaaq aamma taamaaliortoqarniarmat.

Assersuutigivara uani ajornartoornermi ikiorseeriaatsimut tunngatillugu kallerup inneranulluunniit akiliussisinnaaneq killiliiffigineqartarpooq piffimmi aalajangersimasumi. Inatsit 2006-imeersoq maannakkut suliarineqarsimanngitsoq siusinnerusumi suliarineqarsimanera taanna pissutaalluni. Taamaammat massakkut eqaallisarniarneqarmat taanna uagut taperserparput siunnersuutigineqartumut siunnersuutaa tapersinngikkaluarlugu aaqqiissutissaq tassani naniniarneqalermat.

Per Berthelsen, Siulittaasuup tullia siulleq (S)

Qujanaq. Tulliulluni oqaaseqarumavoq Hr. Hans Enoksen, Siumut – takanna.

Hans Enoksen (S)

Qujanaq Siulittaasoq.

Kattusseqatigii Partiata oqariartuuteqarnermini isumartik ersarissumik aninngimmassuk, uffa aalisartukkut piniartukkullu tassani ajornartorsiuttaat pineqartut. Taamaallaat innersuussisaqattaarnerat suleqatigiissitamut taanna uggorartupilorujussuuvoq, isumaarussimannguatsiaramik Kattusseqatigii Partiatiat taamaallaat Naalakkersuisut siunnersuutaat tamatigut isumaqatigiuannaavippaat. Nalunngilara Jakob Skade ulluinnarni nunaqarfimmi inooqataasoq aamma pissutsit ilisimavai piniartukkormiunut atugassarititaasoq qanoq ilungersunartigisut.

Taavalu tassunga atatillugu oqaatigissavara Ane Hansen-ip oqaluuserisap siuliani oqaasiilumuunngilluinnaqqissaarmata. Aalisarnermut inatsisissaq kinguartinneqarpoq, unitsinneqarpoq kommissionimilu suliarineqartussanngorluni.

Uagut siunnersuuteqanngilagut piniartukkut aalisartukkut akiliuteqarnissaannik aamma ukiut siuliini akiliisitsiniartnerigaluit unitsinneqarnikuupput, taamaammat tunngavissaqanngitsumik pisuutitsiniarerit tanna ilumuunngilaq aammalu pisassanik aqtsinermi Naalakkersuisooqatigiit siuliini pisuutitsinerit ilumuunngilluinnaqqissaarpoq pisassat biologit innersuussutai malillugit aaqqinneqarnikuupput, massakkullu qujanartumik Uummannami Upernavimmilu aalisarluartoqarmat pisassat nungunneqarnerat uagutsinnut tutsinniarsinnaanngilat, ajortumik sulisimanerarluta.

Nuannaarutigiinnassavat pisassat tamakkerneqarmata inuillu eqqissillutik aningaasarsiornertik ingerlassinnaammassuk, kisianni suli ilungersunarneruvoq ilissi paasinnigasi qaammatip missaani uninngatikkassigit. Massakkut aamma Avanersuarmiut ilungersunartumik atugaqartippasi, naak Kattusseqatigiit Partiat aamma tassani peqataagaluartoq tassani siulittaasua oqariartuteqartuaannarluni sukannersumik aqtsineq taanna qimanneqartariaqarpoq piniakkat killilersukkat eqqarsaatigalugit.

Massakkut ataasinnguamilluunniit oqassaarnerat .. (nipangeriataarpoq – immaqa unitsinneqarpoq)

Per Berthelsen, Siulittaasuup tullia siulleq (S)

Oqaaseqartoq.

Jakob Skade (KP)

Qujanaq. Pisassiineq maani annertunerusumik oqaaseqarfifissanngilara taanna inatsit ikiorseeriaatsimik inatsit eqqartoratsigu.

Illumoorputit aamma piniartut ullumikkut ajornartorsiutaat ullumikkuinnaq aatsaat eqqartorneqalinngilaq. Piniartut imminnut taamak appasitsigisumik amerlasoorparparparujussuit inisinneq ajorput. Ikiorserneqarnissaminnik taannaannaq kisiat utaqqillugu taamatut ingerlatsisoqarneq ajorpoq. Taamak appasitsigisumik inissinneqaraangamik oqallinnermi allaat inuup pisinnaatitaaffianik nammineq imminut aalajangiiffisarput qanoq iliuuseqarnissartillu nalulerlugu.

Taamaammat inatsit una eqqartorneqartoq ikiorseeriaatsimut tunngasoq taanna eqqartussallugu isumaqarpunga pingaartuuusoq, allatut ajornaqaaq suna tamaat qailersinnaagaluarparput soorunami sammisaq qulequtaq sammiumagutsigu tassa periarfissarput taanna. Inatsinuna ullumikkut qitulisarniarneqalermaat ajornartorsiutit takkukkaangata - ullut tamaasa taamaattoqarneq ajorpoq, ajornartoornermi inatsit tunngavigineqartoq massakkut maannakkut eqqartoratsigu aamma siunnersuuteqartup ersersippaa taanna.

Qitulisarniarparput 2000 pisimasoq taava massakkut qanoq iliuuseqartoqarnialermat, qujanaqaaq aamma taanna allanngortinniarneqalermaat, oqinnerusunngorlugu, qitunninngorlugulu periarfissamik aaqqissuussillutik aallartimmata. Taannaana uagut soqutigigipput, pissutigiinnanngilarput siuliini eqqartorneqartarsimasut, soorunami siuliini eqqartorneqartarsimasut aamma allanngortinneqartariaqassapput. Ajornaqaaq suna tamarmi qeratasoorujussuarmik ingerlatsisoqaannarsinnaanngilaq.

Per Berthelsen, Siulittaasuup tullia siulleq (S)

Ja tulliullunilu oqaaseqarumavoq Aalisarnermut, Piniarnermut Nunalerinermullu Naalakkersuisoq – takanna.

Ane Hansen, Aalisarnermut, Piniarnermut Nunalerinermullu Naalakkersuisoq (IA)

Qujanaq, tassa nuannaarutigaara oqaluuserisassaq una pingaarutilerujussuaq piniartunut aalisartunullu ingammik umiatsiaararsortunut soqutiginnillusi aamma isummersorfigigassiuk aamma paasilluarsimagassiuk Naalakkersuisut uani siunnerfiat sunaanersoq.

Taava uani Siumuminngaanniit Inatsisartuni ilaasortap Hans Enoksen-ip oqaasianut naqqiutigiinnassavara, tassa Naalakkersuisut oqaluuserisarsimasa aamma aalajangersartarsimasai www.nanoq.gl-imi takuneqarsinnaasarput, aammalu taanna najoqqutaralugu oqaatigissavara 2007- imi Naalakkersuisut aalajangiisimammata ukioq manna atuutilersuttassamik atuisut akiliuteqartalernissaannik tunngasunik aalajangersagaq taanna aalajangiussimavaat, taannalu najoqqutaralugu tassa siunnersuutaagaluarpoq umiatsiaararsortut pisassiissutinut tamanut, aalisagartassiissutinut tamanut immikkoortunut 1.500 koruunimik akiliisassatut.

Kisianni qujanartumik paaseqatigiinnitsigut taanna uagut Naalakkersuisuninngaannit allanngutissamik siunnersuuteqarfigivarput, taamaalilluni umiatsiaararsortut artukkerneqannginnissaat anguneqassammat, tassa ataasiaannartumik akiliisinneqartalernissaat uani anguniarniarneqartussanngorluni.

Taava pisasseeriaatsinut tunngatillugu oqaatigilaarusuppara ukiut siuliini suleriusaasarsimasut uppernarsartarsimanngilaat imaluunniit atuisut naammaginartumik sunneeqataasittarsimanngilaat pisassiissutit ukiumoortumik annertussusilernissaannut, taannalu ajornartorsiu qaangerniarlugu uagut Naalakkersuisuninngaannit massakkut suliaqarpugut aamma suliniutigivarput ukiuni tulliuttuni pisasseeriaatsinut piniartut aalisartullu ilisimasaasa atorneqartalernissaat piviusumik atorneqalissasoq.

Per Berthelsen, Siulittaasuup tullia siulleq (S)

Taamaalillungalu tassa siuliani oqallinnermi ipianngutitakka oqaaseqartippakka, matumanilu kaammattuitigeqqissallugu tassa oqaluuserisap quelequaa tunngavigalugu oqalunneq ingerlaqqissasoq aammalu saqqummiussisup oqariartuutai aallaavigalugit oqallinneq pissasoq, sulimi tassa tallimat allassimapput oqaaseqarumallutik. Kisiannili taakkua ingerlaqqitsinnagit soorunami oqaaseqartuusoq Kattusseqatigiit Partiiat sinnerlugu oqaaseqaqqaassaaq.

Jakob Skade (KP)

Qujanaq.

Kingullermik oqaaserisannut aalisarnermut piniarnermullu Ane Hansen-ip oqaaserisaanut tunngatillugu annertunerusumik oqaaseqarfigissanngilara taanna quelequttamut alassimanngimmat nassuaatigimmagu tusaatissatut taanna tigoruspupparu siulliup tullianut oqaaseqartumut innersuussutigalugulu.

Per Berthelsen, Siulittaasuup tullia siulleq (S)

Qujanaq, maannalu oqaaseqarumalluni qinnuteqarpoq Isumaginninnermi Naalakkersuisoq, takanna.

Maliina Abelsen, Isumaginninnermut Naalakkersuisoq (IA)

Qujanaq.

Tassa eqqarsaatigilaarniarlugu kikkut tamarmik uani pineqaramik Inatsisartut peqqussutaat pisortaninngaanniit ikorsiissutit taakku oqallisigigatsigit.

Aamma aalisarnermut tunngatillugu inatsit samminnginnatsigu, taavalu tassanilu uani allassimasoq isummerfigisussaavarput, tassani pisortanit ikorsiisarneq pillugu peqqussut sammigatsigu. Taava aamma erseqqissarusullugu apersuisarneq atorneqassammat paasisimanngisat apeqqutigalugit, imaanngitsoq oqallinnissaq sammillugu, tassa aamma sammineqartussat amerlasoorparujussuupput aamma ingerlaqqinniartussaavugut. Taava uannut tupinnarpallaanngilaq Jakob Skade Akileraartarnermut Innuulluarnermullu Atatsimiititaliarsuarmut innersuimmata. Tassa uani pineqarami Inatsisartut peqqussutaat, taava uumap siunnersutigineqarsimasup naammassillugu oqallisinissaanut piffissaq sinnerlugu immaqa atussavarput.

Per Berthelsen, Siulittaasuup tullia siulleq (S)

Oqaaseqartoq.

Jakob Skade (KP)

Qujanaq.

Uani erseqqiissatigilaarusuppara Kattusseqatigiit Partiianit Naalakkersuisut oqariartuutaat paasilluaratsigit, nalunaarutigissavarput ikorseeriaatsimut ikorsiissutit ilangullugit tassani allassimagatsigu Isumalioqatigiissitami misissuineqartussanngornera ilisimaarigatsigu nalunaarugaarput, ikorseeriaatsimut tunngasut taakkua eqqartoratsigit.

Per Berthelsen, Siulittaasuup tullia siulleq (S)

Aatsaannguummat Isumaginninnermut Naalakkersuisup erseqqissaataanut qujavunga, tassalu taannarpiaq ujartorpara massakkut kaammattuutigineqartoq malillugu ingerlassasugut. Aammalu oqaluuserisassarpassuit tassa eqqaasitsissutigeqqissavakka, taamaattumik maannamut tallimat tulliullutik oqaaseqarumasut taakkua akuersaarlugit oqaaseqartissavakka, taava tamatuma kingorna tassa siunnersuuteqartoq oqaaseqassaaq, taavalu Isumaginninnermut Naalakkersuisoq oqaaseqassalluni.

Tallimat iniminngaanniit oqaaseqarumasut siullersaat tassaavoq Hr. Kim Kielsen, Siumut – takanna.

Kim Kielsen (S)

Siulittaasoq qujanaq.

Kattusseqatigiit Partiata oqaaseqartartua Jakob Skade oqariartutigivaa tassa taanna Isumalioqatigiissitaq suliaq ingerlatilereeraa. Uagut suli paasinngilarput kikkut taakku inuttarineraat aamma ippassakkunnili annertuupilussuarmik sulianik tessunga innersusseqattaaginnavittarput, qaqluguuna taanna inuttassai paassisagigut – ilissi paasereernikuugassigit ?

Taamaammat aamma aatsaaginnaq Atassut oqaaseqartartua Siverth K. Heilmann oqariartuutanut tunngatillugu, oqaaseqarfisannut tunngatillugu oqaatigerusuppara ataatsimiititaliamut tunngatillugu 2005-imi Rasmus Ole Rasmussen annertuupilupilussuarmik misissuiniukuupput piniartut atugassarititaanut tunngatillugu.

Taakkua sakkussatut atorneqarniarlik, suna tamaat eqqartoqattaaginnavippagut - sunik tamanik eqqartuisaqattaaginnarpugut, kisianni tessani aamma atugassarititanut tunngatillugu annertuumik eqqaasaqarpoq taanna inuk – ilisimatoq tamakkuninnga misissuisimasoq. Sakkussatut atorniartigu taava ingerlaqqinniarta. Qujanaq.

Per Berthelsen, Siulittaasuup tullia siulleq (S)

Oqaaseqartoq.

Jakob Skade (KP)

Qujanaq.

Qujanaqaaq taanna ersarissarakku sakkussatut atorniartigit 2005-imili taanna nalunaarutigineqarsimasoq. Ullumikkut ukioq suugami? 2009-miippugut, maannakkut aallartiffigissalugu soorunami uagut kingusigivarput, eqqartorneqareersimappat taava eqqartorneqareersimassagaluarpoq ukiunili siusinnerusuni.

Per Berthelsen, Siulittaasuup tullia siulleq (S)

Ja uanilu Hr. Kim Kielsen taalaaginnassavara, tassa Aningaasaqarnermut Naalakkersuisup erseqissaatigimmagu ullumikkut nalunaarutigineqassasoq tessani Ataatsimiititaliarsuarmi kikkut peqataanissaat aammalu nalunaarutigalugu piumasaqataasoq aappaagu ukiup naannginnerani

suliassat suliareqquneqartut naamassisimanissaat, taanna ilisimatitsissutigeqqilaaginnarpara.

Ingerlaqqippugut tulliulluni oqaaseqarniarluni qinnuteqarnikuuvooq siunnersuuteqartoq Hr. Hans Aronsen, Inuit Ataqatigiit – takanna.

Hans Aronen (IA)

Qujanaq Siulittaasoq.

Uaniuna illuatungiliuttut oqaaseqartarnerminni aamma ullaat siulii eqqarsaatigalugit, tassa aamma Kattusseqatigiinni eqqaajuarpaq taanna isumaarussimasoq, Naalakkersuisut isumaannik pituttugaasutut oqariartuuteqartarnera aammalu partiit Naalakkersuisooqatigiinnut tunngatillugu aamma taamatut nipilimmik oqariartuuteqartarnerat oqaaseqarfigilaarusullugu.

Tassa aap soorunami ilumoorpoq ukiorpassuarni Naalakkersuisuusimagaanni takusinnaallugu nammineq kisimi oqartussaallutik imaluunniit oqartussaaffimmik annertunermik tigummiaqarlutik sunalu imaaliallaannarluni aaqqinneqarsinnaasartoq.

Kisianni massakkut soorunami Naalakkersuisuutitagut Naalakkersuisooqatigiit nutajupput, aatsaat taamannak Kalaallit Nunaat oqaluttuarisaaneranni Naalakkersuinikkut sulianik allanguiniartitsisoqalerpoq. Soorunami tupinnanngilaq illuatungiliuttut piffissap ingerlasimaneranik tunngasumik ingerlaasitoqqat malillugit ingerlatserusunnerat, taanna aamma ataqqivara taamatut isummersornerat.

Kisianni massakkut Naalakkersuisooqatigiit suleqatiginissaat isumaqatigiissutaanni tunngavigalugu partiit aammalu Naalakkersuisooqatigiit nutaanik isummanik aamma qineequsaarutigisimasat tunngavigalugit suliaqarput, taanna soorunami illuatungiliuttunut oqimaassaqaaq ukiorpassuarni nammineq isummat atorlugit ingerlasarsimanernut.

Taamaammat kissaatigiinnassavara taanna oqariartaaseq eqqarsaatigillualaarumaaraat, nutaatut ingerlatsineq aammalu qanganisaanerusumik ingerlatsineq ilaatigut imminni qanittuunngimmata.

Per Berthelsen, Siulittaasuup tullia siulleq (S)

Ja tassa qinnutigeqqissavara oqaluuserisaq una aallaavigalugu oqalussasugut aamma eqqaasitsissutigalugu siunnersuuteqartoq periarfissaqarmat oqaluttarfimminngaannit oqaaseqarnissamut.

Maanna tulliuppoq oqaaseqartoq.

Jakob Skade (KP)

Siunnersuuteqartup oqaasiinut annertunerusumik akissuteqarfiginagu siunnersuutanut tunngatillugu inatsisit pitsaanerusumik ilusilersorneqarnissaat kaammattutigigatsigu taanna inassuteqaatigissavara annertunerusumillu nassuiaateqarmat oqaaseqarfigissanngilara.

Per Berthelsen, Siulittaasuup tullia siulleq (S)

Qujanaq, oqareernittuut tulliuppoq Hr. Finn Karlsen, Atassut – takanna.

Finn Karlsen (A)

Qujanaq.

Issuaalaarsinnaavunga oqaaserisaanut tunngatillugu ? aap, Kattusseqatigiit Partiata oqaaseqartua oqarpoq imannak; ”tamatumunngalu ilanngullugu Kattusseqatigiit Partiianit oqaatigerusupparput ajornartoornermi tiimit suliffissaqartitsiniutit atorneqartarneri pitsaagaluarlutik killeqartitaanertik pissutigalugu unitsinneqartarmata” issuaaneq naavoq.

Taakkuku aningaasat sumut atorniaraluarisi? Aningaasanik tuniniaraluarisi taakkuninnga?
Imaluunniit sulisinniaraluarisi taakku atorlugit? Taamatut oqarnersi isumaqarpunga
itisililaartariaqarit.

Taavalu aamma akerusukkuit akissavat, Kattusseqatigiit Partiata
tusaqquaarutinggaangaartaarpaat ingasattajaartumik killilersuineq, massakkut suli
sakkortunerusumik killilersuineq aallartippoq taanna Kattusseqatigiit Partiianit maannakkut qanoq
isumaqarfigaat ?

Aammalu Aalisarnermut Naalakkersuisup aterput taallugu oqaatigimmagu uagut
siunnersuutigisimagipput taakkua immikkoortitaarlugit tamaasa akiliisinneqartalissasut

assigiinngitsunik aalisarnermut, oqaatigisariaqarpala ippassaani eqqartorneqarmat oqarpunga eqqarsaat taanna nutajunngilaq aamma kattuffiup Aalisartut Kattuffiata taamanikkut tunngaviatigut isumaqtiginikuua, kisianni piffissaasorinagu aalisakkat akilunnerat eqqarsaatigalugu itigartittuartarmassuk tunuartittuartarpalput aamma uanga oqarpunga massakkut Naalakkersuisuusimagaluarutta qularinngilluinnaqqissaarpala saqqummiunneqarsimanavianngikkaluartoq, Kattuffik allatut isummersimannngippat.

Taamaattumik oqaannartoqarsinnaanngilaq ilissiuna siunnersuutersi.

Per Berthelsen, Siulittaasuup tullia siulleq (S)

Qujanaq, oqaaseqartoq.

Jakob Skade (KP)

Qujanaq.

Finn Karlsen, Atassummiit apeqqutaanut tunngatillugu siullermik oqaatigilaarusuppara nunarput tamakkerlugu agguariaatsimut tiimit suliffissaqartitsiniutit taakku ilanngullugit eqqaasimagakkit. Piniartut allatsikkiartorsimagaangamik suliffissarsiorlutik periarfissinneqartarpalput qanoq iliuuseqarnissaannut aamma taanna ilisimavaat, taakku atorluarlugit ullumikkut ingerlatsisoqartapoq – qujanaqaaq aamma taamaattoqartarmat. Kisianni killeqarput taanna ilisimatitsissut ilinnut tunniuterusuppara – killeqarmata, ullumikkut unitsinneqartarmata taanna allatsissimagaangamik suliffissarsiorlugit ikiorserneqannginnissartik siunertaralugu aningaasanik tigusiinnarnissartik siunertarinnginnamikku, taakku atorluarlugit taamaammatt uani innersuussutigissavakka taakku atorluaanermik namminneq inuttut aningaasanik aalliinnarusunnginnamik naammassisqarusuttutut aamma taamatut iliortarmata, taanna innersuussutigerusuppara.

Kisianni killilersuinermi soorunami Katusseqatigiit Partia annertoorujussuarmik nalunngilara aamma ullumikkut maanngaanniit aatsaat tusalinngilarput qanoq annertutigisumik akerliusarsimasut. Taamaammatt pisassiineremi uani qulequtami ersittoqanngimmat taanna annertunerusumik oqaaseqarfingissanngilara.

Per Berthelsen, Siulittaasuup tullia siulleq (S)

Qujanaq, tulliulluni oqaaseqarumavoq Hr. Hans Enoksen, Siumut – takanna.

Hans Enoksen (S)

Aap qujanaq. Tassa Aalisarnermut Piniarnermullu Naalakkersuisoq Ane Hansen-i uani siuliani oqaaseqarnermini oqarpoq akiliutit taakku unitsinnejartut, kisianni massakkut tulliani oqaqqinnermini oqarpoq ataasiartumik taakku akiliutit 1.500 koruunit atuutsinnejassasut, sorleq ilumoorpa ? tassa uani 1.500 koruunit unitsinnejarnissaanik uagut Siumumi Atassummilu akerliunerput qujanartumik paasineqarpoq Naalakkersuisooqatigiinni.

Aamma allannguiinarnerit eqqartorneqaqattaartut Hans Aronseniminngaanniit. Aap allannguiinarnerit ingerlannejarsimaqaat aamma uagut siuttuuffigisatsinnik. Uanga siuttooqataaffigisannit peqataaffigisannik aatsaat taamak inuianni Kalaallini alloriarneq annertutigisoq tikinneqarnikuuvvoq, uaguinnaanngilaq maaniittut inuit peqatigalugit. Taamaammat oqartoqarsinnaanngilaq massakkut aatsaat allannguiartoqartoq Naalakkersuisuni nutaani – taamaanngilaq. Qangalili aallartinneqareerput innuttaasut tunuliaqtigalugit.

Kattusseqatigiit Partiata oqaatigimmagu inuit pisinnaatitaaffigigaat ikiorneqarnissartik aamma piniartut aalisartullu pisinnaatitaaffigigaat pisuussutinik uumassusilinnik atuinissartik.

Massakkorpiaq paaserusuppara sukannerusumik killilersuineq qanoq illit isumaqarfigaajuk ? Qujanaq.

Per Berthelsen, Siulittaasuup tullia siulleq (S)

Oqaaseqartoq.

Jakob Skade (KP)

Qujanaq. Hans Enoksen, Siumumeersoq apeqqutaanut tunngatillugu annertunerusumik oqaaseqarfiginngikkaluarlugu ullumikkut killilersuineq aatsaat taamak sakkortutigisumik aallartinngilaq, maannakkut Naalakkersuisooqatigiinni taanna tunniunnejarpoq aamma oqariartutigineqarpoq qangali taanna aallartimmat Naalakkersuisut soorunami taajunngikkaluarlugit Naalakkersuisoqarfimmut annguttarsimapput aamma

isumaqatigiinniartarsimapput pisassiinissamut eqqarsaatigalugit – taanna annertunerusumik qulequtaanngimmat.

Killilersuineq soorunami ullumikkut isumaqarfigivarput amerliartorpata allannortitsisoqartariaqarpoq siunnersuutigisariaqarparput ullumikkuinnaanngitsoq, periarfissamik aamma ujaasisariaqarpugut. Suleqatigiinnermik aamma taanna aallaaveqartussaavoq.

Taamaammat aamma uagut Kattusseqatigiit Partianinngaanniit suna tamaat mattutivissallugu pisuutinnejassagutta aamma soorunalimi aamma taamatut oqartoqars.... Kisiani tikkuussisariaqarpugut nalunaarusiorneqartut tunngavigalugit aallaavigalugillu qanoq iliuuseqarnerissarput aamma suleqataaffigissallugu piareersimaffigissavarput.

Per Berthelsen, Siulittaasuup tullia siulleq (S)

Ja qujanaq. Tassalu nalunaarutigisattut tassa Kattusseqatigiit Partiata oqaaseqartuanut atatillugu oqaaseqartussaq kingulleq maanna tikipparput, tassalu Hr. Jens Immanuelsen, Siumut – takanna.

Jens Immanuelsen (S)

Qujanaq. Tupinnanngitsumik piniartut aalisartullu pineqarmata oqallinneq annertuvoq aamma ulluni qaangiuttuni suliarineqarsimasut ilanngullugit eqqartorneqarlutik. Inuitissarsiutit pingaarnissaat pineqarpoq aalisarneq piniarneq. Tassalu inuitissarsiortut ullut tamaasa ilungersorlutik sulipput uagut inuiaqatigiinni pilorsorumalluta.

Aalisarnermut Piniarnermullu Naalakkersuisup oqaasii isumaqatiginngisara akerlissavara siulliullugu, ukiuni siusinnerusunili Naalakkersuisuusimasut suliassamik aallartitsinerat tunngavigalugu taassumap nanginneranut isigalugu sinerissap qanittuani aalisartut akitsuusiiffingeqarnissaat oqariartutuigaa.

Uanga isiginnittaatsinni taamaanngilaq, peqqutigalugu Naalakkersuisut maanna akiitsut Aningaasamik Inatsisisami siunnersuutaanni siullermeerlugu eqqartukkatsinni 12,9 mio.koruunit aningaasaliunneqarsimapput. Aatsaat-una siullermeerlugu pineqartoq oqallisigineqarnerani partiit ataatsimiititaliamut ingerlateqimmat Naalakkersuisut allannguutissatut siunnersuuteqarlutik oqariartortut – uanga paasinninera taamaappoq.

Kisianni Kattusseqatigiit Partiannut apeqqutigilaarusuppara isumalioqatigiissitaq, sunaana isumalioqatigiissitaq pilersinneqarsimasoq Kattusseqatigiit Partiata oqariartuitigigaa ? Inatsisartunut ilaasortatut nalunngilarput Isumalioqatigiissitamik pilersitsisoqarsimanngitsoq aamma appaagumut Aningaasanut inatsisisaq eqqarsaatigalugu siunnersuuteqartup siunnersummini aaqqiissuteqartoqarnissaa ujartormagu. Qujanaq.

Olga Poulsen Berthelsen, Siulittaasuup tullia aappaat (IA)

Oqaaseqartoq.

Jakob Skade (KP)

Qujanaq.

Aningaasaqarnermut Naalakkersuisup akissuteqaataa innersuussutigerusuppara taanna tusarsimanngikkukku pilersitsisoqareersimanera oqariartuitigimmagu.

Olga Poulsen Berthelsen, Siulittaasuup tulliata aappaat (IA)

Oqaaseqartumut qujanaq.

Tassa siullermik aqutsisup aatsaaginnaq qimaguttup Per Berthelsen-ip oqaaseqartussap killilereermagit tassunga killileriarlugu. Massakkut qinnuigissavara Inatsisartuni Ilasortaq siunnersuuteqartoq Hans Aronen, Inuit Ataqatigiit siunnersuutiminut tunngatillugu oqaaserineqartunut oqaaseqassasoq.

Hans Aronen (IA)

Qujanaq.

Qujanaq siunnersuutigisannut immikkoortoq 40-imut maani inersuarmi politikkikut suliallit tamarmik soqtiginnilluinnarlutik aammalu paasisimalluinnarlugu inuiaqatigiit uani oqaluuserisassami pineqartut pillugit suliamut oqalliseqataanerat aamma nuannersoq aammalu angusassaqarfialluartumik uummaarittumillu ingerlammat.

Siullermik Naalakkersuisut uani akissuteqaataanut tunngatillugu, tassani maluginiarsimavara Naalakkersuisut suliaq aamma taanna arlaatigut taakkununnga aalisartunut piniartunullu piffissap

ilaani atugarliuuteqartnerannut tunngatillugu peqqussutip imarisaani arlaatigut ajornartorsiuteqarsinnaanera tassani aamma taakkartorsinnaasimavaat uani ersarittumik sutigut atugaat ajornartorsiuteqartut, tassa uumap peqqussutip arlaatigut sanngiiffigisinnaasai.

Taamaammat Naalakkersuisut una malugeqqulaassavara Naalakkersuisut oqariartuutigivaat aqqutissaq siulleq tassaasoq Akileraartarnermut Atugarissaarnermullu pillugu Isumalioqatigiissitassamik pilersitsinissaq, taassumalu suliassaanut tunngasut aamma uani ersarilluinnartumik taagorpai Naalakkersuisup akissuteqarnermini.

Taakkua tunngavigalugit assorujussuaq uanni isumalluarnarsivoq aalisartut piniartullu sinerissami piffiup ukiup piffiata qanoq ilinera kiisalu aamma piniakkat aalisakkallu arlaatigut silaannaap allanngoriartornera sunniutigisaanik peqquteqartumik inuussutissarsiutiginiarneranik ajornartorsiuteqaleraangata periarfissaq massakkut ukua Naalakkersuisut Naalakkersuisooqatigiit tikkuussaat taakkununnga siunissamut ungasinnerusoq eqqarsaatigalugu, tassa massakkut oqartnerunngitsumik sukkasumik aaqqiinissamik tunngaveqanngitsumik, kisiannilu siunissamut ungasinnersumi aammalu pineqartut tassani meerartaat inuiaqatigiit kiisalu aamma taaku inuutissarsiortut tunngavigalugit aaqqissuussiniartoqalernera assorujussuaq iluarismaarakku.

Taamaammat Naalakkersuisut taanna sulissutiginiarlugu saqqummiussaat aamma Inatsisartuni maani peqataaninni Naalakkersuisooqatigiit suliariimmassuk tullusimaarutigalugu nuannaarutigisorujussuuara, kuuffigisussaallugulu Inatsisartuni maani pisussaaqataasutut.

Siullermik Inuit Ataqatigiit oqaaseqaataannut tunngatillugu aamma qujarusuppunga partiimma taamatut siornatigulli aamma ersarilluinnartumik politikkeqarsimanera tassunga pineqartut pillugit. Aamma uani Akileraartarnermut Atugarissaarnermullu Isumalioqatigiissitaq pilersinneqarneratigut taakkartuutigisaat tassa tassani taagugaasa aamma ilaaniippoq tapiissuteqartitsisarnemi aaqqiissuteqartarneq, tamakkuninnga ersarilluinnartumik uummaarillunilu aamma tappiffinginninera assorujussuaq nuannaarutigaara.

Kiisalu aamma nuannaarutigalugu aamma ataatsimiititalianut ingerlasussanngorlugu oqariartuutigeqqinnejnerat, taannalu aamma pissusissamisoorluinnartutut isigaara.

Taavalu Siumup oqariartuitigisaanut. Aap nuannaarpunga qujallungalu aamma Siumut immikkut politikkeqarmat aalisartut piniartullu atugarisaat tunngatillugu assigiinngitsorpassuarnillu aamma uani oqallinnermi qalluimmata, aamma aalisartut piniartullu atugaat tunngavigalugit ajornartorsiutaasut sinerissami tunngavigalugu uani oqallisissami oqaloqataammata.

Taavalu uani taasaani aamma uannut oqaluuserisassanngortitsisumut eqqarsaatigillaqqullugu taanna taaneqartoq, tassa 2010-imi Naalakkersuisut siunnersuutimikkut piniarnermut aalisarnermullu inuutissarsiuteqartut aningaasaqarnikkut periarfissaasa atugarisaasalu ullumikkornit ajornerulernissaannut inisisimalernissaat annertuumik aqqutissiuussimagaat Naalakkersuisut.

Taanna uanga tunginninngaanniit oqaluuserisassamut uani saqqummiussisutut assut assorujussuaq ajuusaarnartutut tiguara, taamatut inuiaqatigiinnik nipeqalersitsiniaaneq Naalakkersuisusut ukua nutaat aqqutissanik nutaanik suli misilissimanngisatsinnik ilaatigut aamma aqqutissiuillutik nutarteriniarnerat taamatut isigniartinniarneqassammat Siumup tungaaninngaanniit.

Taanna neriuuppunga aamma nammineq akunnerminni taanna eqqarsaatigilluarumaaraat oqaatsillu taakku atukkatik aamma inuiaqatigiinni upternassuseqarnerat imaluunniit upternassuseqannginnerat namminneq akisuussaaffigiumaaraat.

Kiisalu Demokraatit oqariartuitigisaannut tunngasumik. Demokraatit oqariartuitigisa aamma tassani inatsisitut peqqussutit assigiinngitsut inuiaqatigiinnut tamanut atuuttuunissaat tassuuna aamma uani oqaluuserisassap uuma eqqarsaatigerusaartarnerani aamma siornatigulli aamma Inatsisartuni taanna eqqarsaatigilluarumaaraat, oqaatsillu taakku atukkatik aamma inuiaqatigiinni upternassuseqarnerat imaluunniit upternassuseqannginnerat nammineq akisuussaaffigiumaaraat.

Kiisalu Demokratit aamma oqariartuitigisaannut tunngasumik, inatsisitta peqqqussutit assigiinngitsut inuiaqatigiinnut tamanut atuuttuunissaat tassuuna aamma uani oqaluuserisassap eqqarsaatigerusaartarnerani aamma siornatigulli inatsisartuni ilaasortaasimasoq oqaluuserisassamut tassunga saqqummiussisarsimagaluartoq, eqqarsaatersuutigisimasaasa aamma oqaloqatigisarneranut tunngasut, paasinarsilluinnarpoq inatsisit peqqussutillu, aammami nammineq atuisuusimalluni, ersikkamik tunngavimmikkut ilaatigut ataqtigiiinngippallaarsimasut, inatsisit peqqussutit nalunaarutillu suleqtigiiinngippallaartarsimasut.

Taammamat taanna maluginiarsimammasuk assut nuannaarutigaara.

Kiisalu Atassumminngaanniit saqqummiussat oqariartutigineqartut paasilluinnarpakka, tupigusuutigivaat piniartutut inuutissarsiuteqarnermut tunngasunik allannguinarnermut imaluunniit allagartat siunnersuutigisat pillugit uagut itigartitsisimanerput kiisalu massakkut piniartut atugaannik aaqqiiniarnerput, taanna ajuusaarnarpoq uani siunnersuuteqartuulluni.

Uanga siunnersuutigisara tunngavigalugu, siornatigut ukua ullut siuliini oqallisaasimasut aamma piniartut atugarisaannut tunngasut aamma akileraartarnermut atugarsissaarnermut ataatsimiititaliap suliassaannut aamma pingaarluinnartut attuumassuteqartut.

Kiisalu aamma aalisartut atugaasa inatsisigut naleqqussarnissaat pingaarluinnarnerata nalaani soorunami isummanik illuatungiliuttuulluni taamatut inuiaqatigiinnik tusarnaartitsiniarnera aamma uanga nammineq taanna tusaatissatut tiguinnarpara. Nammineq aamma Atassutip akisussaaffigimmagu.

Taava Kattusseqatigiit assorujussuaq nuannaarutigaakka, Naalakkersuisut isummersuutaannut isiginninniarsimammata uani. Naak uani siuliini ilaatigut partiit ilaasa Naalakkersuisut oqariartaantaannut tunngasut immaqa periarfissaanngitsutut isigisimagaat kisianni Kattusseqatigiit uani taammassut assorujussuaq nuannaarutigaara,

Kiisalu inunnut ataasiakkaanut tunngasumik oqaaseqartunut uterfiginnilaassaanga, tassa Siumuminngaanniit Hans Enoksen-ip ilaatigut aamma eqqaatsiarpaa uagut aamma nammineq toqqarlunga oqarfingimmanga, tassa Naalakkersuisuutitat isumaannik paasiniaaqqaarluni arlaatigullu pisarneq nammineq ileqqorinagu.

Uagut massakkut nutaatut Naalakkersuisuutitaqarnermut aamma Naalakkersuisunngorneq nutaaliornerlu siunertalarugu politikkikkut ingerlatsinialersugut pingaaortorujussuuvoq inatsisartuni Naalakkersuisunilu aamma imminut tikilluni oqaloqatigiinnissaq annermik Naalakersuisuutitaqarluni, Naalakkersuisut akornanni pissutsit nutarteriffit iluanni qanumut oqaloqatigiinnissaq pingaaortorujussuupput.

Taamaammat taanna ilinni tigulluarneqaannassasoq kissaatigaara, aamma una, oqartikkamma aalisagartassaaruttut inuiaqtigii ajornartorsiulertut aalisagartassaarunnerarlugit oqalunneraraannga, kisianni oqartungaana suliffissuarnut tunitsivissaaruttut tassani ersarissarikka, tunitsivissaaruttut. Apeqqutinnilu soorunami tunitsivissaaruttut qaqissimallugit.

Olga Poulsen Berthelsen, Siulittaasuup tulliata aappaat (IA)

Siunnersuuteqartoq piffissaliussaq naavoq, qujavugut. Massakkullu oqaaseqarniarpoq Nunamut Namminermut, Pinngortitamut Avatangiisinullu Naalakkersuisoq.

Anthon Frederiksen, Nunamut Namminermut, Pinngortitamut Avatangiisinullu Naalakkersuisoq (KP)

Qujanaq.

Siunnersuutip uuma assinganik, soorunami asserpiarinngisaanik, kisianni isumaqataanik Kattusseqatigii siusinnerusukkulli arlaleriarluta siunnersuuteqartarsimavugut. Tassa qinigaaffiup uuma siuliani. Kisianni sakkortunerpaamik itigartinneqartarsimavugut, illit qanoq isumaqarpit, maannakkut siunnersuuteqartutuut?

Ilumut siunnersuut taamaattoq siusinnerusukkulli akuerineqarsimasuuppata, qanormitaava kinguneqarsimasinnaagaluarpa?

Olga Poulsen Berthelsen, Siulittaasuup tulliata aappaat (IA)

Oqaaseqartoq.

Hans Aronen (IA)

Qujanaq.

Aap, tassa qaqqaaarninni uani oqaasissatut allassimasaraluara taamaasillunga maannakkut periarfissarilerpara.

Aap, ajuusaarnarpoq pineqartut siusinnerusukkulli nalilersorneqarlutik naleqqussarneqarlutillu pineqarsimangimmata. Taamaattorli maannakkut Naalakkersuisut nutaamik siunniussaqarerat kiisalu Naalakkersuisuititani partiit suleqatigiit aamma isummammi tassani qanillutik isumaqatigiilluinnarlutillu nutarteriniarnerat kingusinaanngitsutut suli isigigakku massakkut nuannaarutigaara.

Ajuusaarutigiinnarpala siusinnerusukkut taanna pisimanngimmat.

Olga Poulsen Berthelsen, Siulittaasuup tulliata aappaat (IA)

Inatsisartunut ilaasortaq Sivert K. Heilmann, Atassut.

Sivert K. Heilmann (A)

Qujanaq Siulittaasoq.

Siunnersuuteqartup aatsaarluinnaq oqalunnermini Atassutip saqqummiisua tusarnaartitsisimasutut oqaatigivat. Atassut siunnersuutinnut akissuteqarluni naqitanngorlugit saqqummiussivoq, ersarilluinnartumik Naalakkersuisuitarsi taperserlugu.

Ilissilu nammineerlusi Inatsisartuni Naalaakkersuisuititaqartut oqaaseqartuata Naalakkersuisut Akileraartarnermut atugarissaarnermullu isumalioqatigiissitami pilersitsiniarnerannut ilaatisallugu tulluartuusut. Taamaattumillu isumalioqatigiissitap inernilerniussaasa inassuteqaatissaallu utaqqimaarniarallassagissi oqariartuuteqarpusi.

Aamma oqaatigeqqilaarlara naggataamik. Qanillattorsinnaanissamut oqaaserpassuit atorneqareermata ammafiginnilluta oqariartuutigisagut eqqaamalaarniakkit.

Tusarnaartitsilluta oqalunngilagut aamma apeqqutigineqartut akivagut, ilinnit allaniillu apeqqutigineqartut. Isumaqpunga ataqqinninnerulaarluta oqaluttarfik atortariaqaripput. Qujanaq.

Olga Poulsen Berthelsen, Siulittaasuup tulliata aappaat (IA)

Oqaaseqartoq.

Hans Aronen (IA)

Qujanaq, Sivert K. Heilmann, Atassumminngaanniit.

Aallaqqaataani oqaatigivara nuannaarlunga maani inersuarmi tamatta inuiaqatigiit pineqartut pillugit suliamut aaqqissuussiumalluta suleqatigiikkusussuseqarnerput, aamma suliaqarusussuseqarnerput, taanna tamassinnut qujassutigaara.

Olga Poulsen Berthelsen, Siulittaasuup tulliata aappaat (IA)

Inatsisartunut ilaasortaq Karl Lyberth, Siumut.

Karl Lyberth (S)

Aap qujanaq.

Siullermik apeqquqtilaassavara Nunami Namminermut Naalakkersuisoq aatsaannguaq oqaaseqarnermini Nunami Namminermi Naalakkersuisutut oqaaseqarnersoq imaluunniit Kattusseqatigiit Partiat sinnerlugu oqaaseqarnersoq.

Uunga tunngatillugu oqaluuserisatsinnut, uanga nammineerlunga ajornartorsiu saqqummiunneqartoq ilisimaarilluinnarakku, taamaattumik ilungersuutigisimavarput Siumuminngaanniit ajornartorsiu ataatsimiisitaliamut ingerlateqqinnissaa.

Tassa partiit uagut Siumut kisitta taanna kissaatigisimavarput aallaqqaammut, qujanartumilli partiit allat ilumut ajornartorsiu taanna una piaartumik aaqqinniarnissaa paasillugu peqataalerterat. Assut uangaalluni nuannerpoq.

Taava aamma Siumumit saqqummiininni uparuarpatsigut ukua eqqarsaatigilaaqquullugit, allatagut imaluunniit taasagut. Tassani pivarpot illit nammineq partiippit Inuit Ataqatigiit naalakkersuisooqataanermini siunniuffit assigiinngitsorpassuit taakkua inuit atugaannut ajorseriaasussat taakkua ingerlanneqarmata, aamma aappaagumut Aningaasanut inatsisissami aamma takuneqarsinnaammata.

Taakkuku tikkuarigut. Illit taakkua inuit ikiorniakkatit tassuuna inatsisissakkut annernartumik pineqassammata, aamma nuanniitsumik pineqassammata. Soorlu assersuutitut taaneqarsinnaavoq, taakku inuit pisatit akileeqqaortalissapput aalisassagunik. Aamma taakkua meerai atuartuugunik, angajullerni atuartuugunik, pisartagaarutissapput, aamma meeqqanut ileqqaarutit atorunnaassapput.

Tassa assersuutitut taaginnarpakka aamma ilalerujussuupput taakkartorneqarsinnaasut, taakku atugaannut ajorseriaatsitut taaneqarsinnaasut.

Olga Poulsen Berthelsen, Siulittaasuup tulliata aappaat (IA)

Oqaaseqartoq.

Hans Aronsen (IA)

Qujanaq Karl Lyberth, Siumut.

Aap, soorunami nammineq politikkikkut siunniussaqarsimagaanni politikkimillu aalajangiusimasaqaraanni pineqartunut suliamut tunngatillugu isummiussimasat aamma paarilluinnarneqartussaapput, aamma taama iliopputit.

Uagullu aamma Inuit Ataqatigiinniinngaanniit taama iliopugut, isummagut aalajangiusimavagut, aamma ajunngitsutut isigivagut inuiaqatigiinnut aaqqissusseqqinnermut isigigatsigik.

Olga Poulsen Berthelsen, Siulittaasuup tulliata aappaat (IA)

Inatsisartunut ilaasortaq Jane Petersen, Inuit Ataqatigiit.

Jane Petersen (IA)

Qujanaq siunnersuuteqarnernut oqaaseqarnernut naggataatigut. Ilumoorpoq ajornartorsiuteqarpugut inuiaqatigiinni aalisarneq piniarnerlu eqqarsaatigissagaanni.

Aamma ajornartorsiuteqaannangilagut aamma isumassarsialippassuarnik peqarpugut piniartunik aalisartunillu. Nukinnik peqartunik aamma suli neriuuteqartunik. Aamma nuannaartutigaara maani inersuarmi aalajangiusimasinnaagatsigu tamatta isummagut naapisillugit aalisartut piniartullu atugaasa pitsangorsaavigineqarnissaannut isumaqatigiissuteqaratta.

Tassaavoq massakkut taanna aallarnerfigalugu massakkut sulinertut aallarnerfigissagipput
neriuutigaara.

Taava unaana apeqqutiginiarlugu, Atassutikkut siunnersuuteqarnerminni itigartitsissuteqarnerminni
patsisigaat aalisarnermut piniarnermullu allagartamik tunngassuteqartumut
itigartitsissutigineqarsimanera pillugu.

Aalisarneq piniarnerlu eqqarsaatigissagaanni aaqqissuussaaneq ataqatigiissaarnerusoq taavalu
akileraartarnikkut inuuniarnikkullu imminut attuumassuteqartoq aalisartut piniartullu
pilersugaqarnerat aamma pillugu, aamma meeraqarnerat, aamma inuutissarsiornermut periarfissaasa
qaammarsaavagineqarnissaanut tunngatillugu isuma ataqatigiissaarnerusoq, taavalu aalajangiussaq
akileraartarnikkut inuuniarnikkullu tunngasut illit qanoq isumaqarfingivigit?

Ullumikkornit pitsaanerusumik atugaqalernissaat pillugu isummersuuteqarnerni tamakku aamma
ilaanersut aperiniarikkit.

Olga Poulsen Berthelsen, Siulittaasuup tulliata appaat (IA)
Oqaaseqartoq.

Hans Aronson (IA)
Qujanaq. Qujanaq Jane Petersen, Inuit Ataqatigiinninngaanniit.

Aap ilumoorputit, aamma uani Inuit Ataqatigiit oqaaseqartartuattut saaqquummerlutit maani,
saqqummiussanniipput taakkua ilassilluinnarpakka tunngaviatigut inuiaqatigiit taakku pineqartut
atugaat arlaatigut innarluuteqarneranut tunngatillugu aaqqiissuteqarnissamut periarfissanik
tikkuartuussineruvoq.

Tassaniippullu oqariartuutigisassinni, uanga aamma uani siunnersuuteqarninni siunertaralugit
oqaatigisimasakka. Qanipput, imminnut attuumassuteqarluinnarput.

Olga Poulsen Berthelsen, Siulittaasuup tulliata appaat (IA)

Nunamut Namminermut, Pinngortitamut Avatangiisinullu Naalakkersuisoq.

Anthon Frederiksen, Nunamut Namminermut, Pinngortitamut Avatangiisinullu Naalakkersuisoq

(KP)

Qujanaq.

Tassa maluginiarigaana ataqqinartup inatsisartuni ilaasortap Karl Lyberth-ip ulluni kingullerni maani oqaaseqartarnera killilersorniartutuut ilillugu oqartarnera nuannarigakku.

Kisianni tassa erseqqissaatigilaarusuppara inatsisit tunngaviusut naapertorlugit, soorunami aamma maani inimi ataqqinartumi inuit qinigaasa oqalussinnaatitaaneranni ataqqinniffiusartumi, inooqataagama naatsorsuutigaara aamma ulluni tulliuttuni oqallinnerni peqataasarnissara oqaaseqartarnissaralu.

Uangalu takorluunngilluinnarpala Inatsisartunut ilaasortaq ataqqinartoq Karl Lyberth, allalluunniit maani inersuarmi qinigaasutut inisisimasut, oqalunnissaannik killilersorniarnissaat taanna siunertarinngilluinnarpala.

Neriuppunga taanna tusaatissatut tiguneqassasoq. Ilanngullugu erseqqissaassutigilaarusuppara Naalakkersuisuni ilaatigut aamma uunga oqallinnermut attuumassuteqartumi tikinnejallattaartuartoq, tassalu pisassiisarnermut tunngasut aamma pisassanik annertussusiliisarnermut tunngasut.

Taakku eqqarsaatigalugit Pinngortitaleriffiup qaninnerusumik suli suleqatiginissaa aamma pisassiisut sapinngisamik atorluarneqarnerulernissaat eqqarsaatigalugu Naalakkersuisut aamma paasisitsiniaanermut attuumassuteqartumik suliaqarmata neriuutigeqaarput aamma tamanna aalisartunut piniartunullu pitsaanerusumik kinguneqartinneqarumaartoq. Qujanaq.

Olga Poulsen Berthelsen, Siulittaasuup tulliata aappaat (IA)

Eqqaasitsissutigissavara uani massakkut oqaluuserigatsigu piniartut aalisartullu piffissap ilaani inuuniarnikkut ajornartorsiulernermanni pisortanit ikiorserneqarsinnaanerisa pitsaanerulernissaat

siunertalarugu sulisoqarnissaanik Naalakkersuisut peqquneqarnissaannik inatsisartut aalajangiiffigisassaattut siunnersuut.

Inatsisartut Naalakkersuisullu iluminni allanik oqaluuserinninnerat tassani isumaqarpunga unittariaqartoq, taannalu allani oqaluuserinniffissani oqaluuserineqarumaartoq. Maannakkut oqaluuserisarput siuliani issuagara 3 time-t sinnerlugu oqaluuserineqalerpoq.

Taamaattumik siunnersuuteqartumut oqaaserineqartut uteqattaartutut aamma ilereerput, tamannalu tunngavigalugu maannakkut oqaaseqarumallutik nalunaartut pingasuusut oqaaseqareerpata Isumaginninnermut Naalakkersuisoq oqaaseqassaaq.

Hans Aronen (IA)

Aap uunga siulinnut oqaluttumut akissuteqanngikkaluarlunga oqaaseqanngikkaluarlunga kisianni una ilanngutinngitsuugara tassa, Siumup saqqummiussinerminut aamma taasaa tassa, tunngavilersuuteqarsimannnginnitsinnut tunngaveqarluni aalajangeeqataasinnaanani.

Tassa kisianni uani tunngavilersuutinni ersarilluinnarpoq, nalilorsorakku aamma SIK pisortallu akornanni isumaqatigiissutit tunngavigalugit taakkua piniarnermut aalisarnermullu inutissarsiutillit immikkut ikorsiissutinik tunineqartarsimapput.

Tamakku tunngavilersuutigivakka, taakkununngami piniartunut aalisartunullu inatsit imaluunniit peqqussut taama inissisimatillugu naleqqutinngilluinnartutut isigigakku.

Taamaammat nuannaartorujussuvunga uannga isumalioqatigiissitaliassamut nutaamut pilersussanngulersumut suliassat taakku aamma naleqqutuummata taassuma tigummisussaassagai. Qujanaq.

Olga Poulsen Berthelsen, Siulittaasuup tulliata aappaat (IA)

Inatsisartunut ilaasortaq Sivert K. Heilmann, Atassut.

Sivert K. Heilmann (A)

Ja qujanaq. Naggataaq.

Aningaasarsiorsinnaaneq sionertaralugu piniarnermut allagarmik peqarnissamik piumasaqaatit, taakkua siunnersuutigisimasarput ilaatigut illit siunnersuuteqarninni itigartitsinitssinnut tunngavilersuutigisagut siusinnerusukkut maani saqqummiunneqarsimasut uani itisilerlugit tamaasa uteqqinnavianggilakka.

Taakku innersuussutigiinnassavakka Jane Petersen-ip aamma siunnersuuteqartoq, itigiartitsinitssinnut tunngavilersuutigisarput isumaqarpunga paasineqareersoq, aamma siunnersuuteqartup paasereeraa.

Aatsaannguaq qujaffigigatsigut paatsunngilluaasarpara siunnersuuteqartoq, partiit oqaaseqartuanut qujavutit, imikkullu taallugu Atassutip oqaaseqartua tusarnaartitsineralu taanna ippigigakkuuna uparuuarikkit.

Tusarnaarpugut tamatta, aamma avataaninngaannit tusarnaarneqarpugut, taanna ataqqinninnerulaarnissamik piumasaqarnera annikitsunnguuvoq.

Taamaattumik tassuuna naqqiinerinnaavoq, aamma naggataagut oqaatigeqqilaarlara, illit siunnersuuteqarninnut oqallinneq una aallaavigalugu allannguutissamik naalakkersuisooqatigiit siunnerfeqarpata nalorninaatsumik Atassut peqataajumalluni ersarisorujussuarmik oqariartuuteqareerpoq.

Uteqqissanngilakka taakku.

Olga Poulsen Berthelsen, Siulittaasuup tulliata aappaat (IA)
Oqaaseqartoq.

Hans Aronsen (IA)
Qujanaq Sivert K. Heilmann, Atassumminngaannit.

Aap ikani issiavimmi Inatsisartut issiavianni issiagallarama aamma tassani nassuiaateqarninni allannguiinarnermut nutaamik politikkeqalerluni ingerlalernermut tunngatillugu oqaaseqarninni eqqaavara.

Soorunami ingerlaasitoqaasimasut tunngavigalugit politikkeqarneq sungiusimaannalersimagaanni taamatut ingerlatsisoqarnissaannik piumasaqarneq atuuttuassasoq. Taannalu partiini taakkunani illuatungiliuttuni taamatut ataqqilluinnarlugu oqarpunga.

Neriuppunga aamma taanna paasilluarsimassagit.

Olga Poulsen Berthelsen, Siulittaasuup tulliata aappaat (IA)

Inatsisartunut ilaasortaq Karl Lyberth, Siumut.

Karl Lyberth (S)

Qujanaq.

Ataqqinartup Naalakkersuisunut ilaasortap Anthon Frederiksen-ip 2 minuttit oqalunnermini atera pingasoriarluni sisamararluniluunniit taammagu neriuppunga unitsinneqarnanga aamma 2 minuttit aamma oqalussinnaassallunga.

Tassa uani Antuup pisaa tassaavoq marlunngormat ataatsimiikkatta Hr.Anthon Frederiksen oqarpoq, maannakkut Naalakkersuisutut oqaaseqassanngilanga, kisianni Katusseqatigiit Partiata siulittaasuattut oqaaseqassaanga.

Maani oqaaseqarsinnaasut marluupput, tassatuaasut Naalakkersuisunut ilaasortat inatsisartullu. Nalunngisara malillugu Hr.Anthon Frederiksen inatsisartuni ilaasortaanngilaq, orloveqarpoq, taamaammanuna Jakob Skade maaniittooq, inatsisartut ilaasortatut, Katusseqatigiit Partiatiat sinnerlugu.

Taamaammat uanga ippigigiga Hr.Anthon Frederikseni oqarsinnaappat Naalakkersuisutut oqaaseqarniarani, tassa Naalakkersuisutut natsani peerpaa.

Taava uanga inatsimmi paasinninna malillugu imaappoq, Naalakkersuisutut natsani peeruniuk, inatsisartunimi ilaasortaannginnami, taava oqaaseqarsinnaanngilaq.

Taannaana pigiga Kattusseqatigiit Partiat sinnerlugu oqaaseqarsinnaanngitsoq, isumaqarpunga Naalakkersuisuujunnaariarluni Kattusseqatigiit Partiat sinnerlugu inatsisartoq Jakob Skade-ummat. Anthon Frederiksen, taama ilioqattaalissappat, Kattusseqatigiit Partiat sinnerlugu ilaasortat marlunngussagamik, inatsisartullu 32-nngorluta.

Erseqqilluinnartumik inatsiseqaraluarpugut maani oqallinnitsinni kikkut oqartussaanersut.

Taannaana uanga ippigalugu aperisunga, maannakkut Hr.Anthon Frederiksen qanoq oqalunnersoq, Naalakkersuisutut imaluunniit Kattusseqatigiit Partiat sinnerlugu oqalunnersoq.

Olga Poulsen Berthelsen, Siulittaasuup tulliata aappaat (IA)

Erseqqissaassutigeqqissavara maannakkut immikkoortoq 40 pigatsigu, allamullu tunngassuteqartoq eqqartorneqassanngitsoq maani.

Tullinnguuppoq Inatsisartunut ilaasortaq Hans Enoksen, Siumut.

Hans Enoksen (S)

Qujanaq Siulittaasoq.

Tassa uani piniartut aalisartullu inuuniarnikkut ajornartorsiulerminni pisortanit ikiorserneqarsinnaanerisa pitsaanerulernissaat eqqartorparput.

Siunnersuuteqartoq Hans Aronen Inuit Ataqatigiit, Hans Aronen-ip nuannaarnera paasisinnaavara, uani annertuumik inatsisartuni annertuumik tunuliaqtorsorneqarmat, tassami allagaqaatit malillugit ilaatigut isumalioqatigiissitarsuarmut suliassap ikineqarnissaa Naalakkersuisut siunnersuutigigaluarpaat.

Taannalu suli aallartinngilaq, ullumi inuttassaagooq ikkunniarpaat. Aallartikkallarnavianngilaq suleriusissartik ingerlateqqaartussaammassuk. Taava qularnanngilaq aatsaat 2012-mi immaqa 13-mi suliassatut naammassisinnaassavaa, sukumiisorujussuarmik sulineq ingerlanniarlugu oqaloreermata.

Tassa paasisinnaavakkit nuannaaravit. Siumup ilungersuutigimmagu uani ataatsimiisitaliamukaanneqarnissaa, taannalu Inuit Ataqatigiit peqataaffigilermassuk assut nuannerpoq.

Aamma Kattusseqatigii sinnerlugit Anthon Frederiksen oqaaseqaraluarluni siornatigut taakku namminneq ilungersuutigisarsimasatik suneqartarsimannngitsut, taamaanngilaq. Pitsangorsaatissatut arlalippassuarnik siunnersuuteqartarnikuuvugut, Inatsisartuni Naalakkersuisunilu.

Kisianni tupigilaarpala taamatut oqaloriaarlutit Kattusseqatigii Partiiat oqaluttua ataasinnguamilluunniit siunnerfimmik tikkuaanngimmat, kisianni nuannaarutigiinnarlugu igarsuup iluanut suliassanut allanut ilanngullugu iganeqarnissaa.

Olga Poulsen Berthelsen, Siulittaasuup tulliata appaat (IA)
Oqaaseqartoq.

Hans Aronsen (IA)

Qujanaq, qujanaq Hans Enoksen, Siumut.

Aap, una oqaluuserisassaq inuit pineqartut aammalu taamatut inuutissarsiuteqartuulluni qanoq killiffiit pifflit silap allanngorarnera pissutigalugu, kiisalu inuussutit tunngavigalugit arlaatigut innarliummik pisoqartillugu aaqqiisoqarnissaanik kissaatiginngisaqartarneq aamma nammineq qanimut ilisimalluinnarakku uani oqaluuserisassami peqataavunga.

Taamaammat uani aamma illersorluinnarpara najummissallugu suliassaq Naalakkersuisut aamma nutaamik anguniagaqarlutik ingerlalernerata iluani suliassanut isumalioqatigiissitanut nutaanullu isumalioqatigiissitassanut aamma ingerlasussanngornera nuannaarutigisorujussuugakku.

Taamaammat paasilluinnarlugu uuma oqaluuserisassanngortitama pineqartunut siunissami ungasinnerusumut piareersaannejarlutik piffissami massakkutut suut tamarmik imaaliallaannaq ajortiallannerinnaanni ajortoorfiusartut isiginiarnejarluarlutik ungasinnerusumut pilersaarusiornissaq tunngavigalugu Naalakkersuisooqatigiit uagullu Naalakkersuisooqatigiit partiianinngaanniit isumaqatigiilluinnarluta suliaq una tigugatsigu.

Aamma nalunngilara neriuullungalu paasinartumik pissusilersortarneq tunngavigalugu aamma illuatungiliuttut tassani suleqataanissaat qularinngilluinnarpala, oqaluuserisassanngortitamut taamatut inissinneqarnera.

Olga Poulsen Berthelsen, Siulittaasuup tulliata aappaat (IA)

Massakkullu siunnersuuteqartumut aamma partiit oqaaserisaannut Isumaginninnermut Naalakkersuisoq akissuteqassaaq, Isumaginninnermut Naalakkersuisoq takanna.

Isumaginninnermut Naalakkersuisoq,

Maliina Abelsen, Isumaginninnermut Naalakkersuisoq (IA)

Isumaqpunga peqqussut inatsisartut peqqussutaat pisortaninngaannit ikorsiissut taamaalillunilu aalisartut piniartullu inuuniarnerminni ikiorserneqarsinnaaniassammata.

Isumaqpunga siullermik pingaaruteqartoq siunnersuuteqartoq qutsavigissallugu attuumassuteqarluinnartumik apeqqummut saqqummiussilluni taanna naammassillugu ukiorpassuarni suliarineqarsimangitsoq.

Taava pappiaqqat kingumut misissoraanni, aamma taama ilioreerpunga, taava takunikuuara inatsisartunit saqqummiunneqartuaannartarsimasoq.

Tassa taannarpiaruna pissutigalugu Naalakkersuisut siunnersuuteqarsimasut akileraartarnermut inuulluarnermullu kommissionimi pilersinniarlugu ajornartorsiu naammassiniarlugu aaqqinniarlugu, tassa ersarinnerusumik allamik oqaatigisinnaanngilarput.

Qanoq ililluta una iluarsisinnaavarput, taamaalilluni ilaannikkut ajornakusoorsinnaavoq itigartitsisoqarlunilu siunnersummut akuerineqarluni, tassa oqarsinnaagatta suliaq aallartinneqareersimasoq.

Tassa ajornartorsiu assigiinngitsorpassuarnik attuumassuteqarami, taavalu aalisartut piniartullu inuiaqatigiinnut pingaaruteqartorujussummata, taava aamma suliaq peqqissaarullugu suliarineqassaaq.

Taamaammat pingaaruteqarluinnarpoq aamma piniartunut aalisartunullu ataqqinninnermik saqqummiilluta. Tassa isumaqarpunga politikkerit tamatta uagut nukigut nunami suliassanut atorusunneruagut.

Taamaattumik isumaqarpunga pingaaruteqartoq erseqqissaatigissallugu attuumassuteqarluinnartumik siunnersuuteqartaruma uani. Taama oqareeraanni taava aamma isumaqarpunga pingaartuusooq erseqqissassallugu Siumukkut saqqummiussaat. Taavalu aalajangiusimassallugu eqqarsaatigeqqittuaannassallugulu.

Taava soorlu Atassut allappoq, uagut Atassummi qularutiginngilarput piniartut aalisartullu atukkaminnik pitsanngortitserusunnerusut, isumaginninnermi ikiorserneqarnermiit. Tassa isumaqarpunga tessani pingaarutilimmik tigusaqarsimasut, tassa paassisavarput qanoq iliorluta aalisartullu piniartullu nammineq aningaasanik pissarsisinnaanissaannut.

Taamaammat isumaqarpunga pingaaruteqartuummat uninngatilaartariaqartoq. Tassa isumaginninnermut ikorsiissutinik piniartarluni kissaateqartoqarneq ajormat. Tassa ulluni kingullerni aalisartut piniartullu oqallisigineqartorujussuussapput, tassa isumaqarpunga aalajangiusimaneqassasut nallinnartullu aalisartullu assigiissinneqassanngimmata.

Tessani aalisartorsuaqarpoq piniartorsuaqarpoq aamma uani sianigissagatsigu tunumut qiviartuaannartarneq taavalu nalligiinnarlugit.

Taava aamma upperisinnaassavarput arlaatigut namminneq namminiilersinnaassasut, tassa isumaqarpoq aamma aalisartut piniartullu taamannak iluatsitsiniarumaartut. Taavalu aamma taamaaliussappata akileraartarnermut inuulluarnermullu kommissionip suliatigoortillugit.

Taava aamma assigiinngitsuniit partiininngaanniit sammineqarpoq paatsiveerutsinneqarl.. taava ilai itigartitsippu. Taava aamma taamaattumik Ataatsimiititaliaqarp.. taava aamma qinngasaarisoqarpoq, taanna ajunngilaq.

Tassa ajunngilaq taanna, taassuma ikiorserneqarnissaatigut, taakkua ikiorserneqarnissaatigut samminiarneqarput. Taava tassa nalinginnaasumik imaakkami siunnersuut akileraartarnermut kommissionimut nassiunneqarpoq.

Pisortat qanoq iliussappat, qanoq ilillutinuna ikiorsertassavaat pisariaqartitsisartut, qanoq ililluta inatsisit allanngortissavarput taamaalilluta? Assersutigalugu soorlu inuussutissarsiornermut politikki ataatsimoortoq ingerlatiinnarsinnaagutsigu uagut nammineq piumassutsivut atorlugit.

Taava aamma ilisimalluinnarpara oqallisigereer... sivisoorujussuarmik oqallisigerusukkatsigu, tassa isumaqarpugut pingaartuuvoq immaqa siumut samminerulaartartuugutta. Suunuku takorluugarigigut siunissamut. Taava soorunami ukiut qulit pisimasut aamma ilaannikkut takuneqarsinaapput, kisianni tassa siumut samminiartussaapput. Taamaammanuna akileraartarnermut atugarissaarnermullu kommissionimi suliaqaaqq...niarnivut imaanngitsoq ukiut qulit matuma siornatigut suut sammineqarsimanersut pillugit.

Isumaqarpunga misigissusaapput aamma oqallittarnissani, sunaana siumut angorusukkipput, suunuku, qanoq iliorlutaana aalisartut piniartullu pisariaqartitsinerani ikiorserniarigut uani Inatsisartut peqqussutaanni? Taavalu taanna Akileraartarnermut Inuulluarnermullu Kommissionip suliarillugu aallartissavarput.

Olga Poulsen Berthelsen, Siulittaasuup tulliata aappaat (IA)

Isummaginninnermut Naalakkersuisup akissuteqarneranut qutsavigeriarlugu massakkut tullunnguutisooq Inatsisartunut ilaasortaq Karl Lyberth, Siumut.

Karl Lyberth (S)

Qujanaq.

Isumaginninnermut Naalakkersuisup saqqummiinermini eqqisisimancerulaarluni saqqummiisuuguni immaqa nuannererussagaluarpoq aamma politikkereqatiminik ilinniartitserpalaartutut iliornani saqqummiiguni nuannererussagaluarpoq.

Isumaginninnermut Naalakkersuisup ilaatigut oqartoqarnerarpaa piniartut aalisartullu naakkinartutunngooq taakkartorneqartut.

Isumaqpunga taamatut oqartoqanngitsoq. Piniartut aalisartullu pisavut, taakkua soorlu uanga oqarninni oqaluppunga piniartuuneq aalisartuunerlu nuannersoq, inuuneq nuannersuusoq. Naakkinartutut taakkartorneqanngillat.

Kisianni ilaanneeriarlutik pisariaqartitsisarput allatuulli ikiorseqarnissaminnut, taannaana aaqqinniarippu. Qinnuigissavakkit oqalutsillunga akioqqunanga massakkut.

Taava uagut Siumuminngaanniit saqqummiinit sinni una pivarput. Taakkua ajornartorsi sinnaasartut pitsaanerpaamik ikiussagaluarpagut, atugarisaasa maannakkut ajorseriartinnagit.

Maannakkut Naalakkersuisut siunniuffiat qiviarutsigu, anguniagaat qiviarutsigit inatsisissamut siunnersuut qiviarutsigu, taakkoqqeqqissaajunagmik eqqorneqartussat, ajornernik atugaqartussat. Taannaana Siumuminngaanniit tikkuartorippu.

Taamatut siunniuffisi qimallugit allamik pitsaanermik, taakkununnga pitsaanerusussanik siunniuffeqartuugussi uagut Siumuminngaanniit anguniakkatsituulli taava taakkua pitsaanerpaamik ikiussagaluarpagut, taamatut periarfissaanik pitsaanernik pilersitsilluta.

Olga Poulsen Berthelsen, Siulittaasuup tulliata aappaat (IA)
Naalakkersoq.

Maliina Abelsen, Isumaginninnermut Naalakkersuisoq (IA)

Aap, tassa siullermik Karl Lyberth, qanoq saqqummiussissanerlunga nammineq aalajangissavara. Tassa saqqummiussisarnissarput nammineq akisussaaffigissavarput tassa aamma oqaatsinik saqqummiussassinni Siumuminngaanniit Aningaasanut inatsik 2010-mut inatsik sammivat.

Uani pineqarpoq pisortaniit ikorsiissutit pillugit peqqussut. Taavalu nallinnartunik taajorakkit, tassaniuna uani upperinninneq uterteqqikkusukkakku aamma uani eqqarsaatigalugu, qanoq taanna kinguneqassava.

Tassalu qanoq takorluugaqarnerluta tassa Naalakkersuisuninngaanniit uagut takorluugaqaratta.

Olga Poulsen Berthelsen, Siulittaasuup tulliata aappaat (IA)

Inatsisartunut ilaasortaq Hans Enoksen, Siumut.

Hans Enoksen (S)

Qujanaq Siulittaasoq.

Tassa uani Naalakkersuisut innersuussutaat malinneqanngilaq, isumalioqatigiissitamut suliassanngortinneqarnissaa. Kisianni Ataatsimiititaliamut ingerlatinneqarnissaa taanna suliarineqartussanngorpoq.

Innersunneqanngilaq isumalioqatigisiitami suliarineqassasoq massakkullu Inatsisartut Ataatsimiititaliaanni suliarineqarnissaa innersunneqarpoq.

Taanna neriuuppunga massakkut Siulittaasutut issiasup uppernarsarsinnaassagaa.

Qujanaq.

Olga Poulsen Berthelsen, Siulittaasuup tulliata aappaat (IA)

Tassa ilumoorpoq una siunnersuut Ilaqutariinnermut Ataatsimiititaliamut ingerlanneqartussatut amerlanerussuteqartunit aalajangerneqarpoq.

Naalakkersoq.

Maliina Abelsen, Isumaginninnermut Naalakkersuisoq (IA)

Naamik tassa taamaallaat isumaqatigilluinnarpala.

Olga Poulsen Berthelsen, Siulittaasuup tulliata aappaat (IA)

Massakkullu oqaaseqarumasunik kissaateqartoqanngimmat immikkoortoq 40, taamaasilluni
naammassineqarpoq.